

# मत्ती रचित सुसमाचार

## ईसू क बंसावली

1 इ ईसू मसीह क बंसज वृच्छ अहइ। इब्राहीम क बंसज दाऊद क पूत ईसू मसीह अहइ।

- 2 इब्राहीम क बेटवा इसहाक।  
इसहाक क बेटवा याकूब।  
याकूब क बेटवन यहूदा।  
अउर ओकर भाइयन।
- 3 यहूदा क बेटवन फिरिस अउर जोरह।  
(ओनकर महतारी तामार।)  
फिरिस क बेटवा हिस्त्रोन।  
हिस्त्रोन क बेटवा एराम।
- 4 एराम क बेटवा अम्मीनादाब।  
अम्मीनादाब क बेटवा नहसोन।  
नहसोन क बेटवा सलमोन।
- 5 सलमोन क बेटवा बोअज।  
(बोअज की महतारी राहब।)  
बोअज क बेटवा ओबेद।  
(ओबेद की महतारी रूथ।)  
ओबेद क बेटवा यिसै।
- 6 यिसै क बेटवा दाऊद राजा।  
दाऊद क बेटवा सुलैमान।  
(सुलैमान की महतारी उरिय्याह क पत्नी।)
- 7 सुलैमान क बेटवा रहबाम।  
रहबाम क बेटवा अबिय्याह।  
अबिय्याह क बेटवा आसा।
- 8 आसा क बेटवा यहोसाफात।  
यहोसाफात क बेटवा योराम।  
योराम क बेटवा उज्जियाह।
- 9 उज्जियाह क बेटवा योताम।  
योताम क बेटवा आहाज।  
आहाज क बेटवा हिजकियाह।
- 10 हिजकियाह क बेटवा मनस्से।  
मनस्से क बेटवा आमोन।  
आमोन क बेटवा योसिय्याह।
- 11 योसिय्याह क बेटवन युकुन्याह अउर ओकर भाइयन।  
(इस्त्राएल क मनइयन क कइदी बनाइ के बेबीलोनलइ जात क समइउ दुइनउँजनमेन।)
- 12 बेबीलोन में लइ जाए क पाछे:  
युकुन्याह क बेटवा सालतिएल।  
सालतिएल क बेटवा जरुब्बाबिल।

- 13 जरुब्बाबिल क बेटवा अबीहूद।  
अबीहूद क बेटवा इल्याकीम।  
इल्याकीम क बेटवा अजोर।
- 14 अजोर क बेटवा सदोक।  
सदोक क बेटवा अखीम।  
अखीम क बेटवा इलीहूद।
- 15 इलीहूद क बेटवा एलीआजर।  
एलीआजर क बेटवा मत्तान।  
मत्तान क बेटवा याकूब।
- 16 याकूब क बेटवा यूसुफ।  
यूसुफ मरियम क पति।  
ईसू क महतारी मरियम।  
ईसू मसीह कहा गवा।

17इ तहर इब्राहीम स दाऊद ताई चउदह पीढ़ी बीत गइन। अउर दाऊद स लइके कइदी बनाइके बेबीलोन पठए जाइ तलक चउदह पीढ़ी। अउर कइदी बनाइ के बेबीलोन पठए जाइ स मसीह क जनम ताई चउदह पीढ़ी अउर भइन।

## ईसू मसीह क जनम

18ईसू मसीह क जनम इ तरह भवा: जब ओकर महतारी मरियम क यूसुफ क साथ बरिच्छा भइ तउ बियाहे स पहिले ही पता लगि गवा कि उ पवित्तर आतिमा क सक्ति स ओकर गोड़ भारी होइ ग। 19मुला होइवाला ओकर भतार यूसुफ एक ठु बढिया मनई रहा। उ इ बात क खोलिके बतावइ स बदनाम नाहीं होइ चाहत रहा। तउ उ मने में ठान लिहेस कि उ बरिच्छा क चुप्पे स पक्का न होइ दे। 20फिन जबहिं उ इ बारे में सोचत रहा कि उ सपने में आपन समन्वा पभू क दूत परगट होत ओसे कहेस, “हे यूसुफ, दाऊद क बेटवा,\* मरियम क पत्नी बनवइ स जिन डेरआ काहेकि जउन बचवा ओकरे गरभ में अहइ, उ पवित्तर आतिमा क अहइ। 21उ एक पूत क जनमी। तू ओकर नाउँ ईसू धार्या काहेकि उ आपन मनइयन क पापन स उद्धार देई।”

22इ सब कछू इ बरे भवा ह कि पभू नबी स जउन कछू कहवाएस, पूरा होई: 23“सुना, कुँआरी कन्या गोड़े स भारी होइके एक बेटवा क जनमी। ओकर नाउँ इम्मानुएल रक्खा जाई।”\* (जेकर अरथ अहइ, “परमेस्सर हमरे लगे बाटइ।”)

दाऊद क बेटवा दाऊद क परिवारे क मनई, इस्त्राएल क दूसर राजा, मसीह क 1000 बरिस पहिले।

सुना ... जाई यसा. 7:14

24जब यूसुफ नींदे स जागि गवा तउ उ उहइ किहेस जउन जेका करइ क पर्भू क दूत ओका हुकुम दिहेस। उ मरियम क बियाही के आपन घरे लइ आइ। 25मुला उ जब ताई उ पूत क जनम नाही दिहेस तब ताई यूसुफ ओकरे लगे सोएस नाही। यूसुफ बेटवा क नाउँ ईसू राखेस।

### पूरब द बिद्वानन क आउब

2 यहूदिया क बैतलेहम में अब ईसू क जनम भवा तबहिं हेरोदेस राज्य करत रहा। कछू समइ बीत जाइ क पाछे कछू बिद्वान जउन नखत्रन क बारे में पढ़त रहेन पूरब स यरूसलेम आएन। 2उ पचे पूछेन, “नवा पइदा भवा बचवा कहाँ बाटइ जउन यहूदियन क राजा अहइ? हम ओकर नखत्र क अकासे में देखा ह। एह बरे हम पूछत अही। हम पचे ओकर आराधना करइ आइ अही।” 3जबहिं राजा हेरोदेस इ सुनेस तउ उ बहोतइ बेचइन भवा। ओकरे साथे यरूसलेम क सब मनइयम फिकिर करइ लागेन। 4तउ उ यहूदी समाज सब मुख्य याजकन अउर धरम सास्तिरियन क ँकट्ठा कइके उ पचेन स पूछेस कि मसीह क जनम कहाँ होइ क अहइ?

5उ पचे ओका बताएन, “यहूदीया क बैतलेहम में काहेकि नबी पवित्तर सास्तरन में इ तरह लिखा बाटइ:

6ओ यहूदा क धरती प टिका अहा बैतलेम, तू यहूदा क अधिकारियन में कउनो तरह स छोट नाही काहेकि तोसे एक ठु राजा परगट होई जउन मोरे मनइनयम, इस्त्राएल क देखभाल करी।”

मीका 5:2

7तब हेरोदेस तारा गियान क पण्डितन क बोलाएस अउर ओनसे पूछेस, कि उ तारा ठीक समइ प कब देखोई पड़ा? 8फिन उ ओनका बैतलेहम पठाएस अउर कहेस, “जा, उ बचवा क बारे में नीक नीक पता लगावा अउर जब उ तू पचेन क मिलि जाइ तउ मोका बतावा जेहबरे मई भी आइके ओकर आराधना कइ सकउँ।”

9फिन उ पचे राजा क बात सुनिके चल दिहेन। उ तारा जेका उ पचे अकासे में निकरा निहारे रहेन उ ओनके अगवा अगवा तब तलक गवा जब तलक उ ठउर पइ पहुँच नाही गएन जहाँ उ बचवा रहा। 10जब उ पचे तारा क देखेन तउ उ सबइ आनंद स झूमि उठेन। 11उ सबइ उ पचे घरवा क भीतर गएन अउर बचवा क अउर ओकरी महतारी मरियम क संग दरसन किहन। उ पचे सास्टांग दण्डवत करेन अउर ओकर आराधना करेन। फिन आपन कीमती चीजन्क पिटारी स सोना, लोहबान अउर इत्र क भेंट चढ़ाएन। 12मुला परमेस्सर ओनका सपने में होसियार कइ दिहेस कि उ पचे हेरोदेस क पास लौटि क न जाँइ। तउ उ सबइ एक दूसरे राहे स आपन देस लौट गएन।

### ईसू क लइके माता-पिता क मिस्त्र जाब

13जब उ पचे चल दिहन तउ यूसुफ क सपने में पर्भू क दूत परगट होइके कहेस, “उठा, बचवा क अउर ओकर महतारी क चुप्पे स लइके मिस्त्र भागि जा। जब ताई मई

तोसे न कहउँ, हुवाँ ठहरया। काहेकि हेरोदेस इ बचवा क जान स मरवावई बरे खोजी।”

14तउ यूसुफ खड़ा भवा अउर बचवा अउर ओकर महतारी क रातोरात मिस्त्र क बरे चलि पड़ा। 15फिन हुवाँ हेरोदेस क मउत तलक रुकि गवा। इ एह बरे भवा कि पर्भू जउन नबी स कहवाए रहा, उ पूरा होइ जाइ, “मई आपन पूत क मिस्त्र स बाहेर आवइ बरे कहेउँ।”\*

### बैतलेहम क सब लरिकन क हेरोदेस जान स मरवाइ दिहेस

16हेरोदेस जबहिं इ देखेस कि तारा गियानी ओकरे संग इ चाल चलेन ह, तउ उ बहोत गुस्साइ गवा। जइसा तारा गियान क पण्डितन क बताइ भए क अनुसार उ हुकुम दिहेस कि बैतलेहम अउर ओकरे नगिचे क पहुँटा में दुइ साल या एसे छोटवार लरिकन क जान स मरिवाइ दीन्ह जाइ। 17नबी यिर्मयाह क कहा भवा बचन पूरा होइ ग:

18“रामाह में दुःख भरा सब्ब सुना गवा, रोवइ अउर विलपइ क सुना। राहेल रोवत रही आपन बचवन बरे उ नाही चाहेस कि कउनो धीरा धखावइ काहेकि ओकर सबइ बचवन मरि गवा रहेन।”

यिर्मयाह 31:15

### ईसू क लइके यूसुफ अउर मरियम क मिस्त्र लउटब

19फिन हेरोदेस क मउत क पाछे मिस्त्र में यूसुफ क सपन आवा ओहमों पर्भू क एक ठु दूत परगट भवा। 20अउर सरगदूत ओसे कहेस, “उठि जा, बचवा अउर ओकर महतारी क लइके इस्त्राएल क धरती प जा काहेकि जउन बचवा क मार डावइ चाहत रहेन उ सबइ मर बिलाइ गएन।”

21तब यूसुफ उठि गवा अउर बचवा अउर ओकर महतारी क लइके इस्त्राएल गवा। 22मुला यूसुफ जब इ सुनेस कि यहूदिया प आपन बाप हेरोदेस क जगह प अरखिलाउस राज्य करत अहइ तउ उ हुवाँ जाइ स डेराइ गवा किन्तु सपने में परमेस्सर स हुकुम मिले क पाछे उ गलील पहुँटा बरे चल दिहेस। 23अउर हुवाँ नासरत नाउँ क नगर में घर बनाइके रहइ लाग; एह बरे नबियन क कहा भवा बचन पूरा होइ जाइ कि, ‘उ नासरी’ कहा जाइ।

### बपतिस्मा देइवाला यूहन्ना क काम

(मरकुसा 1:1-8 लूका 3:9-9,15-17 यूहन्ना 1:19-28)

3 उ दिनन बपतिस्मा देइवाला यूहन्ना यहूदिया क बियाबान उसरे में उपदेस देत भवा हुवाँ आवा। 2उ इ प्रचार करइ लाग, “मन फिरावा काहेकि सरग क राज्य जल्दी आवइ क अहइ।” 3इ उहइ यूहन्ना बाटइ जेकरे बारे में नबी यसायाह बात बतावत कहेस ह:

“उसरे में एक पुकारैवाला क सब्ब अहइ: “पर्भू बरे रास्ता तइयार करा अउर ओकर बरे सोझ रस्ता बनवा।”

यसायाह 40:3

टिड्डन अउर जंगली सहद रहा। 5उ समइ यरूसलेम, समूचा यहूदिया छेत्र अउर यरदन नदी क नगिचे मनई ओकरे लगे ओका सुनइ ँकट्ठा भएन। 6उ पचे आपन पापन्क कबूलेन्ह अउर यरदन नदी में ओकरे जरिये बपतिस्मा\* दीन्ह गवा।

7जब उ लखेस कि ढेर फरीसियन\* अउर सदूकियन\* ओकरे लगे बपतिस्मा लेइ आवत अहई तउ उ ओनसे कहेस, “ओ सरप क बच्चा लोग! तू पचन क कउन चिताउनी दिहस ह कि परमेस्सर क होइवाला किरोध स बच जा? 8तोहका इ बात क प्रमान देइ पड़ी कि तू पचे फुरे फुरे मनफिराया ह। 9अउर इ जिन सोचा कि खुद अपने स कहे बिना इ बात काफी होइ जाई, ‘हम पचे इब्राहीम क संतान अहीं। मई तोसे कहत हउँ कि परमेस्सर इब्राहीम बरे इ पथरन स बचवन क पइदा कइ सकत ह। 10बृच्छन\* क जरे प कुल्हाड़ा रखा बाटइ अउर हर एक बृच्छ जउन फर पइदा नहीं करतेन, उ काटिके गिराइ दीन्ह जइहीं; अउर फिन कोका आडी में झोंकि दीन्ह जाई। 11मई तउ तू पचन क तोहरे मनफिराव बरे पानी स बपतिस्मा देत हउँ; मुला उ जउन मोरे पाछे आवइवाला अहइ उ मोसे जिआदा बरिआर अहइ। मई तउ ओकर पनही खोलइ क जोगग नहीं। उ तू पचन क पवित्तर आतिमा अउर आगी स बपतिस्मा देइ। 12ओकरे हाथ में सूप अहइ, जेहसे उ अनाजे क भूसा स अलग करी। अपने खरिहाने स उ साफ कीन्ह अनाजे क उठाइ क, ँकट्ठा कइके कोठिला में भरि देइ अउर भूसा क अइसी आगी में नाइ दीन्ह जाई कि बुझाए प न बुझी।”

### ईसू क यूहन्ना स बपतिस्मा लेब

(मरकुस 1:9-11; लूका 3:21-22)

13उ समइ ईसू गलील स चलिके यरदन क किनारे यूहन्ना क नगिचे ओसे बपतिस्मा लेइ बरे आवा। 14मुला यूहन्ना ईसू क निर्णय बदले क जतन करत कहेस, “मोका तउ खुद तोसे बपतिस्मा लेइ क दरकार अहइ फिन तू काहे मोरे नगिचे आया ह!”

15ईसू जवाबे में ओहसे कहेस, “अबहिन तउ ँका अइसे होइ द्या। जउन परमेस्सर चाहत अहइ, हमका उ पूरा करब नीक बाटइ।” फिन उ वइसे होइ दिहस।

16अउर तबहिं ईसू बपतिस्मा लइ लिहस। जइसे उ पानी स बाहेर आवा, अकास खुलि गवा। उ परमेस्सर क आतिमा क एक ठु कबूतरे क नाई खाले उतरत अउर ऊपर आवत देखेस। 17तबहिन आकासवाणी भइ: “इ मोर पिआरा पूत अहइ जेसे मइ खूब खुस हउँ।”

**बपतिस्मा** एक यूनानी सब्द अहइ। जेकर अरथ अहइ पानी में बुड़की या गोता लगाउब।

**फरीसियन** एक यहूदी धार्मिक समूह, जउन मूसा क व्यवस्था अउर रीति रिवाज क कट्टर होइके मानत रहा।

**सदूकियन** एक यहूदी धार्मिक समूह जउन ‘पुराना धर्म नियम’ कि केवल पहली पाँच पुस्तकन क स्वीकार करत ह अउर कउनो क मर जाने क बाद ओकर पुनरुत्थान नहीं मानता।

**बृच्छन** अर्थात जउन मनई ईसू में बिस्वास नहीं रखतेन।

### ईसू क परिच्छा

(मरकुस 1:12-13; लूका 4:1-13)

4 फिन आतिमा ईसू क उसरे में लइ गइ, काहेकि सइतान क जरिये ओका परखा जाइ सकइ। 2चालीस दिन अउर चालीस रात भुखिया क पाछे जब ओका भूख तइपावइ लाग।

3तउ ओका ललचावइ वाला ओकरे लगे आवा अउर कहेस, “जदि तु परमेस्सर क पूत बाट्या तउ इ सबइ पथरन स कहा कि इ सब रोटी बन जाई।” 4ईसू जवाब दिहस, “पवित्तर सास्तरन में लिखा बाटइ:

‘मनई सिरिफ रोटी स नहीं जिअत मुला उ हर एक सब्द स जिअत ह जउन परमेस्सर क मुँह स निकरत ह।”

व्यवस्था विवरण 8:3

5फिन सइतान ओका यरूसलेम क पवित्तर नगर में लइ गवा। हुआँ मन्दिर क सब स ऊँचे बुर्ज प खड़ा होइके 6उ ओसे कहेस, “जदि तू परमेस्सर क पूत बाट्या, तउ नीचे कूदि जा काहेकि पवित्तर सास्तरन में लिखा बाटइ:

‘उ तोहरे रखवारी बरे आपन दूतन क हुकुम देइ अउर उ पचे तोहका हाथन स उठाईहीं जेह बरे तोहरे गोड़े में कउनो पाथर ताई न लगई।”

भजन संहिता 91:11-12

7ईसू जवाब दिहस, “मुला पवित्तर सास्तरन इहइ कहत ह,

‘अपने पभू परमेस्सर क परीच्छा में जिन डावा।”

व्यवस्था विवरण 6:16

8फिन सइतान ईसू क बहुतइ ऊँच पहाड़े प लइ गवा। अउर ओका इ संसार क सब राज्य अउर ओनकइ माया वैभव देखाएस। 9सइतान तब ओसे कहेस, “इ सब चीजन्क मई तोहका दइ देब जदि तु मोरे अगवा दण्डवत करा अउर मोर आराधना करा।”

10फिन ईसू ओसे कहेस, “सइतान! दूर होइ जा। पवित्तर सास्त्र कहत ह:

‘आपन पभू परमेस्सर क आराधना अउर सिरिफ ओकर सेवा करा।”

व्यवस्था विवरण 6:13

11फिन सइतान ओका छाँड़ि के चला गवा। अउर सरगदूतन आइके ओकर सेवा करइ लागेन।

### ईसू गलील में काम सुरू करेस

(मरकुस 1:14-15; लूका 4:14-15)

12जब ईसू सुनेस कि यूहन्ना पकड़ लीन्ह गवा ह, तउ उ गलील लौटि आवा। 13मुला उ नासरत में नहीं रुका अउर जाइके कफरनहूम में रहइ लाग जउन जबूलन अउर नप्ताली क पहटा में गलील झीले के नगिचे रहा। 14इ एह बरे भवा कि परमेस्सर क नबी यसायाह जउन कहेस ह, उ पूरा होइ जाइ:

15जबूलन अउर नप्ताली क देस सागर क राहे प, यरदन नदी क पच्छिम में गैर यहूदियन क देस गलील में

16जउन मनई आँधियारे में जिअत रहेन उ सबइ एक भारी जोति देखेन अउर जउन मउत क परिछाई क देस में रहत रहेन, ओन प ज्योति क भिन्सारे क रोसनी फैलि गइ।”  
यसायाह 9:1-2

17उ समई स ईसू सुसमाचार क प्रचार सुरू कइ दिहस, “मनफिराव करा काहेकि सरगे क राज्य नगिचे बाटइ।”

### ईसू चेलन्क चुनेस

(मरकुस 1:16-20; लूका 5:1-11)

18जब ईसू गलील झिलिया क नगिचे स जात रहा, उ दुइनउँ भाइयन क निहारेस समौन (जउन पतरस कहा गवा।) अउर ओकर भाई आन्द्रियास। उ पचे झिलिया में जाल डारत रहेन। उ पचे मछुवारा रहेन। 19ईसू ओनसे कहेस, “मोरे पाछे आवा, मई तोहका सिखाउब कि लोगन्क बरे मछरी पकड़इ क बजाय मनई रूप में मछरी कइसे बटोरी जात हीं?” 20उ सबइ तुरतहिँ आपन जाल छाँड़ि दिहन अउर ओकरे पाछे होइ गएन।

21फिन उ हुवाँ स आगे चला गवा। उ देखेस कि जब्दी क बेटवा याकूब अउर ओकर भाई यूहन्ना आपन बाप क संग नाउँ में बैठिके आपन जालन्क मरम्मत करत रहेन। ईसू ओनका बोलाएस। 22अउर उ पचे फउरन नाउ अउर बाप क छाँड़िके ओकरे पाछे चल दिहन।

### ईसू क मनइयन क उपदेस अउर ओनका चंगा करब

(लूका 6:17-19)

23ईसू समुच्चइ गलील पहँटा में यहूदी आराधनालय में सरगे क राज्य क सुसमाचार क उपदेस देत अउर हर तरह के बेरामी अउर घोर कस्टन क दूर करत घूमइ लाग।

24समुच्चइ सीरिया देस में ओकरे बारे में खबर संचर गइ। यह बरे लोग अइसे मनइयन जउन खूब बेरमिया रहेन या जउन तरह के बेरामी अउर भारी बेदनन स पीड़ित रहेन। जेह प दुस्ट आतिमान सवार रहीं जेका मिर्गी आवत रही अउर जउन सुखंडी रहेन, ओनका ओकर पास लिआवइ लागेन। ईसू ओनका चंगा किहेस।

25एह बरे गलील, दिकापुलिस,\* यरूसलेम, यहूदिया अउर यरदन नदी क उ पार मनइयन क भारी भीड़ पाछे पाछे होइ लाग।

### ईसू क उपदेस

(लूका 6:20-23)

5 ईसू जब भारी भीड़ देखेस उ एक पहाड़े प चला गवा। हुवाँ उ बैठि गवा अउर ओकर चेलन ओकरे नगिचे आएन। 2तबहिँ ईसू उपदेस देत भवा कहेस:

3“धन्य अहई उ पचे जउन दीन अहई, काहेकि सरगे क राज्य अहइ ओनके बरे।

4धन्य अहई उ सबइ जउन सोक करत हीं काहेकि परमेस्सर ओनका धीरज बाँधावत ह।

**दिकापुलिस** यूनानी भाखा में कहा जात ह, जेकर अरथ अहइ दस सहर।

5धन्य अहई उ सबइ जउन नम्र अहई काहेकि इ धरती ओनही क अहइ।

6धन्य अहई उ सबइ जउन नीति क बरे भूखा अउर पियासा जउन रहत ही। काहेकि परमेस्सर ओनका संतोस देइ, अउर तृप्ति देइ।

7धन्य अहई जउन दयालु अहई काहेकि ओन पइ अकास स दया बरसी।

8धन्य अहई जउन हिरदय स सुद्ध अहई काहेकि उ सबइ परमेस्सर क दरसन करिहीं।

9धन्य अहई जउन सान्ति बरे काम काज करत हीं काहेकि उ सबइ परमेस्सर क पूत कहा जइहीं।

10धन्य अहई जउन धर्म क कारण सतावा जात हीं काहेकि सरगे क राज्य ओनही क अहइ।

11“अउर तू पचे धन्य अहा काहेकि जब लोग तोहका पचन्क बेज्जत करई, तोहका पचन्क सतावई अउर मोरे बरे तोहरे खिलाफ सब प्रकार क झूठी बातन कहई बस एह बरे तू सबइ मोर मनवइया अहा। 12तब तू सबइ खुस रह्या, आनन्द में रह्या, काहेकि सरगे में तोहका पचन्क एकरे बरे अच्छा होई। इ वइसे ही बाटइ जइसे तोहरे पहिले क नबियन क मनइयन सताएन ह।

### तू नोन क नाई अहा, तू प्रकास क नाई अहा

(मरकुस 9:50; लूका 14:34-35)

13“तू सबइ समुच्चइ मानवता बरे नमक अहा। मुला जदि नोन नोनखार न होइ तउ ओका फिन नोन कइसे बनाइ जाइ सकत ह। उ फिन कउनो कामे क न रही। सिरिफ एह बरे कि ओका मनई क गोड़वा तले फेंक दीन्ह जाइ।

14“तू संसार क प्रकास अहा। एक तु अइसा सहर जउन पहाड़े क चोटी प बसा अहइ, उ छिपाए स छिप नाहीं सकत। 15लोग दिया बारि के ओका बाल्टी तले नाहीं रखतेन मुला ओका डीबट प धइ देत हीं। अउर उ घरे क सब मनइयन क प्रकास देत ह। 16मनई क समन्वा तोहार प्रकास अइसा चमकइ कि उ पचे तोहरे नीक कामन्क निहारई अउर सरगे में बइठा भवा तोहरे परमपिता क महिमा बखानइ।”

### ईसू अउर पवित्तर धरम सास्तर

17“इ जिन सोचा कि मई मूसा क व्यवस्था या नबियन क लिखा भवा क नस्ट करइ आइ हउँ। मई ओन सबन्क नस्ट करइ नाहीं आइ हउँ मुला ओनके पूरा-पूरा अरथ क समझावइ आइ अहउँ। 18मई तोहसे सच कहत हउँ कि जब ताई इ धरती अउर अकास नस्ट नाहीं होइ जातेन, व्यवस्था क एक एक सब्द अउर एक एक अच्छर बना रही, उ तब ताई बना रही जब ताई उ पूरा नाहीं होइ जात। 19एह बरे जउन एन हुकुमन स इ छोटवार स छोटवार हुकुमन क तोड़त ह अउर लोगन्क वइसा ही करइ सिखावत ह, उ सरगे क राज्य में कउनो का बड़कई न पाई। मुला जउन ओह पइ चलत ह अउ दूसरन मनइयन क ओनपइ चलइ क उपदेस देत ह, उ सरगे क राज्य में बड़का समुझा जाई। 20मई तोहसे सच कहत हउँ कि जब ताई तू पचे

धरमसास्तिरयन अउर फरीसियन क धरम मानइ स अगवा जिन जा, कि तू सरगे क राज्य में घुसइ न पउब्या।

व्यभिचार करत ह। अउर जउन कउनो उ छोड़ी भई स्त्री स बियाह करत ह तउ भी व्यभिचार करत ह।

### किरोध

21“तू पचे सुन चुक्या ह कि हमरे पूर्वजन स कहा गवा रहा, ‘हत्या जिन करा\* अउर जदि कउनो हत्या करत ह तउ ओका अदालत में जवाब दिहे होई।’ 22मुला मई तोहसे कहत हउँ कि जउन मनई आपन भाई प किरोध करी, ओहका भी अदालत में एकरे बरे जवाब दिहे होई। अउर जउन आपन भाइ क बेज्जत करी ओका सबते ऊँच अदालत में जवाब दिहे होई। जदि कउनो आपन भाई स कहइ, ‘अरे जाहिल, मूर्ख तउ नरके क आगी क बीच ओह पइ एका जवाब दिहे होई।’

23“एह बरे जदि तू वेदी प आपन भेंट चढ़ावत ह अउर हुवाँ तोहका याद आइ जाइ कि तोहरे मन में तोहरे भाई खातिर कउनो खिलाफ बात बाटइ 24तउ तू उपासना भेंट क वेदी के सामने छाँड़ि द्या अउर पहिले जाइके आपन भाई स सुलह कइ ल्या अउर फिन आइके भेंट चढ़ावा।

25“जब ताई तू मुददई क संग रास्ता में रहा, झटपट ओसे मेल कइ ल्या। कहूँ अइसा न होइ कि उ तोहका हाकिम स सौप देइ अउर हाकिम तोहका सिपाही क। फिन तू जेल में धाँध दीन्ह जा। 26मई तोहका सच-सच बतावत हउँ कि जब तक तू पाई-पाई क हिसाब न कइ देब्या तब तलक तू जेल स न छूटि पउब्या।

### व्यभिचार

27“तू सुनि लिहा कि इ कहा गवा अहइ, व्यभिचार जिन करा।\* 28मुला मई तोहसे कहत हउँ कि जदि कउनो स्त्री क बुरी निगाह स देखत ह तउ उ आपन मन में पहिले ही ओकरे संग संभोग कइ चुका अहइ। 29यह बरे जदि तोहार दाहिन आँख तोसे पाप करवावइ तउ ओका निकारि क फेंक द्या। काहेकि तेरे बरे इ नीक बाटइ कि तोहरे बदन क एक तु अंग नस्ट होइ जाइ एकरे बजाय तोहार सारा बदन नरक में नाइ दीन्ह जाइ। 30अउ जदि तोहार दाहिन हाथ तोहसे पाप करवावइ तउ ओका काटिके फेंकि डारा। काहेकि तोहरे बरे इ नीक अहइ कि तोहरे बदन क एक अंग नस्ट होइ जाइ बजाए कि तोहार समूचा बदन नरक में जाइ।

### तलाक

(मत्ती 19:9 मरकुस 10:11-12 लूका 16:18)

31“कहा गवा अहइ, ‘जबहि कउनो आपन पत्नी क तलाक देत ह तउ आपन पत्नी क लिखिके तलाक देइ चाही।’\* 32मुला मई तोहसे कहत हउँ कि हर मनई जउन आपन पत्नी क तलाक देत ह, जदि उ तलाक ओकरे व्यभिचारी कइ क कारण नाहीं दिहेस तउ जब उ पत्नी दूसरा बियाह करत ह, तउ समुझ ल्या कि उ मनई ओसे

### सपथ

33“तू सबइ इहउ सुन्या ह क हमरे पूर्वजन स कहा गवा रहा, ‘तू सपथ जिन तोड़ा मुला पभूँ स कीन्ह सपथन पूरा करा।’\* 34मुला मई तू सबन स कहत हउँ सपथ जिन ल्या। सरगे क सपथ जिन खा काहेकि उ परमेस्सर क सिंहासन अहइ।’ 35धरती की सपथ जिन खा काहेकि उ ओकरे गोड़वा क चौकी बाटइ। यरूसलेम क सपथ जिन खा काहेकि इ महाराजाधिराजा क सहर बाटइ। 36आपन मूँड क सपथ जिन खा, काहेकि तू एक ठू बरे तक द सफेद या करिया नाहीं कइ सकल्या। 37जदि तू हौँ चाहत ह तउ सिरिफ ‘हौँ’ कहा अउर ना चाहत ह तउ सिरिफ ‘ना’ काहेकि जउन कछूँ ऐसे जिआदा होता अहइ उ दुस्ट (सइतान) स आवत अहइ।

### बदला लेइ क भावना जिन रखा

(लूका 6:29-30)

38तू पचे सुन्या ह कि कहा बाटइ, ‘आँखी क बदले आँखी अउर दाँत बदले दाँत’\* 39मुला मई तोहसे कहत हउँ कि कउनो बुरा मनई क विरोध जिन करा। मुला कउनो तोहरे दाहिन गाले प थप्पड़ लगावइ तउ दूसर गाले क ओकरे कइँती घुमाइ द्या। 40जदि कउनो तोह प मुकदमा चलाइ के तोहार कुर्ता उतरवावइ चाहइ तउ तू ओका आपन चोगा तलक दइ द्या। 41जदि कउनो तोहका बेगार में एक मील चलावइ तउ तू ओकरे संग दुइ मील जा। 42जदि कउनो तोसे कछूँ माँगइ तउ ओका उ दइ द्या। जउन तोसे उधार लेइ चाहइ, ओका मना जिन करा।

### सबते पिरेम राख

(लूका 6:27-28,32-36)

43“तू पचे सुन्या ह कि कहा गा बाटइ, ‘तू आपन पड़ोसी स पिरेम करा\* अउर दुस्मन स घिना करा।’ 44मुला मई कहत हउँ आपन दुस्मन स भी पिरेम करा। जउन तोहका सतावत हीं, ओनके बरे भी पराथना करा। 45काहेकि सरगे में बसइया आपन परामपिता क संतान होइ सका। उ सूरज क प्रकास बुरा अउर भला सब पइ चमकावत ह। उ पापी अउर धर्मी सब पइ बसकाला में पानी बरसावत ह। 46इ मई यह बरे कहत हउँ कि जदि तू ओनही स पिरेम करब्या जउन तोहसे पिरेम करत हीं तउ तोहका का फल मिली? का अइसा तउ चुंगी (टैक्स) क उगाहिया\* भी नाहीं करतन? 47जदि तू आपन मीतन क बरे नीक बाट्या तउ

‘तू ... करा’: लैव्य. 19:12; गनती. 30:2; व्यवस्था. 23:21

‘आँखी ... दाँत’ निर्ग. 21:24; लैव्य. 24:20

‘तू पचे ... करा’ लैव्य. 19:18

चुंगी क उगाहिय रोम क जरिया किराये प खरीदा भवा यहूदी जउन चुंगी क उगाही करत रहेन। उ पचे कबहुँ कबहुँ धोखा दिहन अउ दूसर यहूदी ओनसे घिना करत रहेन।

हत्या जिन करा निर्ग. 20:13; व्यवस्था. 5:17

व्यभिचार जिन करा: निर्ग. 20:14 व्यवस्था. 5:18

‘जबहि ... चाहीं’ व्यवस्था. 24:1

दूसर मनई स नीक नाहीं बाट्या। का अइसा विधर्मी भी नाहीं करतेन? 48यह बरे आपन में परिपूर्ण बना जइसे तोहार सरगे क परमपिता परिपूर्ण बाटइ।

### ईसू दान उपदेस देत ह

6“होसियार रहा! अउ परमेस्सर चाहत ह कि उ सब काम काजन्क मनई क समन्वा दिखावा जिन करा। नाहीं तउ तू आपन परमपिता स फल न पउब्या जउन सरगे में बाटइ।

2“एह बरे जब तू कउनो दीन दुखिया क दान दच्छिना देत ह तउ ओकर ढिंढोरवा पीटा जिन। जइसा कि आराधनालयन में अउर गलियन में कपटी मनई औरन स बड़कइ पावई बरे करत हीं। मई तोसे सच कहत हउँ कि ओनका तउ ऐंकर पूर-पूर फल पहिले ही दीन्ह जाइ गवा अहइ। 3मुला जबहिं तू कउनो दीन दुखिया क देत ह तउ तोहार बावों हाथ न जान पावइ कि तोहार दाहिन हाथ का करत बाटइ? 4काहेकि तोहार दान गुपुत रहइ। तोहार उ परमपिता जउन छिपाइ क करत ह, तोहका ओकरे बदले में फल देई।

### पराथना क महत्व

(लूका 11:2-4)

5“जब तू पराथना करा तउ कपटी क नाई जिन करा। काहेकि उ पचे आराधनालयन में अउर गलियन क नुक्कड़ प खड़ा होइ क पराथना करइ चाहत हीं। जैसे मनइयन ओनका निहार सकईं। मई तोसे सच सच कहत हउँ कि ओनका तउ ओकरे बदले में फल पहिले ही मिल चुका बाटइ। 6मुला जब तू पराथना करा, आपन कोठरी में चला जा अउर फटकवा बंद कइके परमपिता स पराथना करा। फिन तोहार परमपिता जउन तोहार करम क छिपिके निहारत ह, तोहका ओनके बदले फल देई।

7“जब तू पराथना करत रहा, तउ विधर्मी क नाई फिजूल बातन क यों ही बार बार जिन दोहरावा। उ सबइ इ सोचत हीं कि ओनके बहोत बोले स ओनकइ सुनि लीन्ह जाई। 8यह बरे ओनके जइसा जिन होइ जा काहेकि तोहरे परमपिता तोहारे माँगइ स पहिले जानत ह कि तोहार का जरूरत अहइ। 9यह बेर इ प्रकार पराथना करा:

‘सरग में रहइ वाले हमारे परमपिता, पवित्तर अहइ तोहार नाँउ

10जग में तोहार राज्य आवइ जउन चाहा तू वइसे पूर होइ इ धरती प जइसे पूर होत रहता तोहार इच्छा सदा सगर में।

11आज तू हमका दिन भर क खइया द्या

12हमार पापन क छमा करा जइसे हम छमा कीन्ह आपन अपराधिनक।

13जिन ल्या कठिन परिच्छा भारी हमका ओसे बचावा जउ उन दुस्ट (सइतान) स अहइ।’\*

14यह बरे जदि तू लोगन्क अपराधे क छमा करब्या तउ तोहार सरगे क परमपिता भी तोहरे पाप छमा करी। 15मुला अगर तू लोगन्क छमा न करब्या तउ तोहार सरगे क परमपिता भी तोहरे पापन्क छमा न करी।

### उपवास क अरथ

16“जब तू उपवास राखा तउ कपटी क नाई दुःखी मुँह बनाइके जिन रहा। काहेकि उ पचे तरह तरह स मुँह बिसवत हीं ताकि लोगन्क इ मालूम होइ जाइ कि उ सबइ उपवास करत अहइ। मई तोहसे सच कहत हउँ कि ओनका तउ बदले में फल मिलि चुका अहइ। 17मुला जब तू उपवास राखा तउ आपन मूँड़ प जैतून क तेल लगावा अउर आपन मुँहना धोवा। 18जेसे लोग इ न भौंप सकईं कि तू उपवास करत अहा। मुला तोहार परमपिता जेका तू निहार नाहीं सकत्या देखइ कि तू उपवास करत अहा। तबहिं तोहार परमपिता जउन तोहरे छमा भवा कामे क देखत रहत ह, उ तोहका ओकरे बदले में फल देई।

### परमेस्सर धने स बड़वार अहइ

(लूका 12:33-34; 11:34-36; 16:13)

19“आपन बरे धरती प भंडारा जिन भरा। काहेकि ओका किरवा अउर जंग नास कइ देइहीं। चोर सेंध लगइहीं अउर चोराय लइ जइहीं। 20बजाए ऐंकरे सरग में भंडारा भरा। हुवों किरवा अउर जंग नास न कइ पइहीं। अउर चोर भी हुवों सेंधिया लगाइके नास न कइ पइहीं। 21याद रखा जहाँ तोहार भंडार होई, हुँवई तोहार जिअरा लागी।

22“देह बरे प्रकास क सोत आँखी अहइ। एह बरे तोहार आँखी नीक अहइ तउ तोहार देह प्रकास करत रही। 23मुला जदि तोहार आँखी खराब होइ जाइ तउ तोहार सब देह अँधियर होइ जाइ। यह बरे उ सिरिफ प्रकास जउन तोहरे भीतर अहइ जदि अँधियर होइ जाइ तउ उ केतना गहिर होई।

24कउनो भी साथ साथ दुइ सुआमी क नउकर नाहीं होइ सकत काहेकि उ एक स तउ उ घिना करी अउर दूसर स पिरेम। या एक बरे उ न्यौछावर करी अउर दूसरे क धिक्कारी। तू धन अउर परमेस्सर दुइनउँ क सेवा नाहीं कइ पउब्या।

### चिंता तजि द्या

(लूका 12:22-34)

25“यह बरे मई तोहसे सच कहत हउँ कि अपने जिअइ बरे खाइ पिअइ क चिंता तजि द्या। आपन तने क ओढ़ना क फिकिर जिन करा। सचमुच जिन्नगी खइया स अउर तने क ओढ़ना स जिआदा बड़कई क अहइ। 26लखा! अकासे क पंछी न तउ बोआई करत हीं अउर न कटाई, न ही उ पचे कोठिला में अनाज भरि देत हीं मुला तोहार स्वर्गीय पिता ओनकइ भी पेटवा भरत ह। का तू ओनसे जिआदा बड़कवा नाहीं बाट्या!? 27तू सबन में का कउनो अइसा अहइ कि फिकिर कइके आपन जिन्नगी में एक घड़ी भी अउ बढ़ाइ सकत ह?

पद 13 कछु यूनानी प्रतियन में यह भाग जोड़ी गइ अहइ: “काहेकि राज्य अउ महिमा सदा तोहरी अहइ। आमीन।”

28“अउ तू आपन ओढ़ना क बरे में काहे सोचत ह? सोचा, जंगले क फूलन क बारे में कि उ सबइ कइसे खिल जात हीं? उ सबइ न कउनो काम करत हीं अउर न आपन बरे ओढ़ना बनावत हीं। 29यह बरे मई तोहसे कहत हउँ कि सुलैमान भी आपन समूची धन दौलत क संग ओहमा स कउनो एक नाई नहीं सज सका। 30तउ जउन जंगली पौधा जउन आज जिअत अहई मुला जेनका भियान भारे में झोंक दीन्ह जाब अहइ, परमेस्सर अइसा ओढ़ना पहिरावत ह तउ अल्प बिसवास क करवइया मनइयो! का उ तोहका अउर जिआदा बढ़िया ओढ़ना न पहिराई?

31यह बरे चिंता करत करत इ जिन कहा, ‘हम का खाबइ’ या ‘हम का पिअब’ या ‘का पहिरब?’ 32मनई जउन परमेस्सर क नहीं जनतेन इ सब चीजन्क पाछे दौड़त रहत हीं मुला सरग क बसइया तोहार परमपिता जानत ह कि तोहका इ सब चीजन्क जरूरत अहइ। 33यह बरे सब ते पहिले परमेस्सर क राज्य अउर तोहसे जउन धरम की खोज उ चाहत ह, ओकर फिकिर करा। इ सब चीजन तउ तोहका खुद ही घेलइया में दइ दीन्ह जइहीं। 34भियान क फिकिर जिन करा, काहेकि भियान क तउ अउर आपन चिंता होइहीं। हर दिन क आपन आपन परेसानी होत रहत ह।

### ईसू क बचन दूसर क दोखी ठहरावइ बरे

(लूका 6:37-38, 41-42)

7 “दूसर प दोख लगावइ क आदत जिन डावा काहेकि तोहरे प दोख न लगावा जाइ। 2काहेकि तोहार निआव उहइ फैसला प टिका होई, जउन फैसला तू दूसर क निआव प दिहे रहा अउर परमेस्सर तोहका उहइ नपना स नापी जउने नपना स तू दूसर क नाप्या ह।

3“तू आपन भाई बंद क आँखी क किरकरी तक क काहे लखत ह? जब कि तोहका आपन आँखी क लट्ठा तलक नहीं देखाइ पड़त? 4जबहिं तोहरे आँखी में लट्ठा बाटइ तब तू आपन भाई स कइसे कहि सकत ह, “तू मोका तोहरी आँखी क किरकरी निकारइ दिया।” 5अरे कपटी! पहिले आपन आँखी क लट्ठा निकार, फिन तू नीक नीक देख पउब्या अउर आपन भाई क आँखी क किरकरी निकार पउब्या।

6“कूकुरन क पवित्तर चीज जिन द्या अउर सुअसन क अगवा मोती जिन बिखरावा। नहीं तउ उ पचे आपन गोड़ी क तले रौदिहई अउर कूकुरन पलटि क तोहरे ऊपर चढ़ि बैठीहीं।

### जउन तू चाहत ह परमेस्सर स पराथना करत रहा

(लूका 11:9-13)

7“परमेस्सर स माँगत रहा, तोहका दीन्ह जाइ। खोजत रहा, तोहका मिली। खटखटावत रहा, तोहरे बरे दरवाजा खोलि दीन्ह जाई। 8काहेकि हर कउनो जउन माँगत ह, पावत ह। जउन दूँदत ह, पावत ह। जउन न खटखटावत रहत ह ओकर बरे दरवाजा खोलि दीन्ह जाई। 9तू सबन में स अइसा बाप कउन सा अहइ जेकर बेटवा रोटी माँगइ अउर उ बेटवा क पाथर देइ? 10या जब उ मछरी माँगइ

तउ उ ओका साँप दइ देइ। बतावा का कउनो देई? अइसा कउनो न करी। 11एह बरे चाहे तू बुरा काहे न हवा, जानत ह कि आपन गदेलन क नीक भेंट कइसे दीन्ह जात ही। वइसे हीं सचमुच सरगे क बसइया तोहार परमपिता माँगइवालन क नीक नीक चीचन्क जरूर देइ।

### नेम धरम क सबते बड़ी उपदेस

12“एह बरे जइसा बेवहार आपन बरे तू दूसर लोगन्स चाहत ह, वइसा बेवहार तू भी ओनसे करा। यही मूसा क व्यवस्था अउर नबियन दुआरा बतावा गवा बा।

### सरग अउर नरक क राह

(लूका 13:24)

13“सँकरे राह स घुसा! इ मई तोहका यह बरे कहत हउँ काहेकि चौड़ा दुआर अउर बड़की राह तउ बिनासे कइँती लइ जात ह। बहोत स मनई उ राहे प चलत हीं। 14मुला केतौना सँकरा अहइ उ दुआर अउर केतौना छोटकी अहइ उ राह जउन जिन्नगी कइँती लइ जात ही अउर कठिन अहई उ सबइ मनइयन जउन ओका पावत अहई।

### करम ही बतावत हीं कि कउन कइसा अहइ

(लूका 6:43-44; 13:25-27)

15“झूठे नबियन स होसियार रहा। उ पचे तोहरे लगे निर्छल भेड़िन क भेस में आवत हीं मुला भीतर उ सबइ खूँखार बड़का कूकुर होत हीं। 16तू ओनके करमन क फल स पहिचान लेब्या। कउनो कँटेहरी झाड़ी स न तउ अंगूर एकट्ठा कइ पावत ही अउ न गोखरू स अंजीर। 17अइसे ही बढ़िया बिरवा प नीक फल लागत हीं मुला बेकार बिरवा प बेकार फल लागत हीं। 18एक नीक बिरवा बुरे फल नहीं पड़दा करत अउर न कउनो बेकार बिरवा नीक फल पड़दा कइ सकत ह। 19हर उ बिरवा जेह प नीक फल नहीं लगतेन, ओका काटि के आगी में झोकि दीन्ह जात ह। 20एह बरे मई तू सबन क दुबारा कहत हउँ कि उ लोगन क तू ओनके करमन क फले स पहिचान लेब्या।

21“‘पभूँ पभूँ कहइवाला हर मनई सरगे क राज्य में घुस न पाई मुला उहइ सरग जउन सरगे में बसा अहइ मोरे परमपिता क इच्छा प चलत ह उहइ ओहमाँ घुसि पाई। 22उ आखिरी दिना में बहोत स मनई मोसे पुछिहीं, ‘पभूँ! पभूँ! का हम तोहरे नाउँ स भविस्सबाणी नहीं कीन्ह? का तोहरे नाउँ स हम सबन दुस्ट आतिमन क नहीं निकारा अउर का हम पचे तोहरे नाउँ स अद्भुत कारजन नहीं कीन्ह? 23तबहिं मई ओनसे साफ साफ कहियउँ कि मई तू सबन्क नहीं जानत हउँ, ‘हे कुकरमी महइयो! हियौं स भागि जा।’

### एक तु बुद्धिमान अउर एक मूर्ख

(लूका 6:47-49)

24“यह बरे जउन मोर सब्दन क सुनत ह अउर उ एन प चलत ह ओकर तुलना उ बुद्धिमान स कीन्ह जाई जउन आपन घर चट्टाने प बनएस। 25बरखा भइ, बाढ़ आइ,

आँधी चली अउइ सबई उ घरे स टक्कराइ गएन, मुला घर गिरा नाहीं। काहेकि ओकर नैव चट्टाने प घरि गइ रही। 26मुला उ जउन मोरे सब्दन क सुनत ह मुला ओन प चलत नाहीं, उ मूर्ख मनई क नाई अहइ जउन आपन घर रते प बनाएस। 27बरखा भइ, बाढ़ आइ अउर आँधी चली अउर उ घरे स टक्कराइ गएन, जेहसे उ घर आवाज कइके समूचइ गिर गवा।”

28नतीजा इ भवा कि जबहि ईसू इ बतियन क कहिके पूरी किहेस, तउ ओकरे उपदेसन प भीड़ क लोगन क अचरज भवा। 29काहेकि उ धरम सास्तिरियन क नाई नाहीं मुला एक अधिकारी क नाई उपदेस देत रहा।

### ईसू क कोढ़ी क चंगा करब

(मरकुस 1:40-45; 5:12-16)

8 ईसू जबहि पर्वते स खाली उतरा तउ बहोत बड़ी मनइयन क भीड़ ओकरे पाछे होइ चली। 2हुँवई एक कोढ़ी भी रहा। उ ईसू क लगे आइ अउर निहुरिके बोला, “पभू, जदि तू चाहा तउ मोका चंगा कइ सकत ह।”

3एह प ईसू आपन हथवा बढ़ाइके कोढ़ी क छुएस अउर कहेस, “मई चाहत हउँ; चंगा होइ जा!” अउर फउरन कोढ़ी क कोढ़ पराइ गवा। 4फिन ईसू ओसे कहेस, “देखा ऐंकरे बारे में कउनो स कछू जिन कह्या। मुला याजक क लगे जाइके ओका आपन क देखावा। फिन मूसा क हुकुम क मुताबिक भेंट चढ़ावा जैसे लोगन्क तोहरे चंगा होइ क साच्छी मिलि जाइ।”

### ईसू फऊजी नायक क नउकर क चंगा किहेस

(लूका 7:1-10; यूहन्ना 4:43-54)

5फिन ईसू जब कफरनहूम गवा, तउ एक फऊजी नायक ओकरे नगिचे आवा अउर ओसे मदद बरे बिनती करत बोला, 6“पभू, मोर एक सेवक मोरे घरवाँ में बिछउना प ओलरा बाटइ। ओका लकवा मारे बाटइ। ओका बहोत दर्द होत अहइ।” 7तबहि ईसू फऊजी नायक स कहेस, “मई आइके ओका चंगा करिहउँ।”

8फऊजी नायक जवाब दिहेस, “पभू, मई इ जोगग नाहीं हउँ कि तू मोरे घर में आवा। यह बरे हुकुम दइ द्या। बस मोर नउकर चंगा होइ जाई। 9इ मई जानत हउँ कि मई एक बड़का अधिकारी क नीचे काम करत अहउँ अउर मोरे नीचे दूसर सिपाही अहइ। जबहि मई एक ठु सिपाही स कहत हउँ, ‘जा’ तउ उ चला जात ह अउर दूसर सिपाही स कहत हउँ, ‘आ’ तउ उ आइ जात ह। मई आपन सेवक स कहत हउँ, ‘इ करा’ तउ उ ओका करत ह।”

10जब ईसू इ सुनेस तउ उ अचरजे में पड़ि गवा। जउन मनइयन ओकरे पाछे पाछे आवत रहेन ईसू ओनसे कहेस, “मई तोहसे सच कहत हउँ मई ऐतना गहरा बिसवास इस्त्राएल में भी कउनो में नाहीं पाएँ। 11मई तोहका इ अउ बतावत हउँ कि, बहोत स पूरब अउर पच्छिम स अइहीं अउर उ सबइ भोजे में इब्राहीम, इसहाक अउर याकूब क संग सरगे क राज्य में आपन आपन ठउर प बैठ जइहीं। 12मुला राज्य क आदिम प्रजा बाहेर आँधियारे में ढकेल दीन्ह

जाई जहाँ उ पचे चिचियाइके नरियाइके दौत पीसत रइहीं।” 13तब ईसू उ फऊजी नायक स कहेस, “जा वइसा ही तोहरे बरे होइ जइसा तोहार बिसवास अहइ।” अउर ओकर नउकर फउरन चंगा होइ गवा।

### ईसू बहोतन क चंगा किहेस

(मरकुस 1:29-34; लूका 4:38-41)

14जब ईसू पतरस क घरे पहुँच गवा, उ ओकरे सास क बुखार स दुखी बिछउना प ओलरी देखेस। 15तब ईसू ओका आपन हथवा स छुएस अउर ओकर बुखार उतर गवा। फिन उ उठी अउर ईसू क सेवा करय लाग।

16जइसे सौँझ होइ गइ तउ लोग ओकरे नगिचे बहोतन मनइयन क लइ आएन जेहमँ दुस्ट आतिमन रहत रहीं। आपन एक ही हुकुम स उ दुस्ट आतिमन क निकारि दिहस। इ तरह स उ सबइ बेरमियन क नीक कइ दिहस। 17इ यह बरे भवा कि परमेस्सर नबी यसायाह स जउन कछू कहेस, उ पूरा होइ जाइ:

“उ हमरे बेरमियन क लइ लिहस अउर हमरे संतापे क ओढ़ लिहस।”

यसायाह 53:4

### ईसू क मनवइया बनइ क ललक

(लूका 9:57-62)

18जब ईसू आपन चारिहुँ कइँती भीड़ देखेस तउ उ आपन चलन क हुकुम दिहेस कि उ सबइ झिलिया क ओह पार किनारे चलई। 19तब एक धरम सास्तरी ईसू क निअरे आवा अउर कहेस, “गुरु, जहाँ तहँ तू जाब्या, मई तोहरे पाछे चलब।”

20एह प ईसू ओसे कहेस, “लोखरी क बिल अउर अकास क पंछीयन क घोंसला होत हीं मुला मनई क पूत\* क लगे मूँड़ टेकावइ क कउनो ठउर नाहीं।”

21ओकर चलन में स एक ठु ईसू स कहेस, “पभू, मोका पहिले जाइके आपन पिता क गाइइ क हुकुम द्या।”

22मुला ईसू ओसे कहेस, “मोरे पाछे चला आवा अउर मरा भवा मुर्दन क आपन खुद गाइइ द्या।”

### ईसू तूफान क सांत किहेस

(मरकुस 4:35-41; लूका 8:22-25)

23तब ईसू एक नाउ प बइठि गवा। ओकर चलन भी पाछे पाछे गएन। 24उहइ समइया झील में ऐतना भयंकर तूफान उठि गवा कि नाउ लहरन स दबी जात रही पर ईसू सोवत रहा। 25तबहि ओकर चलन ओकरे लगे पहुँचैन अउर ओका जगाइके कहेन, “पभू, हमार रच्छा करा। हम पचे मरि जाब!”

26तबहि ईसू ओमसे कहेस, “अरे कम बिसवास करइवालोलो। तू पचे काहे ऐतना भयभीत अहा?” तब उ खड़ा होइके तूफान अउर झिलिया क डाटेस अउर चारिहुँ कइँती सांति छाइ गइ।

**मनई क पूत** ईसू परमेस्सर क पूत रहा। दानि. 7:13-14 में इ मसीह क नाउँ अहइ जेका परमेस्सर मनइयन क उद्धार करइ बरे चुने रहा।

27मनइयन अचरजे में पड़ि गएन। उ सबइ कहेन, “इ कइसा मनई बाटइ? अंधइ तूफान अउर झिलिया तक ऐंकर बतिया मानत हीं!”

गएन अउर परमेस्सर क गुन गावइ लागेन जउन मनई क अइसी सकती दिहेस।

### दुइ मनई क दुस्ट आतिमन स छूटि जाब

(मरकुस 5:1-20; लूका 8:26-39)

28जब ईसू झील क उ पार, गदरेनियोन क देस पहुँच गवा, तउ ओका कब्रन स निकरि के दुइ मनई आवत भए मिलेन, जेहमें दुस्ट आतिमन रहिन। उ पचे ऐतना खौफनाक रहेन कि उ रस्ता स कउनो निकरि तक नाहीं सकत रहा। 29उ पचे चिचियानेन, “हे परमेस्सर क पूत! तू मोसे का चाहत बाटया? का तू हियाँ ठीक समइ स पहिले हमका दंड देइ आइ अहा?”

30हुवाँ तनिक दूरी प बहोत स सुअरन क झुंड चरत रहा। 31तउ उ दुस्ट आतिमन ओसे बिनती करत भए कहेन, “जदि तोहका हम पचन क बाहेर निकारब ही बाटइ, तउ हमका सुअरन क झुंडे में पठइ द्या।”

32तउ ईसू ओनसे कहेस, “चला जा!” तब उ सबइ ओन मनइयन में स बाहेर निकरि आइन अउर सुअरन में घुसि गइन। फिन समूचा झुंड ढलाने स लुढ़कत पुढ़कत पराइके ढालू किनारे स झिलिया में गिरि गवा अउ सबहिं सुअरन पानी में बूड़िके मर गएन। 33सुअरन क झुंड क रखवालन भागत भागत हुआँ स सहर आएन अउर सुअरन क साथ तथा दुस्ट आतिमन स ग्रस्त ओन मनइयन क साथ जउन कछू भवा, कहिके सुनाएन। 34फिन तउ सहर क सबइ मनइयन ईसू स भेंटइ बरे निकर पड़ेन। जब उ पचे ईसू क देखेन तउ ओसे बिनती किहेन कि उ ओनके हियाँ स कहूँ अउर उउर चला जाइ।

### लकुआ क मरीज क चंगा करब

(मरकुस 2:1-12; लूका 5:17-26)

9फिन ईसू एक नाउ प चढ़ा अउर झिलिया क पार आपन सहर आइ गवा। 2मनइयन लकुआ क मरीजे क खटिया प ओलराइके ओकरे नगिचे लइ आएन। ईसू जबहि ओकरे बिसवास क देखेस तउ लकुआ क रोगी स कहेस, “हे बालक ढाढ़स रखा। तोहार पापनक छमा कीन्ह गवा।” 3तबहि कछू यहूदी धरम सास्तिरियन आपस में कहइ लागेन, “इ मनई (ईसू) अपने सब्दन स परमेस्सर क बेज्जत करत ह।”

4ईसू जानत रहा कि उ पचे का सोचत विचारत अहइँ; ईसू ओनसे बोला, “तू सब आपन मन में काहे बुरा बिचार आवइ देत ह? 5जिआदा सहल का बाटइ? इ कहब, ‘तोहार पापनक छमा कीन्ह गवा।’ या इ कहब ‘खड़ा हवा अउर चलि पड़ा?’ 6काहेकि तू सब इ जान पावा कि धरती प पापनक छमा करइ क सकती मनई क पूत में अहइ।” ईसू लकुआ क रोगी स कहेस, “खड़ा हवा, आपन बिछउना उठावा अउ घरे चला जा।” 7उ लकुआ क मरीज खड़ा होइके आपन घर चला गवा। 8जबहि भीड़े में मनइयन इ निहारेन कि तउ उ सबइ गहरी भक्ती स अचरजे में पड़ि

### ईसू क मत्ती क चुनब

(मरकुस 2:13-17; लूका 5:27-32)

9ईसू जब हुआँ स जात रहा तउ उ महसूले क चुंगी क चौकी प बइठा भवा एक मनई क देखेस। ओकर नाउँ मत्ती रहा। ईसू ओसे कहेस, “मोरे पाछे चला आवा।” एँह प मत्ती खड़ा भवा अउर ओकरे पाछे होइ गवा।

10अइसा भवा कि जब ईसू मत्ती क घर बहोत स चुंगी उगहियन अउर पापी मनइयन क संग आपन मनवइयन क साथ लइके जैवत रहा। 11तउ ओका फरीसियन देखेन अउर ओनके चलन स पूछइ लागेन, “तोहार गुरु चुंगी क उगहिया अउर बुरा मनइयन क संग खइया के काहेखात ह?”

12इ सुनिके ईसू ओनसे कहेस, “हिदठ पुदठ मनई क नाहीं मुला बेरमियन क एक बैद्य (डाक्टर) क जरूरत होत ह। 13एह बरे तू सबइ जा अउर समझा कि सास्त्रे क बचन क अरथ का अहइ? ‘मईँ बलिदान नाहीं चाहत हउँ मुला दाया चाहता हउँ।’\* मईँ धर्मी क नाहीं मुला पापियन क बुलावइ आइ हउँ।”

### ईसू दूसर यहूदी धर्म नेता स न्यारा

(मरकुस 2:18-22; लूका 5:33-39)

14फिन बपतिस्मा क देवइया यूहन्ना क चलन ईसू क लगे गएन अउर पूछेन, “हम सबइ अउर फरीसियन पुनि पुनि उपवास काहे करत हीं परन्तु तोहार चलन काहे नाहीं करतेन?”

15फिन ईसू ओनका समझाएस, “का दूल्हा क साथी जब ताई दूल्हा ओनके संग अहइ, सोक मनाइ सकत हीं? मुला उ दिनन अइहीं जब दुल्हा ओनसे छीन लीन्ह जाई फिन उ समइया में उ सबइ दुखी होइहीं अउर उपवास करिहीं।

16“बे सिकुड़ा भवा नवा कपरा क पड़बंद पुरान पोसाके प कउनो लगावत नाहीं काहेकि इ पड़बंद पोसाके क अउर जिआदा फाड़ देइ अउ कपरा क खोंच अउर बाढ़ जाई। 17नई दाखरस पुरान मसकन में भरी नाहीं जात। नाहीं तउ मसकन क फोरि देइ अउर दाखरस बहिके फैलि जाई। एह बरे लोग नई दाखरस नई मसकन में भरत हीं जइसे दाखरस अउर मसकन दुइनउँ बचा रहई।”

### मरी लरिक्की क जिन्गी देब अउर

#### बेरमिया स्त्री क चंगा करब

(मरकुस 5:21-43; लूका 8:40-56)

18ईसू ओन मनइयन क जब इ बतिया बतावत रहा, तबहि यहूदी आराधनालय क एक मुखिया ओकरे लगे आवा अउर ओकरे समन्वा निहुरिके बिनती करत भवा बोला, “अबहीं अबहीं मोर बिटिया मरी गइ अहइ। तू चलिके जदि ओह प आपन हाथ रख द्या तउ उ फिन जी जाई।”

19<sup>एँह</sup> प ईसू खड़ा होइके आपन चलन क संग ओकरे साथ चल दिहेस।

20<sup>हुवाँ</sup> एक ठु स्त्री रही जेका बारह बरिस स खून बहत रहा। उ पाछे स ईसू क नगिचे आइ, ओकरे ओढ़ना क मुहरी छुइ लिहस। 21<sup>उ</sup> आपन मनवा मँ सोचत रही, “जदि मई तनिकउ भी एकर ओढ़ना छुइ पावउँ, तउ नीक होबउँ।”

22<sup>घूमिके</sup> निहारत भवा ईसू कहेस, “बिटिया, खुस रहा। तोहार बिसवास तोहका चंगा किहेस ह।” अउर उ स्त्री तुरंतहि उहइ छन चंगा होइ गइ।

23<sup>ओह</sup> कईती ईसू जब आराधनालय क मुखिया क घरवा पहुँचा तउ उ देखेस कि सोक धुन बजावत बाँसुरी क बजवइया अउर हुवाँ एकट्ठा भए मनइयन लरकी क मउत प सोक करत रहेन। 24<sup>तबहि</sup> ईसू लोगन्स कहेस, “हियाँ स बाहरे जा। लरकी मरी नाही बा, उ तउ सोवति अहइ।” एँह प मनई ओकर हँसी ठट्ठा करइ लागेन। 25<sup>फिन</sup> जब भिरिया क मनइयन क बाहरे पठएस तउ ईसू लरकी क कोठरी मँ जाइके ओकर हथवा पकड़ेस अउर उ उठि गइ। 26<sup>एँकर</sup> खबरिया उ समूचइ पहँटा मँ संचर गइ।

### ईसू ढेर मनइयन क चंगा किहेस

27<sup>ईसू</sup> जब हुवाँ स जाइ लाग तउ दुइ आँधर ओकरे पाछे होइ गएन। उ दुइनउँ चिल्लात रहेन, “हे दाऊद क पूत, हम प दया करा।”

28<sup>ईसू</sup> जइसे घरवा क भीतर पहुँच गवा तउ उ पचे आँधर ओकरे लगे आएन। तबहि ईसू ओनसे कहेस, “का तोहका बिसवास अहइ कि मई, तोहका फिन आँखिन दइ सकत हउँ?” उ पचे जवाब दिहेन, “हाँ पभू।”

29<sup>एँह</sup> पर ईसू ओनकइ आँखिन क छुअत कहेस, “तोहरे बरे वइसा होइ जइसा तोहार बिसवास अहइ।” 30<sup>अउर</sup> आँधरन क जोति मिल गइ। फिन ईसू ओनका चिताउनी देत कहेस, “एँकरे बारे मँ कउनो क पता नाही लागइ चाहीं।” 31<sup>मुला</sup> उ पचे हुवाँ स जाइके इ खबरिया क उ पहँटा मँ चारिहुँ कईती फैलाइ दिहन।

32<sup>जब</sup> उ दुइनउँ हुवाँ स जात रहेन तउ कछू लोग ईसू क लगे एक ठु गूंगा क लइ आएन। गूंगा मँ दुस्ट आतिमा क सवारी रही अउर यह बरे उ कछू बोल नाही पावत रहा। 33<sup>जब</sup> उ दुस्टा आतिमा क निकारि दिहस तउ उ गूंगा, जउन पहिले कछू नाही बोल सकत रहा, बोलइ लाग। तबहि भिरिया क लोग अचरजे मँ कहेन, “इस्त्राएल मँ अइसी घटना कबहुँ नाही देखी गइ।”

34<sup>मुला</sup> फरीसियन कहत रहेन, “उ दुस्ट आतिमन क सइताने क मदद स बाहरे खदेरत ह।”

### ईसू क मनइयन प दुःख

35<sup>ईसू</sup> यहूदी आराधनालयन मँ उपदेस देत, परमेस्सर क राज्य क सुसमाचार क प्रचार करत, मनइयन क बेरामी अउर हर तरह क दारून दुःख हरत उ समूचइ पहँटा क गाउँ गाउँ अउर सहर सहर घूमत रहा। 36<sup>ईसू</sup> जब कउनो भिरिया क देखततउ ओनके बरेकरना स भरिजात काहेकि उ पचे सतावा भवा अउर बेसहारा रहेन, जइसें भेइ रहिन अउ

ओनकइ कउनो गड़रिया नाही रहा। 37<sup>तबहि</sup> ईसू आपन चलन स कहेस, “तइयार खेत तउ बहोत अहई मुला मजदूर कम बाटेन। 38<sup>यह</sup> बरे फसल क परमेस्सर स बिनती करा कि उ, आपन फसल काटइ बरे मजदूर पठवइ।”

### सुसमाचार क प्रचार बरे प्रेरितन क पठउब

(मरकुस 3:13-19; 6:7-13; लूका 6:12-16; 9:1-6)

10<sup>तउ</sup> ईसू आपन बारहु चलन क लगे बोलवाइके ओनका दुस्ट आतिमन क बाहरे खदेरइ, अउर हर तरह क रोगन अउर दारून दुःखन क दूर करइ क सकती दिहेस। 2<sup>उ</sup> सबइ बारहु प्रेरितन क नाउँ इ अहई सबते पहिले समौन, जउन पतरस कहा गवा, अउर ओकर भाई आन्द्रियास, जब्दी क बेटवा याकूब अउर ओकर भाई यूहन्ना। 3<sup>फिलिप्पुस</sup>, बरतुल्मै, थोमा, चुंगी (टिक्स) क उगहिया मत्ती, जल्फै क बेटवा याकूब अउर तदै। 4<sup>समौन</sup> कनानी\* अउर यहूदा इस्करियोती जे ओका धोखा दइके पकड़वाए रहा।

5<sup>ईसू</sup> इन बारहु प्रेरितन क बाहरे पठवत हुकुम दिहेस कि उ सबइ, “गैर यहूदियन क पहँटा मँ न जाई अउर कउनो सामरी सहर मँ न घुसई। 6<sup>मुला</sup> उ सबइ इस्त्राएल क परिवारे क हेराइ गइ भेइन क नगिचे जाई 7<sup>अउर</sup> ओनका उपदेस देई, ‘सरगे क राज्य नगिचे अहइ।’ 8<sup>उ</sup> सबइ बेरमियन क नीक करई, मरे भएन क जिन्नगी देई, कोढ़िन क नीक करई अउर दुस्ट आतिमन क खदेरई। तू सबइ बे कछू देए भए पभू क असीस अउर सकती पाए अहा, एह बरे दूसरउँ क बे कछू लिए अजादी स बाँटा। 9<sup>आपन</sup> बटुआ मँ सोना, चाँदी अउर तौबा जिन रखा। 10<sup>जात्रा</sup> बरे कउनो झोला तक जिन रखा। कइसो फालतू कुर्ता, चप्पल अउर छड़ी जिन ल्या। काहेकि मजदूर क ओकरे खइया प हक अहइ।

11<sup>तू</sup> पचे जब कबहुँ कउनो सहर या गाउँ मँ जा तउ पता करा कि हुवाँ बिसवास क लायक कउन अहइ। फिन तब ताई हुवाँ ठहरि जा जब ताई हुवाँ स चल न द्या। 12<sup>जबहि</sup> तू उ कउनो क घरे मँ जा तउ उ परिवार क मनइयन क मान सम्मान करत कहा, ‘तोहका सांति मिलइ।’ 13<sup>जदि</sup> घरे क मनई सुपात्र होइही तउ तोहार असीस ओनके संग रही अउर जदि ओकरे जोगग नाही होइही तउ तोहार असीस तोहरे लगे लौटि आई। 14<sup>जदि</sup> कउनो तोहार अगवानी न करइ या तोहार बतियन क न सुनइ तउ उ घरवा या सहर क तजि द्या। अउर आपन गोड़वा मँ लागी माटी क हुवैइ झाड़ि द्या। 15<sup>मई</sup> तोहसे सच कहत हउँ कि जब निआव होई तब उ सहर क दसा सदोम अउर अमोरा\* सहरन क दसा कहुँ जिआदा बढ़िया होई।

### आपन प्रेरितन क ईसू क चिताउनी

(मरकुस 13:9-13; लूका 21:120-17)

16<sup>“होसियार!</sup> मई तोहका बिगवन मँ भेइन क नाई बाहरे पठवत अहउँ। कीरा क नाई चालाक अउर कबूतरे क नाई

**कनानी** यहूदी क एक कट्टर राजनीति दल क नाउँ जेकर उ निअंबर होत रहा।

**सदोम अउ अमोरा** दुइ सहरन क पभू ओनके बसइया क पापन क दण्ड बरे नास कइ दिहेस।

भोला बना रहा। 17मनइयन स होसियार रह्या काहेकि उ पचे तोहका बंदी बनाइके यहूदी पंचायत क दइ देइहीं अउर तोहका आपन आराधनालयन में कोड़ा स धुनवइहीं। 18तोहका हुकूमत क सासक अउर राजा क समन्वा हाजिर करिहीं, काहेकि तू सबहीं मोर चलन अहा। तोहका इ औसर दीन्ह जाई कि तू ओनका अउर गैर यहूदियन क मोरे बारे में साच्छी द्या। 19जब उ पचे तोहका धरई तउ फिकिर जिन कर्या कि तोहका का कहइ क बाटइ अउर कइसे कहइ क अहइ। काहेकि उ समइ प तोहका बताइ दीन्ह जाई कि तोहका का कहइ क अहइ। 20याद रखा कि बोलवइया तू नाहीं अहा, मुला तोहरे परमपिता क आतिमा तोहरे भीतर बोली।

21“भाई आपन भाइयन क धरवाइ क मरवइहीं, महतारी बाप आपन गदेलन क पकड़वइहीं अउर बचवन आपन महतारी बाप क खिलाफ होइ जइहीं। उ पचे ओनका मरवाइ देइहीं। 22मोरे नाउँ क कारण मनई तोहसे घिना करिहीं। मुला आखिर तक जउन टिका रही उहइ क उद्धार होई। 23उ सबइ अब तोहका सहर में सतावई तउ तू दूसर सहर में पराइ जाया। मई तोहसे सच सच कहत हउँ अइसे पहिले तू इस्राएल क सबइ ही सहरन क चक्कर लगाइ ल्या, मनई क पूत दुबारा आइ जाई।

24“चेला आपन गुरु ते बड़वार नाहीं होतेन अउर न ही कउनो नउकर आपन मालिक ते बड़वार होत ह। 25चेला क गुरु क नाई होइ मैं अउर नउकरे क मालिक क नाई होइ मैं संतोख करइ चाही। जब उ घरे क मालिक क बेल्लाबुल (सइतान) कहई तउ, ओकरे घरे क दूसर लोगन क संग तउ अउ भी बुरा बेवहार करिहीं!”

### परमेस्सर स डेराअ मनइयन स नाहीं

(लूका 12:2-7)

26“एह बरे ओनसे डेराअ जिन काहेकि जउन छुपी अहइ, सब खुलि जाई। अउर हर चीज जउन छुपी अहइ, परगट होइ जाई। 27मई अँधियारे में जउन कछू तोसे कहत हउँ, मई चाहित ह कि तू उजियारे में कहा। मई जउन कछू तोहरे कनवा में कहेउँ तू ओकरे मकाने क छत्तियापर चढ़िके, एलान करा। 28ओनसे जिन डेराअ, जउन तोहरे देह क नास कइ डइहीं मुला तोहरे आतिमा क नाहीं मारि सकतेन। बस उ परमेस्सर स डेराअ जउन तोहार देह अउर आतिमा क नरके में नाइ के नास कइ सकत ह। 29एक तु पइसा क दुइ चिड़िया बेसहे में स भी एक तोहरे परमपिता क बे जाने भाए अउर ओकर बिना इच्छा स धरती प नाहीं गिर सकत। 30अरे तोहरे मूँडे क एक एक बार तक गिना भवा बाटइ। 31यह बरे डेराअ जिन, तोहार कीमत तउ वइसी बहोत स चिड़ियन ते जिआदा बाटइ।

### ईसू में बिसवास

(लूका 12:8-9)

32“जउन कउनो मोका सब मनइयन क समन्वा अपनाई, मई भी ओका सरगे में बसा आपन परमपिता क समन्वा अपनायाउब। 33मुला जउन कउनो मोका सब मनइयन क

समन्वा न अपनायाई, मई भी ओका आपन परमपिता क समन्वा न अपनायाउब।

### ईसू क अनुसरण तोहार बरे परेसानी लावइ सकत ह

(लूका 12:51-53; 14:26-27)

34“इ जिन सोचा कि मई धरती प सांति लइ आवइ आइ हउँ। सांति नाहीं मुला एक तरवारे क लइ आइ हउँ।

35-36मई तउ, बेटवा क बाप क खिलाफ:

‘बिटिया क महतारी खिलाफ, दुलहिन क सासे क खिलाफ करइ आइ हउँ। मनई क बैरी ओकरे घरे क मनई ही होइहीं।’

मीका 7:6

37“जउन आपन महतारी बाप स मोसे जिआदा पिरेम करत ह, उ मोर होइ क जोगग नाहीं जउन अपने बेटवा अउर बितिया से मोसे जिआदा पिरेम करत ह, उ मोर होइके जोगग नाहीं। 38उ जउन क्रूसे (यातना) उठाइके मोरे पाछे होत नाहीं, मोर होइके जोगग नाहीं। 39उ जउन आपन प्राण बचावा चाहत ह, आपन प्राण खोइ देइ। मुला जउन मोरे बरे आपन प्राण दइ देइ, उ जिन्गी पाई।

### परमेस्सर ओका आसीस देब जउन तोका स्वीकार करी

(मारकुस 9:41)

40जउन तू पचन क अपनावत ह, उ मोका अपनावत ह अउर जउन मोका अपनावत ह, उ उहइ परमेस्सर क अपनावत ह, जउन मोका पठाएस ह। 41जउन कउनो नबी क यह बरे अपनावत ह कि उ नबी अहइ, ओका उहइ ओकरे बदले में फल मिली जउन कि नबी क मिलत ह। अउ जदि तू कउनो धर्मी क यह बरे अगवानी करत ह कि उ धर्मी बाटइ, ओका सच उहइ बदले में फल मिली जउन कउनो धर्मी क मिलत ह। 42अउर जदि कउनो मोर इ भोला भाला चलन में स कउनो एक क एक लोटा ठंडा पानी तक दइ दे कि उ मोर चेला अहइ, तउ मई तोसे सच कहत हउँ कि ओका एँकरे बदले में फल सचमुच बे मिले भाए न रही।”

### ईसू अउर बपतिस्मा क देवइया यूहन्ना

(लूका 7:18-35)

11 अइसा भवा कि ईसू आपन बारहु चलन क इ तरह समझाइके हुवाँ स चला गवा अउर गलील देस क सहरन में उपदेस देत अउर प्रचार करत लाग। 2यूहन्ना जब जेल में मसीह क काम क बारे में सुनेस तउ उ आपन चलन स संदेस पठइके पूछेस, 3“का तू उहइ अहा, जउन आवइवाला रहा या हम पचे कउनो अउर आवइवाला क बाट जोही?”

4ईसू जवाबे में ओनसे कहेस, “जउन कछू तू सबइ सुनत अहा, अउर देखत अहा, जाइके यूहन्ना क बतावा कि, 5अँधेरे क आँखी मिलति अहइ, छूला लगँडा चल पावत अहइ, कोढ़ी चंगा होत अहइ, बहिर सुनत अहइ अउ मुर्दा जिआइ जात अहइ अउर गरीबन में सुसमाचार क प्रचार

कीन्ह जात अहइ। 6उ धन्य अहइ जउन मोका अपनाइ सकत ह।”

7जब यूहन्ना क चलन हुवौ स जात रहेन तउ ईसू भीड़ में यूहन्ना क बारे में कहइ लाग, “तू पचे इ उसरे में का निहारइ आइ अहा? का कउनो सरपत? जउन हवा स उड़ि जात बा। 8नाहीं, तउ फिन का देखइ आइ अहा? का एक मनई? जउन बहोत बढ़िया ओढ़ना पहिरे बा? देखा जउन उत्तिम बस्तर पहिरत हीं, उ सबइ तउ राजा क महले में मिलत हीं। 9तउ तू सबइ का निहारइ आइ अहा? का कउनो नबी? हौं, मई तोहका बतावत हउँ कि जेका तू देख्या ह उ कउनो भी नबी स जिआदा अहइ। 10इ उहइ अहइ जेकरे बारे में पवित्तर सास्तर में लिखा बाटइ:

‘देखा, मई तोहसे पहिले ही आपन दूत पठवत हउँ। उ तोहरे बरे राह बनाई।’  
मलाकी 3:1

11मई तोहसे सच कहत हउँ बपतिस्मा देवइया यूहन्ना त बड़वार कउनो मनई पड़दा नाहीं भवा। फिन भी सरगो क राज्य में छोट त छोट मनई भी यूहन्ना स बड़कवा अहइ। 12बपतिस्मा क देवइया यूहन्ना क समइ स आज तलक सरगो क राज्य खौफनाक हमला झेलत रहा अहइ अउ हिंसा करवइया ओका छीन इ क जतन करत हीं। 13यूहन्ना क आवइ तलक सारे नबियन अउर मूसा क व्यवस्था इ भविस्सबाणी किहेन, 14अउर यदि तुम व्यवस्था अउर नबियन जउन कछू कहइ, ओका स्वीकार करने क तैयार ह तउ जेकरे आने की भविस्सबाणी की गयी थी इ यूहन्ना उहइ एलिय्याह बाटइ। 15जउन सुनि सकत होइ, उ सुनि लेइ!

16“आजु क इ पीढ़ी क तुलना मई कउने स करउँ? उ सबइ बाजारे में बड़ठा भवा ओन गदेलन क नाई अहइँ जउन एक दूसर क नरियाइके कहत रहेन,

17“हम तोहरे बरे बाँसुरी बजावा, मुला तू नाच्या नाहीं।  
हम पचे सोकगीत गावा मुला तू रोया नाहीं।

18बपतिस्मा देवइया यूहन्ना आवा। जउन अउरन क नाई खात रहा अउर न पिअत रहा। मुला लोग कहे रहेन, ‘ओहमा दुस्ट आतिमा समाइ गइ अहइ।’ 19फिन मनई क पूत आवा। जउन अउरन क नाई खात-पिअत ह, मुला मनई कहत हीं, ‘इ मनई क देखा, ई पेटू अहइ, पिअक्कड़ बाटइ। इ चुंगी क उगहिया अउर पापी क मीत अहइ।’ मुला बुद्धि क चमत्कार काम स सिद्ध होइ जात ही।”

### बिसवासी क न करइया क ईसू क चिताउनी

(लूका 10:13-15)

20फिन ईसू ओन नगरन क धिक्कारेस, जेहमों उ ढेर अदभुत कारजन किहेस। काहेकि हुवौ क मनइयन आपन पाप करबँ नाहीं छोड़ें अउर मनफिराव नाहीं करेन। 21ईसू कहेस, “अरे अभगो खुराजीन\* अरे अभगो बैतसैदा जउन अदभुत कारजन तोहमा कीन्ह गएन यदि उ सबइ काम सूर

अउ सैदा में कीन्ह जातेन तउ हुवौ क मनई बहोत पहिले टाट क कपरा\* ओढ़िके सोक बरे अउर देह प राखि लगाइके दुख क परगट करत मनफिराव कइ चुका होतेन। 22मुला मई तू सब लोगन स कहत हउँ कि निआव क दिन सूर अउर सैदा क दसा तोहसे जिआदा सहइ बरे जोगग होई। 23अउर अरे कफरनहूम का तू सोचत ह कि तोहका सरगो क महिमा तलक ऊँचै उठावा जाई? तू तउ अधोलोक में नरक तलक जाब्या। काहेकि जउन अदभुत कारजन तोहमों कीन्ह गएन, यदि उ सबइ सदोम में कीन्ह जातेन तउ उ नगर आज तलक टिका होत। 24मुला मई तोहका बतावत हउँ कि निआव क दिन तोहरे मनइयन क दसा ते सदोन क दसा कहुँ नीक होई।”

### ईसू क अपनियावइ बरे सुख चइन क बचन

(लूका 10:21-22)

25उ समइया प ईसू कहेस, “परमपिता, तू सरग अउर धरती क पभू अहा, मई तोहार गुन गावत हउँ काहेकि तू इन बातन क, ओनमों स जउन गियानी अउर समझदार अहइँ, छुपाइके रखे अहा। अउ जउन भोला भाला अहइँ ओनके बरे परगट किए अहा। 26हौं परमपिता इ यह बरे भवा काहे की तू ही एका अच्छे स जानत अहा। 27मोर परमपिता सब कछू मोका सौप दिहेस अउर असिल में परमपिता क बजाय कउनो भी पूत क नाहींजानत। अउर हर उ मनई परमपिता क जानत ह, जेकरे बरे पूत ओका परगट करइ चाहत ह।

28“अरे, ओ थका माँदा, बोझन स दवान मनइयन मोरे लगे आवा। मई तोहका सुख चइन देब। 29मोर जुआ ल्या अउर आपन उपर धरा। फिन मोसे सीखा काहेकि मई सहल हउँ अउर मोर मनवा कोमल अहइ। तोहका भी आपस बरे सुख-चइन मिली। 30काहेकि उ जुआ जउन मई तोहका देइत ह बहोत सहल बाटइ। अउर उ बोझवा जउन मई तोह पर डारत अही, हल्का बाटइ।”

### कछू यहूदियन ईसू क निन्दा किहेन

(मरकुस 2:23-28; 6:1-5)

12 लगभग उहइ समइया ईसू सबित क दिन अनाजे क खेतन स होइके जात रहा। ओकरे चलन क भूख लाग अउ गोहूँ क बाल तोड़ि क चबाइ लागेन। 2फरीसियन अइसा होत देखिके कहेन, “देख! तोहार चलन उ करत अहइँ जेकर सबित क दिन करब मूसा क व्यवस्था क माफिक नाहीं।”

एँह प ईसू ओनसे पूछेस, “का तू नाहीं पढ़्या कि दाऊद अउर ओकर साथी, जब ओनका भूख लाग, का किहे रहेन? 4उ परमेस्सर क घरे में घुसिके ओनके बरे चढ़ाई गइ पवित्तर रीतिन क कइसे खाए रहेन? तउ भी ओका अउर ओनके साथी संगी क ओकर खाब मूसा क

खुराजीन, बैतसैदा, कफरनहूम गलील झील क किनारे बसा नगर अहइँ जहाँ ईसू उपदेस दिहे रहा।

टाट क कपरा उ दिनन में सोक मनावई बरे मोटा कपरा पहिरत रहेन अउ देह प राख लगावत रहेन।

व्यवस्था क खिलाफ रहा। ओका सिरिफ याजकन ही खाइ सकत रहेन। 5मूसा क व्यवस्था में तू इ नाहीं पढ़या कि सबित क दिन मंदिर क याजक ही असिल में सबित क दिन बिगार देत हीं अउर फिन ओनका कउनो कछू नाहीं कहत। 6मुला मई तोसे कहत हउँ, हियाँ जउन कउनो बाटइ उ मंदिर ते बड़वार बाटइ। 7जदि तू पवित्तर सास्तर में जउन लिखा अहइ, ओका जानत ह, 'मई मनइयन में दाया चाहत हउँ, पसुबलिवान नाहीं तउ तू ओनका दोखी नाहीं\*'

ठहरउत्या जउन निर्दोख अहइँ। 8हाँ, मनई क पूत सबित क दिन क भी सुआमी अहइ।"

### ईसू सुखंडी हाथे क चंगा किहेस

(मरकुस 3:1-6; लूका 6: 6-11)

9फिन उ हुवाँ स चला गवा अउर उनके आराधनालय में पहुँच गवा। 10हुवाँ एक तु मनई रहा, जेकर हाथ सुखंडी रहा। तउ मनइयन ईसू स पूछेन, "मूसा क व्यवस्था क माफिक सबित क दिन का कउनो क नीक करब ठीक अहइ?" उ सबइ एह बरे ओसे पूछेन कि, उ पचे ओह प दोख लगाइ सकईँ।

11मुला उ ओनका जवाब दिहेस, "मान ल्या, तोहमों स कउनो क लगे एक ही भेड़ बाटइ, अउर उ भेड़ सबित क दिन कउनो गड़हा में गिरि जात ही, तउ तू का ओका बाहेर न निकरब्या? 12सच मनई तउ एक भेड़े स जिआदा बढ़के अहइ। यह बरे सबित क दिन मूसा क व्यवस्था भलाई करइ बरे अनुमति देत ह।"

13तब ईसू उ सुखंडी हाथवाला मनई स कहेस, "आपन हथवा आगे बढ़ावा।" उ पूरी तरह स चँगा होइ गवा। ठीक उहइ तरह जइसे ओकर दूसर हाथ रहा। 14तब फरीसियन हुवाँ स चला गएन अउर ओका मार डावइ क तरकीब गूँथइ मथइ लागेन।

### ईसू उहइ करत ह जेकरे बरे परमेस्सर ओका चुनेस

15ईसू इ जान गवा अउर हुवाँ स चला गवा। भारी भीड़ पाछे पाछे होइ गइ। उ ओनका चंगा करत। 16चिताउनी दिहस कि ओकरे बारे में मनइयन क कछू न बतावईँ। 17इ एह बरे भवा कि नबी यसायाह पर्भू क बारे में जउन कछू कहेस ह, उ पूरा होइ जाइ:

18"इ मोर सेवक अहइ, मई जेका चुनेउ हउँ। इ मोर पियारा अहइ, ऐहसे मई आनंद में हउँ आपन आतिमा ऐह प मई रखियउँ सब देसन क सब मनइयन क इ निआव क एलान करी।

19इ कबहुँ नाहीं चिचिआई, या झगड़ी ही मनइयन एँका गली कूचा में न सुनिहईँ

20उ सरते क न उ तोड़ीन इ बुझत दिया तलक उ न बुझाई डटा रही तब ताई जब ताई निआव क जीत न होइ जाई।

21तब फिन सबइ लोग आपन आसा ओहमों बंधिहीं, फिन उहइ नाउँ में।"

यसायाह 42:1-4

'मई ... नाही' होसे 6:6

### ईसू में परमेस्सर क सक्ती बाटइ

(मरकुस 3:20-30; लूका 11:14-23; 12:10)

22फिन मनइयन ईसू क लगे एक अइसे अँधरे क लइ आपन जउन गूँगा भी रहा काहेकि ओहें प दुस्ट आतिमा क सवारी रही। ईसू ओका चांगा किहेस अउर एह बरे इ गूँगा अउर अँधर बोलइ अउर देखइ लाग। 23ऐह प सबइ मनइयन अचरजे में पड़ि गएन अउर उ सबइ कहइ लागेन, "का इ मनई दाऊद क पूत होइ सकत ह?"

24जबहिं फरीसियन इ सुनेन तउ उ पचे कहेन, "इ दुस्ट आतिमन क ओनके सरदार बेल्लाबुल क सहारा स बाहरे निकारत ह।"

25ईसू ओनके मनवा क बात जानि गवा अउर ओनसे कहेस, "हर राज्य जेहमों फूट परि जात ह, ओकर नास होइ जात ह। वइसे ही हर सहर या परिवार जेहमों फूट परि जात ह उ टिकइ नाहीं पावत। 26तउ सइतान ही खुद आपन क बाहेर कइसे निकारी फिन तउ ओहमों आपन खिलाफ फूट पड़ि जाई। तउ ओकर राज्य कइसे बना रहि पाई। 27अगर इ सच अहइ कि मई बेल्लाबुल क सहारा स दुस्ट आतिमन क खदेरत हउँ तउ तोहार मनवइया कउने सहारा स ओनका बाहेर खदेरत हीं? तउ तोहार आपन मनवइया ही सिद्ध करिहीं कि तू गलत अहा। 28मई दुस्ट आतिमन क परमेस्सर क आतिमा क सक्ती स निकारत हउँ। ऐहसे इ सिद्ध होत ह कि परमेस्सर क राज्य तोहरे निअरे आइ ग अहइ।

29"फिन कउन कउनो जबरा क घरवा में घुसिके ओकर माल कइसे चोरेंइ सकत ह, जब तलक उ जबरा क पहिले बाँध न देइ। तबहिं उ ओकरे घरवा क लूटि सकत ह।

30"जउन मोर संग नाहीं उ हमरे खिलाफ बाटइ। अउर जउन अलगाइ भई भेड़न क बटोरइ में मोर मदद नाहीं करत, उ ओनका अलगावत ह। 31एह बरे मई तोहसे कहत हउँ कि सब मनइयन क किस्म किस्म क निन्दा अउर पापन्क छमा कइ दीन्ह जाइ मुला पवित्तर आतिमा क निन्दा क छमा किन्ह न जाई। 32कउनउ मनई क पूत क खिलाफ जदि कछू कहत ह तउ ओका छमा कीन्ह जाइ सकत ह, मुला पवित्तर आतिमा क खिलाफ कउनो कछू कहइ तउ ओका छमा न कीन्ह जाई। न तउ इ युग में अउर न आवइवाला युगे मों।

### मनई आपन करम स जाना जात ह

(लूका 6:43-45)

33"तू लोग जानत ह कि बड़िया फरे बरे तोहका बड़िया बृच्छ रोपइ चाही। मुला बृच्छ बुरा अहइ तउ बुरा फर देइ। काहेकि बृच्छ आपन फरे स जाना जात ह। 34अरे हे कीरा क बचवन! जब तू खुदइ बुरा अहा तउ नीक बातन कइसे कहि सकत ह? मनई क सब्द जउन ओकरे मनवा में भरा अहइ, उहइ स निकरत ही। 35एक नीक मनई मनवा क नीक भंडारे स नीक बातन निकारत ह अउर बुरा मनई बुरी बातन क निकारत ह जउन मनवा क भंडारे में एकट्ठा रहत हीं। 36अउ मई तू सब जने क बातवन हउँ कि निआव क दिन हर मनई क लापरवाही स बोली गइ बातन क

हिसाब देइ क होई। 37तोहरे बातन क ऊपर तोहका निर्दोख अउर दोखी ठहराइ जाई।”

### ईसू स प्रमाण सरूप अचरज चीन्ह क मॉग

(मरकुस 8:11-12; लूका 11:29-32)

38फिन कछू धरम सास्तिरियन अउर फरीसियन ओसे कहेन, “गुरु, हम पचे तोसे अद्भुत चीन्हा परगट करइ चाहित ह।”

39ईसू ओनसे जवाबे में कहेस, “इ जुग क बुरा अउर दुराचारी पीढ़ी क मनई अद्भुत चीन्हा देखा चाहत हीं। नबी योना क अद्भुत चीन्हा तजिके ओनका अउर कउनो अद्भुत चीन्हा न दीन्ह जाई। 40अउ जइसे योना तीन दिन अउर तीन रात उ समुद्री जीव क पेटवा में रहा, वइसे ही मनई क पूत तीन दिन अउर तीन रात धरती प रही। 41निआव क दिन निनेवा क रहइवाले आज क पीढ़ी क मनई क संग खड़ा होइहीं अउर दोखी ठहरइहीं। काहेकि निनेवा क मनई योना क उपदेस स मनफिराव करे रहेन अउर हियाँ तउ कउनो योना स बड़वार हाजिर अहई। 42निआव क दिन दक्खिन क रानी इ पीढ़ी क मनइयन क संग खड़ी होइ अउर ओनका दोखी ठहराई, काहेकि उ धरती क दूसर छोर स सुलैमान क उपदेस सुनइ बरे आइ रही अउर हियाँ तउ कउनउ सुलैमान स भी बड़वार हाजिर अहइ।

### मनइयन में सइतान

(लूका 11:24-26)

43“जब कउनउ दुस्ट आतिमा कउनो मनई क छोड़ देत ह तउ उ आराम खोजइ बरे झुरान धरती प ढूँढत फिरत ह, मुला उ ओका मिल नहीं पावत। 44तब उ कहत ह, ‘जउन घरे क मई छोड़ दिहेउँ, मई फिन उहई लौटि हउँ।’ तउ उ लौटत ह अउर ओका अब ताई खाली अउ साफ सूथर अउर सजा भवा पावत ह। 45फिन उ लौटत ह अउ आपन संग सात अउ दुस्ट आतिमन क लइ आवत ह जउन ओसे भी बुरी होत हीं। फिन उ सबइ आइके हुवाँ रहइ लागत हीं। अउर उ मनई क हालत पहिले स जिआदा खौफनाक होत ह। आज क इ खराब पीढ़ी क मनइयन क दसा अइसी बाटइ।”

### ईसू क मनवइयन ही ओकर परिवार

(मरकुस 3:31-35; लूका 8:19-21)

46ईसू अबहीं भिड़िया क मनइयन स बातन कर रहा कि ओकर महतारी अउर भाइयन हुवाँ अइके बाहेर खड़ा होइ गएन। उ पचे ईसू स बात करइ बरे इंतजार करत रहेन। 47कउनो ईसू स कहेस, “सुना तोहार महतारी अउर तोहार भाइयन खड़ा बाटेन अउर तोसे बात करइ चाहत हीं।”

48जवाबे में ईसू बात करइवालेन स कहेस, “कउन अहइ मोर महतारी, अउ कउन अहइ मोर भाइयन?” 49फिन आपन हथवा स चेलन कइती सनकावत कहेस, “इ अहई मोर महतारी अउर मोर भाइयन। 50हाँ सरगे में रहवइया मोरे परमपिता क इच्छा प जउन कउनो चलत ह, उहइ मोर भाई, बहिन अउर महतारी अहइ।”

### किसान अउर बिआ क दिस्तान्त

(मरकुस 4:1-9; लूका 8:4-8)

13 उहइ दिन ईसू उ घरवा क छोड़िके झिलिया क किनारे उपदेस देइ जाइ बइठा। 2बहोत मिला ओकरे चारिउँ कइती ऐकट्ठा होइ गएन। तउ एक दिन उ नाउ प चढ़िके बइठि गवा। अउ भीड़ किनारे खड़ी रही। 3उ ओनका दिस्तान्त क सहारा लेत भवा बहोत सी बात बताएस।

उ कहेस, “एक किसान बिआ बोअइ निकरा। 4उ जब बोआई करत रहा तउ कछू बिआ राहे क किनारे जाइ गिरेन। चिड़ियन आइन अउर चुन गइन। 5तनिक बिआ चट्टान क धरती प जाइ गिरेन। हुआँ क माटी उथली रही। बिआ फउरन उगेन, काहेकि माटी गहिर नाहीं रही। 6यह बरे जइसे सूरज निकरा तउ उ पउधन झुराइ गएन। अउर काहेकि उ सबइ जिआदा जर पकड़े नाहीं रहेन एह बरे झुराइके गिर गएन। 7बिआ क एक हीसा कँटहरी झाड़िन में जाइ गिरा, झाड़िन बाढ़िन, अउर उ सबइ उ पउधन क दहबोच लिहेन। 8मुला थोड़ा बिआ जउन बढ़िया धरती प गिरा रहेन, बढ़िया फसल देइ लागेन। फसल, जेतना बोइ ग रही, ओसे कउनो तीस गुनी, साठ गुनी या सौ गुनी स भी जिआदा भई। 9जउन सुन सकत ह, उ सुनि लेई!”

### दिस्तान्त कथा क मतलब

(मरकुस 4:10-12; लूका 8:9-10)

10फिन ईसू क चेलन ओकरे लगे जाइके पूछेन, “तू ओनसे बात करत भए दिस्तान्त कथा क प्रयोग काहे करत ह?”

11जवाबे में उ ओनसे कहेस, “सरगे क राज्य क भेद क जानइ क अधिकार सिरिफ तोहका दीन्ह ग अहइ, ओनका नाहीं। 12काहेकि जेकरे लगे थोड़ा बहोत बाटइ, ओका अउर भी दीन्ह जाई अउर ओकरे लगे ढेर होइ जाई। मुला जेकरे लगे कछू भी नाहीं अहइ, ओहसे जेतना स ओकरे लगे बाटइ, उ भी छोर लीन्ह जाइ। 13एह बरे मई ओनसे दिस्तान्त कथा क प्रयोग करत कहत हउँ। काहेकि अगर उ सबइ निहारत हीं, मुला असल में ओनका कछू देखेई नाहीं देत, उ पचे अगर सुनत हीं, मुला असल में उ सबइ न सुनत हीं, न समझत हीं। 14इ तरह ओन प यसायाह की भविस्सबाणी खरी उतरत ही:

‘तू सुनब्या अउर सुनतइ ही रहब्या मुला तोहरे कछू भी समझ न आई तू लखत ह, बस देखतइ ही रहब्या मुला तोहका तउ कछू सूझ न पाई

15काहेकि ओनके अकिल प पाथर पड़ा हइ सबइ आपन कान मूँद लिहेन, अउर आँखी बंद कई राखी अहई जेसे आपन आँखिन स उ सबइ कछू न निहारई अउर उ सबइ कनवा स कछू सुनि न पावई या आपन हिरदय स कबहुँ बूझई अउ मुड़िकइ कबहुँ मोरी कइती आवई अउर जेसे मई ओनका उद्धार करउँ।’

यसायाह 6:9-10

16मुला तोहार आँखी अउर कान धन्य अहई काहेकि उ सबइ देख सुन सकत हीं। 17मई सच कहत हउँ बहोतन

नबियन अउर धर्मी जउन बातन क देखइ चाहत रहेन, ओनका तू देखत अहा। उ पचे ओनका नाहीं देखि सकतेन। अउ जउन बातन क उ सबइ सुनइ चाहत रहेन, ओनका तू सुनत बाट्या। उ सबइ ओनका नाहीं सुन सकेन।

### बिआ बोवइ क दिस्तान्त कथा क अरथ

(मरकुस 4:13-20; लूका 8:11-15)

18“तउ बिआ बोअइ क दिस्तान्त क अरथ सुन ल्या। 19उ बिआ जउन राह क किनारे गिर गवा रहा, ओकर अरथ अहइ कि जबहि कउनो सरगे क राज्य क उपदेस सुनावत ह अउर समझत नाहीं तउ दुस्ट आइके, ओकरे मनवा में जउन उगा रहा, उखाड़ लइ जात ह। 20उ सबइ बिआ जउन पथरही धरती प छितराइ ग रहेन, ओकर अरथ अहइ उ मनई जउन उपदेस सुनत ह, ओका खुसी होइके फउरन अपनावत ह 21मुला आपन भीतर ओनकइ जइ नाहीं जमइ देत, उ तनिक देर ठहर पावत ह, जब उपदेस क कारण ओह प कस्ट अउर यातना आवत हीं तउ उ फउरन डगमगाइ जात ह।

22“कँटवन में छितराइ गवा बिआ क मतलब अहइ, उ मनई जउन उपदेस क तउ सुनत ह, मुला संसार क फिकिर अउर धन क लालच उपदेस क दहबोच लेत ह अउर उ मनई सफल नाहीं होइ पावत। 23नीक धरती प छितरान बिआ क अरथ अहइ उ मनई जउन उपदेस क सुनत ह अउर समझत ह। उ सफल होत ह। ओकर सफलता तीस गुनी, साठ गुनी या सौ गुनी तक होत ह।”

### गोहूँ अउर खरपतवारे क दिस्तान्त

24ईसू ओनके समन्वा एकठू अउर दिस्तान्त कथा राखेस, “सरगे क राज्य उ मनई क नाई अहइ जउन आपन खेतवा में नीक बिआ बोएस। 25मुला जब मनइयन सोवत रहेन, उ मनई क दुस्मन आवा अउर गोहूँ क बीचउबीच खरपतवार बोइ गवा। 26जइसे गोहूँ अँखुवान अउर ओह प बालन आइन तउ खरपतवार देखाइ लाग।

27तइसेन खेते क मालिक क लगे आइके ओकर नउकरन ओसे कहेन, ‘मालिक, तू तउ खेतवा में बढ़िया बिआ बोए रहा, बोए रह्या न? फिन ई खरपतवार कहाँ ते आइ गवा?’

28“तब उ ओनसे कहेस, ‘इ कउनो दुस्मने क काम अहइ।’

“ओकर नउकरन ओसे पूछेन, ‘का तू चाहत ह कि हम सबइ जाइके खरपतवार उखाड़ देइ?’

29“उ बोला, ‘नाहीं काहेकि जब तू खरपतवार उखड़ब्या तउ ओनके संग तू गोहूँ भी उखाड़ देब्या। 30जब ताई फसल पाकइ, दुइनउँ क साथ साथ बाढ़इ द्या, फिन कटनी क समइ फसल क कटइयान स कहब कि पहिले खरपतवारे क गट्टर बनाइके ओनका जराइ द्या अउर गोहूँ बटोरिके मोरे खरिहाने में धइ द्या।”

### अउर दिस्तान्त कथा

(मरकुस 4:30-34; लूका 13:18-21)

31ईसू ओनके समन्वा अउर दिस्तान्त कथनक राखेस:

“सरग क राज्य राई क बिआ क छोटवार बिआ क नाई अहइ, जेका कउनो लइके खेते में बोई दिहे होय। 32ई बिआ नान्ह स नान्ह होत ह मुला बड़वार होए प इ बगिया क सबइ पउधन स बड़वार होइ जात ह। इ पेड़ बनत ह अउर अकासे क पंछी आइके ँकर डारन प सरन लेत हीं।”

33ईसू ओनका एक दिस्तान्त कथा अउ कहेस, “सरगे क राज्य खमीर क नाई अहइ, जेका जउनो स्त्री तीन अढ़इया आटा में मिलाएस अउर तब ताई ओका राखि दिहेस जब तलक उ सबइ क सबइ खमीर नाहीं भवा।”

34ईसू लोगन्स सब कछू दिस्तान्त कथन स बताएस। असिल में उ ओनसे दिस्तान्त कथा क बिना कछू नाहीं कहत रहा।

35अइसा एह बरे भवा कि परमेस्सर नबी स जउन कछू कहवाए रहा पूरा होइ जाइ:

परमेस्सर कहेस, “मई दिस्तांत कथन स आपन मुँहना खोलिहउँ। सुस्टि क सुरू स जउन बात छुपी रहिन, ओनका परगट करब।’

भजन संहिता 78:2

### गोहूँ अउर खरपतवारे क दिस्तान्त क बखान

36फिन ईसू उ भीड़ क बिदा कइके घर आइ गवा। तब्बइ ओकर चलन आइके ओसे कहेन, “खेते क खरपतवार क दिस्तान्त क अरथ हमका समझाइ द्या।”

37जवाबे में ईसू बोला, “जउन उत्तम बिआ बोए रहा, उ अहइ मनई क पूत। 38अउर खेत इ संसार अहइ। नीक बिआ क अरथ अहइ, सरगे क राज्य क मनई। खरपतवार क अरथ अहइ, दुस्ट (सइतान) क संतान। 39उ दुस्मन जउन खरपतवारे क बोएस, सइतान अहइ, अउर कटनी क समइ अहइ, इ संसार क अंत अउर कटइया अहइ परमेस्सर क दूतन।

40“तउ ठीक उहइ जइसे खरपतवारे क ँकट्टा कइके आगी में जराइ दीन्ह ग, वइसे ही संसार क अंत होई। 41मनई क पूत आपन दूतन क पठइ अउर उ सबइ ओनके राज्य स सबइ पापिन क अउ ओनक जउन पाप बरे मनइयन क भइकावत हीं, 42एकट्टा कइके धधकत भट्ठी में झोक देइहीं जहाँ बस दाँतन क पीसब अउर रोउब ही रोउब होई। 43तब धर्मी आपन परमपिता क राज्य में सूरज क नाई चमकिहीं। जउन सुनि सकत ह, सुनि लेइ।

### धने क भण्डार अउर मोती क दिस्तान्त

44“सरग क राज्य खेत में गड़ा भवा खजाना क नाई अहइ, जेका कउनो मनई पाएस अउर फिन ओका हुवई गाइ दिहेस। उ एँतना खुस भवा कि ओकरे लगे जउन कछू रहा उ ओका बेच दिहेस अउर उ खेत बेसहि लिहस।

45“सरग क राज्य एक अइसे बेवपारी क नाई अहइ कि जउन बढ़िया मोती क खोज में होइ। 46जइसेन ओका एक अनमोल मोती मिला तउ जाइके जउन कछू ओकरे पास रहा, उ बेच डाएस अउर मोती बेसहि लिहस।

### मछरी पकड़इ क जाल

47“सरगे क राज्य मछरी पकड़इ बरे झीले में पेंक गवा

जाल क नाई भी अहइ। जेहमों किसिम किसिम क मछरी पकड़ लीन्ह गइन। 48जब उ जाले मँ मछरी मुचामुच भरि गइन तउ किनारे ओका हींच लीन्ह गवा अउर हुवों बैठिके नीक मछरी छाँटिके टोकरिन मँ भरि लीन्ह गइन मुला बेकार मछरी फेंकि दीन्ह गइन। 49सुस्टि क अंत मँ अइसे ही होई। सरगदूतन अइहीं अउर धर्मियन मँ स दुस्त मनइयन क छाँटिके 50धधकत भट्टी मँ झोकि देइहीं। हुवों बस रोउब अउर दौत पीसब होई।”

51ईसू आपन चलन स पूछेस, “का तू सबइ इ बातन क समझत ह?” उपचे जवाब दिहन, “हाँ।”

52फिन उ ओनसे कहेस, “देखा, एह बरे हर धरम सास्त्री जउन सरग क राज्य क जानत ह, एक अइसे ग्रिहस्त क नाई अहइ, जउन आपन बखरी स नई पुरानी चीजन्क बाहेर निकारत ह।”

### ईसू क आपन देस लौटब

(मरकुस 6:1-6; लूका 4:16-30)

53इ सबन डिस्टान्त कथा क पूरा कइके उ हुवों स चला गवा। 54अउर आपन देस आइ गवा। फिन उ आराधनालय मँ उपदेस देब सुरू करेस। ऐसै हर कउनो अचरजे मँ पड़िके कहइ लाग, “ऐंका अइसी सूझबूझ अउर अद्भुत कारजन क सक्ती कहाँ त मिल गइ? 55का इ उहई बढई क बेटवा नाहीं अहइ? का ऐंकर महतारी क नाउँ मरियम नाहीं अहइ? याकूब, यूसुफ, समौन अउर यहूदा इहई क भाई अहई न? 56ऐंकर सबही बहिनियन हमरे बीच मँ नाहीं अहई? तउ फिन ओका इ सब कहाँ त मिली गवा?” 57तउ उ सबइ ओका मानेन नाहीं।

फिन ईसू कहेस, “कउनो नबी इ आपन गाँव अउर घरवा क छाँड़िके, सब मनइयन इज्जत करत हीं।”

58तउ ओनके बिसवास न होइके कारण उ हुवों जिआदा अद्भुत कारजन नाहीं कहेस।

### हेरोदेस क ईसू क बारे मँ सुनब

(मरकुस 6:14-29; लूका 9:7-9)

14 उ समइ गलील क राजा हेरोदेस जब ईसू क बारे मँ सुनेस तउ उ आपन नउकरन स कहेस, “इ बपतिस्मा देइवाला यूहन्ना अहइ जउन मरि गएन मँ जी गवा बाटइ। अउर इहइ बरे इ सक्तिन ओहमों करत बाटिन जेसे इ इन अद्भुत कारजन क करि डावत ह।”

### यूहन्ना क कतल

3इ उहइ हेरोदेस रहा जउन यूहन्ना क गिरफ्तार कइके, जंजीरी स बाँधि, जेल मँ धाँध दिहस। इ उ हिरोदियास क कहे प कहेस, जउन पहिले ओकरे भाई फिलिप्पुस क पत्नी रही। 4यूहन्ना ओसे अक्सर कहत रहत रहा: “तोहका ऐंकरे साथ नाहीं रहइ चाही।” 5ऐह प हेरोदेस ओका मार डावइ चाहत रहा, मुला उ मनइयन स डेरात रहा काहेकि मनई यूहन्ना क नबी मानत रहेन।

6-7मुला जब हेरोदेस क जन्म दिन आवा तउ हिरोदियास क बिटिया हेरोदेस अउर ओकर मेहमनवन क समन्वा

नाचिके हेरोदेस क एँतना खुस किहेस कि सपथ खाइके ओका देइ बरे बचन दिहेस कि उ जउन कछू चाही। 8आपन महतारी क उस्कावे मँ आइके उ कहेस, “मोका टाठी मँ धइके बपतिस्मा देइवाला यूहन्ना क मूँड़ द्या।” 9तउ भी राजा बहोत दुखी रहा मुला आपन सपथ अउर आपन मेहमानन क कारण उ ओकर मंसा पूरी होइके हुकुम दिहेस। 10उ जेल मँ यूहन्ना क मूँड़ काटइ बरे मनई पठएस। 11तउ यूहन्ना क मूँड़ टाठी मँ धइके लइ आवा गवा अउर लरकी क दइ दीन्ह गवा। उ ओका आपन महतारी क लगे लइ गइ। 12यूहन्ना क चलन आपन अउर ओकरे धड़े क गाड़ दिहन अउर फिन उ पचे आइके ईसू क बताइ दिहन।

### ईसू क पाँच हजार स जिआदा मनइयन क खियाउब

(मरकुस 6:30-44; लूका 9:10-17; यूहन्ना 6:1-14)

13जब ईसू ऐंकरे बारे मँ सुनेस तउ उ हुवों स नाउ मँ बइठिके निर्जन जगहिया मँ अकेँल्ले चला गवा। मुला जब भीड़ क ऐंकरे बारे मँ मालूम भवा तउ आपन सहरन स पड़्योँ पड़्योँ ओकरे पाछे होइ गएन। 14ईसू जब नाउ स निकरि के किनारे आवा तउ उ बड़ी भीड़ देखेस। ओका ओन प दया आइ अउर ओनके बेरमियन क नीक किहेस।

15जब साँझ भई तउ ओकर चलन ओकरे लगे आइके कहेन, “इ निर्जन जगह अहइ अउर बहोत देर होइ गइ अहइ, तउ भीड़ क बिदा कइ द्या, जेसे उ सबइ गाउँ मँ जाइके आपन बरे खइया बेसहि लेईं।”

16मुला ईसू ओनसे कहेस, “ऐंका कहुँ जाइ क जरूरत नाहीं बा। तू एनका कछू खाइके दइ द्या।” 17उ पचे ओसे कहेन, “हमरे लगे पाँच ठु रोटी अउर दुइ मछरिन क छोड़िके अउर कछू नाहीं अहइ।”

18ईसू कहेस, “ओका मोरे लगे लइ आवा।” 19उ भिड़िया क मनइयन स कहेस कि उ पचे घास प बइठि जाईं। फिन उ पाँच ठु रोटी अउर दुइ मछरिन क लइके सरग कइँती देखेस अउर भोजन बरे परमेस्सर क धन्यबाद दिहेस। फिन रोटी क टुकड़न मँ तोड़ेस अउर ओनका आपन चलन क दिहेस। उ चलन टुकड़न क मनइयन मँ बाँटन। 20सबइ जिआरा भरि के जेएन। ओकरे बाद खियाए स बचा भवा टुकड़न स चलन बारह झउआ भरि दिहेन। 21स्त्रियन अउर गदेलन क तजिके हुवों खवइया कउनो पाँच हजार रहेन।

### झीले प ईसू क चलब

(मरकुस 6:45-52; यूहन्ना 6:15-21)

22ऐंकरे तुरंतइ पाछे ईसू आपन चलन क नाउ प बइठाएस अउर जब ताई उ भिड़िया क बिदा करइ, ओसे पहिले आपन चलन स गलील झील क उ पार जाइ क कहेस जइसे उ सबइ ईसू क जाइ स पहिले पहुँच जाईं। 23उ भीड़ क बिदा कइके पराथना करइ अकेँल्ले पहाड़ी प चला गवा। साँझ होइ प उ हुवों अकेला रहा। 24तब ताई नाउ किनारे मीलन दूर तलक जाइ चुकी रही अउर लहरन क हिलोर स नाउ डोलय लाग काहेकि आँधी उल्टी चलत रही।

25भिन्सारे तीन अउर छः बजे क बीच में ईसू झील प चलत ओनके लगे आवा। 26ओकर चलन जब ओका झीले प चलत देखेन तउ घबराइके आपुस में कहइ लागेन, “इ तउ कउनो भूत अहइ!” उ पचे डेराइ के चिचियाने।

27ईसू फउसन ओनसे बात करत भवा कहेस, “हिम्मत राखा! इ मई हउँ, अब अउ जिन डेराअ!” 28पतरस जवाब देत ओसे कहेस, “पभू, अगर तू अहा, तउ मोका पानी प चलिके आपन लगे आवइ क कहा।”

29ईसू कहेस, “पतरस, चला आवा।”

पतरस नाउ स निकरिके पानी प इसू कइँती चल पड़ा। 30जबहिं उ जोर क आँधी देखेस उ घबराइ गवा। उ बूड़ई लाग अउर नरियान, “पभू, मोर रच्छा करा!”

31ईसू तुरंतहि ओकरे नगिचे पहुँचिके ओका थाम लिहेस अउर ओसे कहेस, “अरे, कम बिसवास करइया, तू संदेह काहे किहा?”

32अउर उ सबइ नाउ प चढि आएन। आँधी पटाइ गइ।

33नाउ क मनइयन ईसू का आराधना किहेन अउर कहेन, “तू सच परमेस्सर क पूत अहा।”

### ईसू बहोत स लोगन क चंगा किहस

(मरकुस 6:53-56)

34तउ झील पार कइके उ सबइ गन्नेसरत क किनारे उतरि आएन। 35जब हुवाँ क रहइवाला ईसू क पहिचानेन तउ उ पचे ओकरे अवाई क खबर आसपास क सबहिं ठउरन में पठइ दिहन। जेसे मनई जउन बेरमिया रहेन, उ सबन क हुवाँ लइ आएन। 36अउर ओसे पराथना करइ लागेन उ ओनका आपन ओढ़ना क छोर छुअइ दे। अउर जउन छुइ लिहेन, उ सबइ पूरपूर चंगा होइ गएन।

### मनई क बनवा बिधान स परमेस्सर क व्यवस्था बड़वार अहइ

(मरकुस 7:1-23)

15 फिन कछू फरीसियन अउर धरमसास्तिरियन यरूसलेम स ईसू क लगे आएन अउर ओसे पूछेन, 2“तोहार चलन हमरे पूर्वजन क रीति रिवाज क काहे नाहीं मनतेन? उ पचे खइया खाइ स पहिले आपन हथवन क काहे नाहीं धोउतेन!”

3जवाबे में ईसू ओनसे पूछेस, “आपन रीति रिवाजन क कारण तू परमेस्सर क हुकुम क काहे टारत ह? 4काहेकि परमेस्सर तउ कहेस, ‘तू आपन महतारी बाप क इज्जत करा’\* अउर जउन कउनो, ‘महतारी बाप क बेज्जत करइ, ओका जरूर मार डावइ चाही।’\* 5मुला तू कहत ह कि अगर कउनो आपन महतारी बाप स कहइ, ‘मई आपन सब कछू परमेस्सर क अर्पन कइ दिहे हउँ, एह बरे तोहार मवद नाहीं कइ सकत हउँ।’ 6इ तरह ओका आपन बाप क मानइ क जरूरत नाहीं। एह तरह तू आपन रीति रिवाजे क कारण परमेस्सर क हुकुम क नाहीं मान्या।

‘तू ... करा’ निर्गमन 20:12; व्यवस्था. 5:16

‘महतारी ... चाही’ निर्गमन 21:17

7अरे कपटी मनइयो! तोहरे बारे में यसायाह ठीक ही भविस्सबाणी किहेस। उ कहे रहा:

8‘इ सबइ सिरिफ ओंठन स कि हमार मान करत हीं, मुला रहत ऐनकइ मन मोसे सदा दूर

9अर्पन भइ आराधना मोका ऐनकी बगैर कामे की काहेकि सिखउतेन इ सबइ मनइयन क कहिके आपन धरम क उपदेस बनवा नेम मनई क।”

यसायाह 29:13

10उ भिड़िया क आपन नगिचे बोलोएस अउर ओनसे कहेस, “सुना अउर समझ ल्या कि 11मनई क मुँहे स जउन भीतर जात ह उ ओका अपवित्तर नाहीं करत, मुला ओकरे मुँहना स निकरा सब्द ओका अपवित्तर करत ह।”

12तब ईसू क चलन ओकरे निअरे आएन अउर बोलेन, “का तोहका पता बाटई कि तोहरे बात क फरीसियन बहोत बुरा मान गएन?”

13ईसू जवाब दिहेस, “हर पउथा जेका सरगे में बसा मोर परमपिता नाहीं लगाएन, ओका उजाइ दीन्ह जाई। 14ओनका तजि द्या, उ सबइ तउ आँधरन क नेता अहई। जदि एक आँधर दुसरे आँधर क राह देखावत ह, तउ उ दुइनउँ गइहा में गिरि जात हीं।” 15जवाबे में पतरस ओसे कहेस, “हम पचन क पवित्तर न होइ क बारे में पहिले दीन्ह में डिस्टान्त क समझावा।”

16ईसू कहेस, “का तू अबहूँ नाहीं समझया? 17का तू नाहीं जानत अहा कि जउन कछू कउनो क मुँहे में जात ह, उ ओकरे पेटे में पहुँचत ह अउर फिन टट्टी स निकर जात ह? 18मुला जउन मनई क मुँहे स बाहेर आवत ह, उ ओकरे मने स निकरत ह। इहइ ओका अपवित्तर करत ह। 19काहेकि बुरा बिचार, कतल, व्यभिचार, बुरी चाल, चोरी, झूठ अउर निन्दा सबइ बुराई मनवा स ही आवत हीं। 20इहइ अहई जेसे कउनो अपवित्तर बनत ह। बे हाथ धोए खाइ स कउनो अपवित्तर नाहीं होत।”

### गैर यहूदी स्त्री क मवद

(मरकुस 7:24-30)

21फिन ईसू उ ठउर क तजिके सूर अउ सैदा कइँती चला गवा। 22हुवाँ क एक कनानी स्त्री आइ अउर चिचियाइ लाग, “हे पभू, दाऊद क पूत मोहे प दया करा। मोरी बिटिया प दुस्त आतिमा बुरी तरह स सवार अहइ।”

23ईसू ओसे एक सब्द भी नाहीं कहेस, तउ ओकर चलन ओकरे लगे आएन अउर बिनती करइ लागेन, “इ हमरे पाछे चिचिआत भई आवति अहइ। ऐंका दूर हटावा।”

24ईसू जवाब दिहेस, “मोका सिरिफ इन्नाएल क लोगन क भटक गई भेड़न क बजाय कउनो अउर बरे नाहीं पठवा ग अहइ।”

25तब उ स्त्री ईसू क समन्वा निहुरिके बिनती करेस, “हे पभू मोर सहायता करा!”

26जवाबे में ईसू कहेस, “इ ठीक नाहीं कि गदेलन क खइया लइके ओका कुकुरन क अगवा नाई दीन्ह जाइ।”

27उ बोली, “इ ठीक बाटई पभू, मुला आपन मालिक क मेजे स गिरि गवा चूर चराबा में स थोड़ बहोत तउ घरे क कूकुर खाइ लेत ही।”

28तब ईसू कहेस, “बिटिया, तोहार बिसवास बहोत मजबूत क अहइ। जउन तू चाहत ह, पूर होइ जाइ।” अउ फउरन ओकर बिटिया चंगी होइ गइ।

### ईसू क बहोतन क चंगा करब

29फिन ईसू हुवाँ स चल पड़ा अउर गलील झीले क किनारे पहुँच गवा। उ एक पहाड़े प चढ़िके बइठ गवा।

30बहोत बड़ी भीड़ लँगाड़ा, लूला, आँधर, अपाहिज, बहिरा, गूंगा अउर अइसे दूसर बेरमिया क लइके ओकरे लगे आवइ लागेन। भिड़िया ओकरे गोड़वा प भुइयाँ प डाइ दिहेस अउ ईसू ओन पचेन क चंगा किहेस। 31एँहसे भीड़ क मनइयन क, इ लखिके बहिर, गूंगा बोलत अहई, अपाहिज नीक होइ गएन, लँगाड़ा लूला चलइ फिरइ लागेन अउ आँधर अब देख पावत हीं, बड़ा अचरज भवा। उ सबइ इस्त्राएल क परमेस्सर क सराहना करइ लागन।

### चार हजार स जिआदा मनइयन क खइया क खियाउब

(मरकुस 8:1-10)

32ईसू तब आपन चलन क आपन नगिचे बोलाएस अउ कहेस, “मोका इ भीड़े पर तरस आवत अहइ काहेकि इ मनइयन तीन दिना स बराबर मोर संग अहई अउर एँनके लगे कछू खइया के भी नहीं बाटइ। मई एँनका भूखा ही नहीं पठवइ चाहत हउँ काहेकि होइ सकत ह कि कहुँ उ पचे रस्ता में चक्कर खाइके गिरि जाई।”

33तबहि ओकर चलन कहेन, “एँतनी बड़वार भीड़ बरे अइसी दूर क ठउर में एँतना ढेर खइया क कहाँ स मिली?”

34तब ईसू ओनसे पूछेस, “तोहरे लगे केतनी रोटी अहई?” उ सबइ कहेन, “सात रोटी अउर कछू नान्ह नान्ह मछरिन।”

35ईसू भिड़िया स भुइयाँ प बइठइ क कहेस। 36अउर ओन सात रोटी अउर मछरियन क लइके उ परमेस्सर क धन्यवाद दिहेस अउ रोटिनक तोड़ेस अउर आपन चलन क देइ लाग। फिन ओकर चलन लोगन क बाँटि दिहेन। 37सब लोग तब तलक खात रहेन जब अघाइ नहीं गएन। फिन ओकर चलन बचा भवा टुकड़न स सात झउआ भरेन।

38स्त्रियन अउर बचवन क छाँड़िके हुवाँ चार हजार पुरुसन खइया क खाएन। 39भीड़े क बिदा कइके ईसू नाउ में आवा अउर मगदन क छेत्र में चला गवा।

### यहहूदी नेतन क छलावा

(मरकुस 8:11-13; लूका 12:54-56)

**16** फिन फरीसियन अउर सदूकियन ईसू क लगे आएन। उ पचे ओका परखा चाहत रहेन तउ उ सबइ ओका कउनो अद्भुत कारज करइ क कहेन, काहेकि मालूम होइ कि ओका उ परमेस्सर क बाटइ।

2ईसू जवाब दिहेस, “सूरज बूड़इ क समइ तू पचे कहत ह मौसम बढ़िया रही काहेकि अकास ललछउँइ अहइ। 3अउर सूरज निकरे प तू कहत ह, ‘आज अँधड़ आई काहेकि अकास धँधुर अउ ललछउँइ अहइ।’ त अकासे क

लच्छन पढ़इ जानत ह, मुला आपन समइ क लच्छन क नहीं पढ़ सकत्या। 4अरे दुस्त अउर पापी पीढ़ी क मनई कउनो अद्भुत चीन्हा देखइ चाहत हीं मुला ओनके बजाय योना क अद्भुत चीन्हा क कउनो अउ दूसर अद्भुत चीन्हा नहीं देखइ जाई।” फिन उ ओनका तजि क चला गवा।

### ईसू क चिताउनी

(मरकुस 8:14-21)

5ईसू अउर ओनकइ चलन झीले क पार चला गएन प उ पचे रोटिया लइ आउब बिसरि गएन। 6एँह पइ ईसू ओनसे कहेस, “चउकन्ना रह्या अउर फरीसियन अउ सदूकियन क खमीरे स बचि रह्या।”

7उ पचे आपुस में तजबीजइ लागेन अउर बोलेन, “इ होई कि उ यह बदे कहेस कि हम पचे कउनो रोटी संग नहीं लइ आएन।”

8उ पचे का बिचारत रहेन, ईसू इ जानत रहा, तउ उ बोला, “अरे कमती बिसवास क मनइयो! तू सबइ आपुस में काहे सोचत बिचारत अहा कि तोहरे लगे रोटी नहीं। 9का तू पचे अबहुँ नहीं समुझ पाया अउर तोहका याद नहीं अहइ कि पाँच हजार मनइयन बरे उ पाँच रोटी अउर फिन केतना झउआ भरिके तू सबइ उठाया ह? 10अउर का तोहका याद नहीं चार हजार मनइयन बरे सात रोटी अउर फिन केतना झउआ भरि के तू पचे उठाए रह्या? 11काहे नहीं समझत्या कि मई तोहसे रोटियन क बारे में बात नहीं कहेउँ? मई तउ तोहका फरीसियन अउर सदूकियन क खमीरे\* स दूर रहइ बरे कहयो ह।”

12तबहि उ पचे समुझ गएन कि रोटिया क खमीरे स नहीं अरथ रहा मुला फरीसियन अउर सदूकियन क सिच्छा स चौकस रहइ क अरथ रहा।

### पतरस कहत ह कि ईसू अहइ मसीह

(मरकुस 8:27-30; लूका 9:18-21)

13जबहि ईसू कैसरिया फिलोप्पी क पहुँटा में आइ तउ उ आपन चलन स पूछेस, “मनइयन का कहत बाटेन, कि मई मनई क पूत कउन हउँ?”

14उ पचइ कहेन, “कछू मनइयन कहत हीं तू यूहन्ना अहा बपतिस्मा देइवाला। दूसर मनइयन कहत हीं कि तू एलिय्याह\* अहा अउ कछू मिला कहत हीं कि तू यिर्मय्याह\* या नबियन में स कउनो एक अहा।”

15ईसू आपन चलन स कहेस, “अउर तू का कहत ह कि मई कउह हउँ?”

16समौन पतरस जवाब दिहेस, “तू मसीह अहा, साच्छात परमेस्सर क पूत।”

17जवाबे में ईसू ओसे कहेन, “योना क पूत समौन। तू धन्य अहा काहेकि तोहका इ बात कउनो मनई नहीं, मुला सरगे में बसा भवा मोर परमपिता देखाएस ह। 18मई तोहसे

**खमीरे** फरीसियन अउ सदूकियन क कुसंग।

**एलिय्याह** एक तु नबी ईसू स 850 बरिस पहिले भवा रहा।

**यिर्मय्याह** एक तु नबी ईसू स 600 बरिस पहिले भवा रहा।

कहत हउँ कि तू परतस अहा। अउर इहइ चट्टाने प मई आपन कलीसिया बनउब। मउत क सवती\* ओह प परबल नाहीं होइ। 19मई तोहका सरगे क राज्य क कुंजी देत हउँ। काहेकि भुइयोँ प जउन कछू तू बँधब्या उ परमेस्सर क जारिये सरग मँ बँध दीन्ह जाइ अउर धरती पर जेका तू न बँधब्या ओका सरगे मँ भी न बांधा जाई।” 20फिन उ आपन चेलन क करार हुकुम दिहेस कि उ सबइ कउनो क इ न बतावई कि उ मसीह अहइ।

### ईसू आपन मउत क भविस्सबाणी

(मरकुस 8:31-9:1; लूका 9:22-27)

21उ समइया ईसू आपन चेलन क बतावइ लाग कि, ओका यरूसलेम जाइ चाही। जहाँ ओका धरम सास्तिरियन, बुजुर्ग यहूदी नेतन अउर मुख्ययाजकन क जारिये यातनायें दइके मरवाइ दीन्ह जाई। फिन तीसर दिन उ मरा भवा मँ जी जाई। 22तबहि पतरस ओका अलगइ लइ गवा अउर ओकर डांट-डपट करत ओसे कहेस, “ओ पभू! परमेस्सर तोह पइ दया करी। तेरे संग अइसा कबहुँ न होई!”

23फिन ईसू ओकरे कइँती मुड़ि गवा अउर बोला, “पतरस मोरे समन्वा स हटि जा, सइतान! तू मोरे बरे एक रोड़ा अहा। काहेकि तू परमेस्सर क नाई नाहीं मनई क नाई सोचत बिचारत ह।”

24फिन ईसू आपन चेलन स कहेस, “जदि कउनो मोरे पाछे आवा चाहत ह, तउ उ आपन क बिसराइ के, आपन क्रूस उठाइ लेइ अउर मोरे पाछे होइ जा। 25जउन कउनो आपन जिन्नगी क बचावइ चाहत बा, उ ओका हेराइ देइ। मुला जउन कउनो मोरे बरे आपन जिन्नगी तजि देइ, उहइ ओका बचाइ सकत ह। 26जदि कउनो आपन जिन्नगी दइके समूचा संसार भी पाइ जाइ तउ ओका ओसे कउन फायदा? आपन जिन्नगी क फिन स पावइ बरे कउनो भला का दइ सकत ह? 27मनई क पूत सरगदूतन क संग आपन परमपिता क महिमा क संग आवइवाला अहइ, जउन हर कउनो क ओकर करम क फल देई। 28मई तोहसे सच कहत हउँ, हियोँ कछू अइसे लोग खड़ा अहई जउन तब तलक नाहीं मरिहीं जब तलक उ पचे मनई क पूत क ओकरे राज्य मँ आवत न निहारि लेई।”

### तीन तु चेलन क मूसा अउर एलिय्याह क संग ईसू क दरसन

(मरकुस 9:1-13; लूका 9:28-36)

17 छः दिना पाछे ईसू पतरस, याकूब अउर ओकर भाई यूहन्ना क संग लइके अकेल्ले मँ उँचके पहाड़े प गवा। 2हुवाँ ओनके समन्वा ओकर रूप बदल गवा। ओकर मुँहना सूरज क नाई चमचमाइ लाग अउर ओढ़ना अइसे दमकइ लागेन जइसे रोसनी। 3फिन एकाएक ओनके समन्वा मूसा अउर एलिय्याह परगट गएन अउर ईसू स बतियाइ लागेन।

4इ लखिके पतरस ईसू स बोला, “पभू, नीक बाटइ कि हम हियोँ अही। अगर तू चाहा तउ मई हियोँ तीन तम्बू

बनाइ देई एक ठू तोहरे बरे, एक मूसा बरे अउर एक एलिय्याह क।”

5पतरस अबहीं बात करत रहा कि चमचमात बादर आइके ओका ढाकि लिहेस अउर बदरे स अकासबाणी भइ, “इ मोर पिआरा पूत अहइ। जैसे मई खूब खुस हउँ। एकर सुना!”

6जब चेलन इ सुनेन तउ उ सबइ एँतना ससाइ गएन कि धरती प मुँहना उलटि के गिरि गएन। 7तबहि ईसू ओनके लगे गवा अउर ओनका छुअत भवा बोला, “डेराअ जिन, खड़ा हवा।” 8जब उ पचे आँखी क ऊपर करेन तउ हुआँ कहुँ अउर का नाहीं बरन ईसू क पाएन।

9जब उ सबइ पहाड़े स उतरत रहेन तउ ईसू ओनका हुकुम दिहेस, “जउन कछू तू देख्या ह, तब ताई कउनो क जिन बतावा जब ताई मनई क पूत क मरा भवा मँ स फिन जी न जाइ।”

10फिन ओकर चेलन ओसे पूछेन, “धरम सास्तिरियन फिन काहे कहत हीं कि एलिय्याह क पहिले तू आउब तय अहइ?”

11जवाब देत भवा ईसू ओनसे कहेस, “एलिय्याह आवत अहइ, उ हर चीज क तरकीबे स ठीक कइ देइ। 12मुला मई तोहसे कहत हउँ कि एलिय्याह जउन अब तलक आइ चुका अहइ। मुला मनइयन ओका पहिचानेन नाहीं। अउर ओकरे संग जइसा चाहेन वइसा किहेन। ओनके जारिये मनई क पूत क भी वइसे ही सतावइ जाइवाला अहइ।” 13तबहि ओकर चेलन समुझ पाएन कि उ ओनसे बपतिस्मा क देवइया यूहन्ना क बारे मँ कहे रहा।

### बेरमिया लरिका क चंगा कीन्ह जाब

(मरकुस 9:14-29; लूका 9:37-43)

14जब ईसू भीड़ मँ वापस आइ गवा तउ एक मनई ओकरे पास आवा। अउर ओका दंडवत कइके 15बोला, “हे पभू, मोरे बेटवा प दया करा। ओका मिर्गी आवत ह। उ बहोत तड़फड़ात ह। उ आगी या पानी मँ अक्सर गिरि पड़त ह। 16मई ओका तोहरे चेलन क लगे लइ आवा, मुला उ सबइ ओका चंगा नाहीं कइ पाएन।”

17जवाबे मँ ईसू कहेस, “अरे भटका भवा अबिसवासी मनइयन! मई केतेंना समइ तोहरे संग अउर रहब? केतेंना समइ मई अइसे ही तोहार सहब जात रहब? ओका हियोँ मोरे लगे लिआवा।” 18फिन ईसू दुस्ट आतिमा क हुकुम दिहेस अउर उ ओहमा स बाहेर निकर आइ अउ उ लरिका फउरन नीक होइ गवा।

19फिन ओकर चेलन अकेल्ले मँ ईसू क लगे जाइ क पूछेन, “हम इ दुस्ट आतिमा क काहे नाहीं निकर पाए?”

20ईसू ओनका बताएस, “काहेकि तोहमों बिसवास क कमी अहइ। मई तोहसे सच कहत हउँ, जदि तोहमों सरसों क बिया जेतेंना बिसवास अहइ तउ तू इ पर्वत स कहि सकत ह, ‘हियोँ स हटि के हुवाँ चला जा’ अउर उ चला जाई। तोहरे बरे असंभव कछू भी नाहीं होई। 21अइसी दुस्ट आतिमा सिरिफ पराथना अउ उपवास करइ स निकरत ह।”

**ईसू क आपन मउत क बारे में बताउब**

(मरकुस 9:30-32; लूका 9:43-45)

22जब ईसू क चलन आएन अउर गलील में ओकरे साथ मिलेन तउ ईसू ओनसे कहेस, “मनई क पूत, मनइयन क जरिये पकड़वाइ जाइवाला अहइ, 23अउर उ ओका मार डइहीं। मुला तीसरे दिना उ फिन जी जाई।” एह प ईसू क चलन बहोत बिआकुल होइ गएन।

**चुंगी क भुगतान**

24जब ईसू अउर ओकर चलन कफरनहूम में आएन तउ मंदिर क दुइ दरम क चुंगी उगहिया वालेन पतरस क लगे आएन अउर बोलेन, “का तोहार गुरु दुइ दरम क मंदिर क चुंगी नाहीं देत?” 25पतरस जवाब दिहस, “हौं, उ देत ह।”

अउर उ घरवा में आवा जहाँ ईसू रहा। पतरस क बोलइ स पहिले ईसू बोल उठा, “समौन, तोहार का बिचार अहइ? धरती क राजा केहसे चुंगी लेत हीं? खुद अपने बचवन स, या दूसर क बचवन स?”

26पतरस जवाब दिहस, “बाहिर क मनइयन स।”

तबहि ईसू ओसे कहेस, “यानी ओकरे आपन बचवन क छूट मिलत ह। 27मुला हम पचे ओन मनइयन क कोहाय न देइ। एह बरे झिलिया प जा अउर आपन कटिया फेंक द्या अउर फिन जउन मछरी धरे में आइ जाइ ओकर मुँहना खोल द्या। तोहका चारि दरम क सिक्का मिली। ओका लइके मोरे अउ आपन बरे ओनका दइ दिहा।”

**सबते बड़कवा कउन**

(मरकुस 9:33-37; लूका 9:46-48)

**18** तब ईसू क चलन ओकरे लगे आइके पूछेन, “सरगे क राज्य में सबते बड़कवा कउन अहइ?”

2उहइ घड़ी ईसू एक तु गदेलन क अपने लगे बोलीएस अउर ओका ओकरे समन्वा खड़ा कइके 3उ कहेस, “मई तोहसे सच कहत हउँ जब ताई कि तू सबइ मनवा क फिरउब्या नाहीं अउर गदेलन क नाई नाहीं बनि जाब्या, सरगे क राज्य में घुसि न सकब्या। 4एह बरे आपन खुद क जउन कउनो इ बचवा क नाई आपन क नवावत ह, सरगे क राज्य में उहइ सबते बड़कवा अहइ।” 5अउर जउन कउनो अइसे गदेलन जइसे मनई क मोरे नाउँ में मान लेत ह उ मोका मान लेत ह।

**ईसू क पापन क बारेमा चेतउनी**

(मरकुस 9:42-48; लूका 17:1-2)

6मुला जउन मोह में बिसवास करइया मोरे कउनो अइसे गदेलन क रस्ते क रोड़ा बनि जात ह, नीक होइ कि ओकरे गटइया में एक तु जाँत क पाट लटकाइके गहरे समुद्र में बोर दीन्ह जाइ। 7संसार क मनइयन बरे ठोकर क कारण मोका दुख बाटइ मुला ठोकर तउ सदा आवत रइहीं। किंतु दुख तउ ओहें प अहइ जोकरे जरिये ठोकर आइ जात हीं।

8एह बरे तोहार हाथ या गोड़ तोहरे बरे मुसीबत बन जाई तउ ओका काटि के फेंक द्या काहेकि सरगे में बगैर हाथ या बे गोड़ क अनन्त जीवन में घुस जाइ पाउब तोहरे बरे

जियादा नीक अहइ। एँकरे बजाय कि दुइनउँ हाथ अउर गोड़वन क साथे तोहका नरके में न बुझइवाली आगी में नाइ दीन्ह जाइ। 9जदि तोहार आँखी तोहरे बरे बियाध बन जाइ तउ तू ओका बाहेर निकारि क डाइ द्या, काहेकि सरगे में काना होइके अनन्त जीवन में घुसि पाउब तोहरे बरे जिआदा बढ़िया बा, बजाय एँकर कि दुइनउँ आँखिन क संग तोहका नरके में डाइ दीन्ह जाइ।

**हेराइ गइ भेइ क दिस्तान्त कथा**

(लूका 15:3-7)

10“तउ देखा, मोर एँन गदेलन में स कउनो क तुच्छ जिन समइया। मई तोहका बतावत हउँ कि सरगे में बसइ मोरे परमपिता क लगे ओकर रच्छा करइवालन सरगदूतन क पहुँच सदा रहत ह। 11मनई क पूत भटक गवा मनइयन क उद्धार बरे आइ अहइ।

12“बतावा तू का गूथत मथत अहा? जदि कउनो क लगे सौ भेइ होई अउर ओहमाँ स एक भटक जाइ तउ का उ दूसर निन्नाबे क पहड़िया प तजिके उ एक तु भटक गइ भेइ क ढूँढ़इ न जाई? 13अउर ओका उ मिल जाई मई तोहसे सच सच कहत हउँ कि निन्नाबे क बजाय जउन खोई नाहीं रहिन, ओका पाइके खूब खुस होई। 14इ तरह सरगे में बसा तोहार परमपिता का नाहीं चाहत कि मोर इ अबोध चलन में स कउनो एक भी भटक जाइ।

**जब कउनो तोहार बुराइ करइ**

(लूका 17:3)

15“जदि तोहार भाई तोहरे संग कउनो बुरा बेवहार करइ तउ अकेल्ले में जाइके आपुस में ही ओकर दोख बताइ द्या। जदि उ तोहार सुनि लेइ तउ तू आपन भाई क फिन जीत लिहा। 16मुला जदि उ तोहार न सुनइ तउ एक दुइ क आपन संग लइ जा काहेकि हर बाते क दुइ तीन साच्छी होइ जाइ। 17जदि उ ओनकी भी न सुनइ तउ कलीसिया क बताइ द्या। अउर जदि उ कलीसिया क भी न मानइ तउ फिन तू ओसे अइसा बेवहार करा जइसे उ विधर्मी होइ जाइ या चुंगी क उगहिया।

18“मई तोहसे सच बतावत हउँ जउन कछू तू धरती प बँधब्या सरग में पभू क जरिये बाँधि दीन्ह जाई अउर जउन कउनो क तू धरती प न बँधब्या, ओका सरगे में परमेस्सर क जरिये न बान्धा जाई।

19“मई तोहसे इ भी बतावत हउँ कि इ धरती प जदि तोहमाँ स कउनो दुइ क बिचार मेल खात होई तउ एक होइ क सरगे में मोरे परमपिता स कछू मंगब्या तउ उ तोहरे बरे ओका पूरा करी 20काहेकि जहाँ मोरे नाउँ प दुइ या तीन मोरे मनवइयन क रूप में एकट्ठा होत हीं, हुवाँ मई ओनके संग हउँ।”

**छमा क न करइया नउकर क दिस्तान्त कथा**

21फिन पतरस ईसू क लगे गवा अउर बोला, “पभू, मोका आपन भाई क केतनी दाई आपन खिलाफ जुर्म करइ प छमा कइ देइ चाही? जदि उ सात दाई जुर्म करइ तउ भी?”

22ईसू कहेस, “न सिरिफ सात दाई, मुला मई तोहसे बतावत हई तोहका ओका सतहत्तर\* दाई तलक छमा करत जाइ चाही।”

23“सरगे राज्य क तुलना ओ राजा स कीन्ह जाइ सकत ह जउन आपन नउकरन स हिसाब अदा करइ क बिचारे रहा। 24जब उ हिसाब लेब सुरु करेस तउ ओकरे समन्वा एक अइसे मनई क लइ आवा गवा जेहँ प दसउ लाख रूपया निकरत रहा। 25मुला ओकरे लगे चुकाइ देइ क कउनो उपाय नाहीं रहा। ओकर मालिक हुकुम दिहेस कि उ नउकर क, ओकर पत्नी, ओकर बाल बचवन अउर जउन कछू माल असबाब अहइ, सब समेट के बेचे स कर्ज अदा कइ दीन्ह जाइ। 26एँह प ओकर नउकर ओकरे गोड़वा प गिरिके गिड़गिड़ाइ लाग, ‘धीरा धरा, मई सब कछू चुकाइ देइहउँ।’ 27तब जाइके मालिक क तरस आवा अउर ओकर कर्जा माफ कइ दिहेस।

28“फिन जब उ नउकर हुवाँ स जात रहा तउ ओका ओकर एक साथी नउकर मिला जेका सउ दिनारी\* देइ क रहा। उ ओकर ढोंढा पकड़िके गटइया क दबावत कहेस, ‘जउन तोहका मोर देइ क अहइ, लउटाइ द्या!’

29“एँह प ओकर साथी नउकर गोड़वा प गिरि गवा अउर बीसउ नह जोड़ेस, ‘धीरा धरा, मई तोहका दइ देब।’

30“मुला उ मना कइ दिहेस। एँतना ही नाहीं उ ओका तब तलक बरे, जब तलक उ ओकर कर्ज अदा न कइ देइ, जेल में पठएस। 31दूसर संगी नउकरन देखेन कि का भवा, उ सबइ बहोत दुखी भएन। जउन कछू भवा रहा, सब आपन मालिक क जाइके बताइ दिहेन।

32“तब ओकर मालिक ओका बोलाएस अउर कहेस, ‘अरे नीच नउकर, मई तोहार सारा कर्ज माफ कइ दिहउँ काहेकि तइ कहेस कि दाया क भीख द्या। 33का तोहका आपन संगी नउकर प दाया नाहीं करइ चाही जइसे मई तोह प दाया किहउँ?’ 34तउ ओकर मालिक कोहाइ गवा अउर ओका तब ताई सजा भुगतइ बरे सुपुर्द करेस जब ताई समूचा कर्ज अदा न होइ जाइ।

35“तउ जब तलक तू आपन भाई बंद क आपन मनवा स छमा नाहीं कइ दिहा मोर सरगे क परमपिता भी तोहरे साथ वइसा ही बेवहार करी।”

### तलाक

(मरकुस 10:1-12)

**19** इ बातन बताइ के ईसू गलील स लउटिके यहूदिया क पहेँटा में यरदन नदी क पार गवा। 2हुवाँ एक ठु भारी भीड़ ओकरे पाछे होइ गइ। उ बेरमिया मनई क चंगा किहेस।

3कछू फरीसियन ओका परखइ बरे ओकरे निअरे पहुँचेन अउर बोलेन, “का इ ठीक बाटइ कि कउनो आपन पत्नी क कउनो भी कारण स तलाक दइ सकत ह?”

**सतहत्तर** हियाँ साते क सत्तर गुना तक अरथ कीन्ह जाइ सकत ह। उत्पत्ति 4:24

**दिनारी** रूपया मूरे में एक दिनार लगभग चालीस पइसा क बराबर।

4जवाब देत ईसू कहेस, “का तू पवित्तर सास्तरन में नाहीं बाँच्या कि जबहि संसार क रचइया एँका रचेस, सुरुआत में, ‘उ एक पुरुस अउर एक स्त्री बनाएस?’\* 5अउर परमेस्सर कहे रहा, ‘इहइ कारण आपन महतारी बाप क तजिके पुरुस आपन पत्नी क संग होत भवा भी एक तन होइके रही।’\* 6तउ उ सबइ दुइ नाहीं रहतेन मुला एक रूप होइ जात हीं। एह बरे जेका परमेस्सर जोड़ेस ह ओका कउनो मनई क अलगावइ नाहीं चाही।”

7उ फरीसियन बोलेन, “फिन मूसा इ काहे ठहराएन ह कि कउनो पुरुस आपन पत्नी क तलाक दइ सकत ह। सर्त इ अहइ कि उ ओका तलाकनामा लिखि के दइ देइ।”

8ईसू ओनसे कहेस, “तोहरे मन की कठोरता क कारण मूसा पत्नी क तलाक देने की अनुमति तोहका दिहेस। मुला सुरुआत में अइसी रीति नाहीं रही। 9तउ मई तोहसे कहत हई कि जउन व्यभिचार क तजिके आपन पत्नी क कउनो अउर कारण स तलाक देत ह अउर कउनो दूसर स्त्री क बीहत ह तउ उ व्यभिचार करत ह।”

10एँह प ओकर चेलन ओसे कहेन, “जदि एक स्त्री अउर एक पुरुस क बीच अइसी बात होइ तउ कउनो क बिआह नाहीं करइ क चाही।”

11फिन ईसू ओनसे कहेस, “हर कउनो तउ इ उपदेस क नाहीं मानत। एँका बस उहइ मान सकत ह जेका एँकर छमता प्रदान की गइ अहइ। परमेस्सर स ताकत मिलि गइ अहइ। 12कछू अइसेन बाटेन जउन महतारी क गर्भ स नपुंसक पइदा भएन। अउर कछू एसे अहइ जउन लोगोन द्वारा नपुंसक बना दिन्हा अहई। अउर आखिर में कछू अइसे भी बाटेन जउन सरगे क राज्य क कारण बिआहनाहीं करइ क फइसला कइ लिहेन। इ उपदेस क जउन लइ सकत होइ, लइ ले।”

### ईसू क आसीबाद-गदेलन बरे

(मरकुस 10:13-16; लूका 18:15-17)

13फिन मनइयन कछू गदेलन क ईसू क लगे लइ आएन कि उ ओनके मुँडवा प हथवा धइके ओनका आसीबाद देइ अउ ओनके बरे पराथना करइ। मुला ओकर चेलन ओका डाटेन। 14ओह प ईसू कहेस, “गदेलन क रहइ द्या, ओनका जिन रोका, मोरे लगे आवइ द्या काहेकि सरगे क राज्य अइसेन क अहइ।” 15फिन उ गदेलन प आपन हाथ रखेस अउर हुवाँ स चला गवा।

### एक खास प्रश्न

(मरकुस 10:17-31; लूका 18:18-30)

16हुवाँ एक मनई रहा। उ ईसू क लगे आवा अउर कहेस, “गुरु अनन्त जीवन पावइ बरे मोका का नीक काम करइ चाही?”

17ईसू ओसे कहेस, “नीक का अहइ, एँकरे बारे में मोसे काहे पूछत अहा? काहेकि नीक तउ सिरिफ एक ही बाटइ।

‘उ ... बनाएस’ उत्पत्ति 1:27; यसा 5:2

‘इहइ ... रही’ उत्पत्ति 2:24

फिन भी तू अगर अनन्त जिन्नगी में घुसइ चाहत ह, तउ तू हुकुमन क मान ल्या।”

18उ ईसू स पूछेस, “कउन स हुकुम?”

तब ईसू बोला, “कतल जिन करा। व्यभिचार जिन करा। चोरी जिन करा। झूठी साच्छी जिन द्या। 19आपन बाप अउर आपन महतारी क इज्जत करा\* अउर ‘जइसे तू आपन खुद क पिआर करत ह, वइसे ही आपन पड़ोसी स पिआर करा।\*”

20नउजवान ईसू स पूछेस, “मई एन सब बातन क पालन किहेउँ ह। अब मोहमाँ कउने बात क कमी अहइ?”

21ईसू ओसे कहेस, “जदि तू सिद्ध बनइ चाहत अहा तउ जा अउर जउन कछू तोहरे लगे बा, ओका बेचिके धन गरीबन क दइ द्या जेहसे सरग में तोहका धन मिल सकइ। फिन आवा अउर मोरे पाछे होइ जा।”

22मुला जब उ नउजवान मनई इ सुनेस तउ उ दुखी होइके चला गवा काहेकि उ बहोत धनी रहा। 23ईसू आपन चेलन स कहेस, “मई तोहसे सच कहत हउँ कि धनी क सरगे क राज्य में घुसि पाउब मुस्किल बाटइ। 24हौं मई तोहसे कहत हउँ कि कउनो धनी मनई क सरग क राज्य में घुसि पाउब स एक ऊँट क सुई क छेद स निकर जाब सहल बा।”

25जब ओकर चेलन सुनेन तउ अचरज में आइके पूछेन, “फिन केकर उद्धार होइ सकत ह?” 26ईसू ओनका देखत भवा कहेस, “मनइयन बरे इ असम्भव बाटइ मुला परमेस्सर बरे सब कछू होइ सकत ह।”

27जवाबे में पतरस ओसे कहेस, “देखा, हम पचे कछू तजिके तोहरे पाछे होई गएन ह। तउ हमका का मिली?”

28ईसू ओनसे कहेस, “मई तू सबन स सच कहत हउँ कि नवा जुग में जब मनई क पूत आपन प्रतापी सिंहासने प बिराजी तउ तू भी, जउन मोरे पाछे अहा, बारह सिंहासन प बइठिके इस्त्राएल क बारह कबीले क निआव करब्या। 29अउर मोरे बरे जेतना भी घर-बार या भाइयन या बहिनियन या बाप या महतारी या बचवन या खेतन क तजि दिहे अहा, उ सब सौ गुना जिआदा पाइ अउर अनन्त जीवन क हकदार होई। 30मुला बहोत स जउन अब पहिले अहई, पिछला होइ जइहीं अउर जउन पिछला अहई उ पहिले होइ जइहीं।”

### मजूर क दिस्तान कथा

**20** “सरगे क राज्य एक जमींदार क नाई बाटइ जउन भिन्सारे आपन अंगूरे क बगीचा बरे मजदूर लइ आवइ निकरा। 2उ चाँदी क एक रूपया प मजदूर क लगाइके ओनके आपन अंगूरे क बगिया में काम करइ पठएस।

3“नौ बजे क करीब जमींदार फिन घरवा स निकरा अउर उ देखेस कि कछू मनई बजारे में ँहर ओहर अइसे ही बेकार खड़ा रहेन। 4तब उ ओनसे कहेस, ‘तू पचे भी मोरे

अंगूरे क बगीचा में जा, मई तोहका जउन कछू ठीक अहइ, देब।’ 5तउ उ पचे भी बगीचा में काम करइ गएन।

“फिन करीब बारह बजे अउर दुबारा तीन बजे क करीब, उ वइसा ही किहेस। 6करीब पाँच बजे उ फिन आपन घरवा स गवा अउर कछू मनइयन क बजारे में ँह कइँती ओह कइँती खड़ा देखेस। उ ओनसे पूछेस, ‘तू हियाँ दिन भइ बेकार ही काहे खड़ा होइ रहया?’

7“उ सबइ ओसे कहेन, ‘काहेकि हम सबन क कउनो मजूरी प नाहीं राखेस।’ उ ओनसे कहेस, ‘तू भी मोरे अंगूर क बगीचा में चला जा।’

8“जब साँझ भइ तउ अंगूर क बगीचा क मालिक आपन प्रधान करमचारी क कहेस, ‘मजून क बोलाइके आखिरी मजूरे स सुरू कइके जउन पहिले लगावा ग रहेन ओन सबन क मजूरी दइ द्या।’

9“तउ उ पचे जउन पाँच बजे लगावा रहेन, आएन अउ ओहमाँ स हर एक क बस एक ही चाँदी क रूपया मिला। 10फिन जउन पहिले लगावा ग रहेन, उ आएन उ सोचेन ओनका कछू जिआदा मिली मुला ओनमा हर कउनो क एक ठु चाँदी क रूपया मिला। 11रूपया तउ उ सबइ लइ लिहन मुला जमींदारे स सिकाएत करत

12उ सबइ कहेन, ‘जउन पाछे लगावा रहेन, उ पचे बस एक ही घंटा भइ काम किहेन अउ तू हम पचेन क ओतेंना ही दिहा जेतेंना ओनका। जब कि हम पचे दिन भइ चिलचिलात धूपे में मेहनत कीन्ह।’

13“उ जवाबे में ओहमाँ स कउनो एक स जमींदारे कहेस, ‘मीत, मई तोहरे साथ कउनो अनिआव नाहीं कर्यों ह। का हम पचे तय नाहीं कीन्ह कि मई तोहका चाँदी क एक ठु रूपया देब? 14जउन तोहार होत ह, ल्या अउर चला जा। मई सबते पाछे रखा गवा इ मजदूर क ओतेंना ही मजूरी देइ चाहब जेतेंना तोहका देत अही। 15का मोका इ अधिकार नाहीं कि जउन मई आपन धने क चाहूँ, कइ सकउँ? मई अच्छा हउँ का तू ऐसे मने में जरत ह?’ 16इ तरह आखिरी पहिले होइ जइहीं अउर पहिले आखिरी होइ जइहीं।”

### ईसू आपन मउत क बारे में बताएस

(मरकुस 10:32-34; लूका 18:31-34)

17जब ईसू आपन बारहु चेलन क संग यरूसलेम जात रहा तउ उ ओनका एक कइँती लइ गवा अउर चलत चलत ओनसे बोला, 18“सुना, हम यरूसलेम पहुँचइ क अही। मनई क पूत हुवाँ मुख्ययाजकन अउर धरम सास्तिरियन क हाथे में दइ दीन्ह जाई। उ पचे ओका मृत्युदण्ड क काबिल ठहरइहीं। 19फिन ओकर हँसी हँसारत करवावइ अउर कोड़न स पिटवावइ बरे ओका गौर यहूदियन क दइ देहहीं। फिन ओका क्रूस प चढ़ाइ दीन्ह जाई। मुला तिसरे दिन उ फिन जी उठी।”

### एक महतारी क गदेलन बरे खास चिरौरी

(मरकुस 10:35-45)

20फिन जब्दी क पूतन की महतारी आपन पूतन क संग

‘कतल ... करा’ निर्गमन 20:12-16

‘जइसे ... करा’ लैव्य. 19:18

ईसू क नगिचे गई अउर उ निहुरिके पराथना करत ओसे कछू माँगसे।

21ईसू ओसे पूछेस, “तू का चाहति अहा?”

उ बोली, “मोका बचन द्या कि मोर इ दुइनउँ बेटवन तोहरे राज्य में एक तोहरे दाहिन अउर दूसर तोहरे बाई कइँती बइठई।”

22ईसू जवाब दिहस, “तू नाहीं जानत अहा कि तू का माँगत बाट्या? का तू यातनाओं क कटोरा पिउ सकत अहा, जेहका मईँ पिअइवाला हउँ?”

उ सबइ ओसे कहेन, “हाँ पिउ सकित ह।”

23ईसू ओनसे बोला, “तू पचे सचमुच उ पिआला पीब्या। मुला मोर दाहिन अउर बाईँ कइँती हक क देवइया मईँ नाहीं हउँ। हियाँ बइठइ क हक तउ ओनही का बा, जेनके बरे इ मोर परमपिता क जायिरे रक्खा गवा अहइ।”

24जब बाकी दसउ चेलन इ सुनेन कि तउ उ पचे दुइनउँ भाइयन प बहोत कोहाय गएन। 25तबबइ ईसू ओनका आपन नगिचे बोलाइके कहेस, “तू जानत ह कि गैर यहूदियन राजा, प्रजा प आपन सक्ती देखावा चाहत हीं अउर ओनके खास नेता, मनइयन प आपन हक जमावा चाहत हीं। 26मुला तोहरे बीच अइसा न होइ चाही। मुला तो हम स जउन बइवार बनब चाही, तोहार नउकर बनइ।

27“अउ तोहमाँ जउन कउनो पहिला बनब चाही, ओका तोहार गुलाम जरूर बनइ क होई। 28तोहका मनई क पूत जइसा होइ क चाही जउन आपन सेवा करावइ नाहीं, मुला सेवा करइ अउर बहोतन क छुटौती बरे आपन प्रान क फिरौती देइ आवा अहइ।”

### अँधरे क आँखी

(मरकुस 10:46-52; लूका 18:35-43)

29जब उ सबइ यरीहो सहर स जात रहेन भारी भीड़ ईसू क पाछे होइ गइ। 30हुवाँ सरक क किनारे दुइ आँधर बइठा रहेन। जब उ सबइ सुनेन कि ईसू हुवाँ स जात बाटइ, उ पचे नरियानेन, “पभूँ, दाऊद क पूत! हम प दाया कर!”

31एँह प भीड़ ओनका धमकावत चुप रहइ क कहेस। पर उ पचे अउ जिआदा चिल्लानेन, “पभूँ, दाऊद क पूत। हम प दाया कर।” 32फिन ईसू रुकि गवा अउ ओनका बोलाएस। उ कहेस, “तू का चाहत अहा, मईँ तोहरे बरे का करउँ?”

33उ पचे ओसे कहेन, “पभूँ, हम चाहित ह कि फिन स निहारइ लागी।”

34ईसू क ओन प दाया आइ। उ ओनकइ अँखियन क छुएस, अउर तुरंतहि उ पचे फिन लखइ लागेन। उ पचे ओकरे पाछे होइ गएन।

### ईसू राजा क नाई यरूसलेम में घुसत ह

(मरकुर 11:1-11; लूका 19:28-38; यूहन्ना 12:12-19)

21 ईसू अउर ओकर चेलन जब यरूसलेम क लगे जैतून पहाड़े क नगिचे बैतफगे पहुँच गएन। 2तउ ईसू आपन दुइ चेलन क इ हुकुम दइके पठएस, “आपन सोझइ समन्वा क गाउँ में जा अउर हुवाँ जात भए ही

तोहका एक गदही बाँधी मिली। ओकरे लगे ओकर बच्चा भी मिली। ओनका बाँधिके मोरे लगे लइ आवा। 3जदि कउनो तोहसे कछू कहइ तउ ओसे कह्या, ‘पभूँ क ँँकर जरूरत अहइ। उ फउरन ही लउटाइ देई।’”

4अइसा यह बरे भवा कि नबी अइसा कहे रहा:

5“सिय्योन क नगरी स कहि द्या, ‘देखा तोहार राजा तोहरे लगे आवत बा। उ नमनसील अहइ, अउर गदहे प सवार अहइ हाँ गदहे क बच्चा प जउन एक लादइवाला पसु क बच्चा अहइ।’”

जकर्याहि 9:9

6तउ ओकर चेलन चला गएन अउ वइसा ही किहेन जइसा ओनका ईसू बताए रहा। 7उ पचे गदही अउर ओकरे बच्चा क लइ आएन। अउर ओन प आपन ओढ़ना डार दिहन काहेकि ईसू क बइठब रहा। 8बहोत मिला आपन ओढ़ना राहे मँ दसाइ दिहेन अउ दूसर मनइयन बृच्छ क टहनी काटेन अउर ओनका राहे प बिछाइ दिहेन। 9जउन मनई ओकरे आगे चलत रहेन अउर जउन मनई पाछे चलत रहेन, सब पुकारि क कहत रहेन:

“दाऊद क पूत क होसन्ना! \* धन्य अहइ जउन पभूँ क नाउँ प आवत बाटइ! सरगे मँ बिराजेस परमेस्सर क होसन्ना!”

भजन संहिता 118:26

10तउ जब उ यरूसलेम मँ घुसा तब समूचा सहर मँ हड़बड़ाइ गवा। लोग पुछइ लागेन, “इ कउन अहइ?”

11लोग ही जवाब देत रहेन, “इ गलील क नासरत क नबी ईसू अहइ।”

### ईसू मंदिर मँ

(मरकुस 11:15-19; लूका 19:45-48; यूहन्ना 2:13-22)

12फिन ईसू मंदिर क अहाते मँ आवा अउर उ मंदिर क अहाते मँ जउन बेंचत बेसहत रहेन, ओन सबन क बाहरे खदेरेस। उ पइसा क लेवइया देवइया क चउकी उलटि दिहस अउ कबूतरे क दुकानदार क तखता पलटेस। 13उ ओनसे कहेस, “पवित्तर सास्तरन मँ कहत बा, ‘मोर घर पराथना घर कहा जाई।’ \* मुला तू सबइ ँँका ‘डाकुअन क अइडा’ बनावत अहा।” \*

14मंदिर मँ कछू आँधर, लंगड़ा लूला ओकरे लगे आएन। जेनका उ नीक किहेस। 15जब मुख्ययाजकन अउर धरम सास्तिरियन ओकर अचरज कारजन क लखेन जउन उ किहे रहा अउर मंदिर मँ गदेलन क ऊँची आवाजे मँ कहत सुनेन: “दाऊद क पूत क होसन्ना।”

16तउ उ पचे कोहाइ गएन अउ ओसे पूछेन, “तू सुनत अहा इ सबन का कहत अहई?”

ईसू ओनसे कहेस, “हाँ सुनत अही। का पवित्तर सास्तर

होसन्ना इ एक इब्रानी सब्द अहइ। पहिले एकर प्रयोग परमेस्सर स मदद मांगइ बरे कीन्ह जात रहा। मुला इ जगह पइ परमेस्सर या मसीह क तारीफ करत भव आनंद परगट करइ बरे भवा अहइ।

मोर ... जाई यसायाह 56:7

‘डाकुअन ... अहा’ यिर्म. 7:11

में तू बचन नहीं पढ़्या, 'तू गदेलन अउर दूधमुँहन बचवन स स्तुति कराया ह।'\* 17फिन उ ओनका हुवँइ तजिके यरूसलेम सहर स बाहेर बैतनिय्याह चला गवा। जहाँ उ राति बिताएस।

### बिसवास क सक्ती

(मरकुस 11:12-14; 20-24)

18दूसर दिन अलख भिन्सारे जब उ सहर लउटत रहा तउ ओका भूख लागि। 19रस्ता क किनारे अंजीर क बिरवा क लखेस तउ उ ओकरे नगिचे गवा, मुला ओका ओह प पातन क छोड़िके कछू नहीं मिल सका। तब उ बिरवा स कहेस, "तोह प आगे कछू फल न लागइ।" अउर अंजीरे क बृच्छ फउसन झुराइ गवा।

20जइसेन चेलन इ निहारेन तउ अचरजे में आइके पूछेन, "इ अंजीरे क बिरवा ऐतनी हाली कइसे झुराइ गवा?"

21ईसू जवाब देत भवा ओन पचेन स कहेस, "मई तोहसे सच कहत हउँ जदि तोहरे में बिसवास अहइ अउ तू संदेस नहीं करत बाट्या तउ तू न सिरिफ उ कइ सकत ह जउन मई अंजीरे क बृच्छ कीन्ह, मुला जदि तू इ पहाड़े स कहि द्या, 'उठा अउर आपन क सगरे में बोर द्या' तउ उहइ होइ जाई। 22अउर पराथना करत तू जउन कछू मंगब्या, जदि तोहका बिसवास बा तउ तू पउब्या।"

### यहूदी नेता लोगनक ईसू क हक प सक

(मरकुस 11:27-33; लूका 20:1-8)

23ईसू जब जाइके मंदिर में उपदेस देत रहा। मुख्ययाजकन अउर बुजुर्ग यहूदी नेतन ओसे पूछेन, "अइसी बातन क तू कउने हक स करत ह? अउर इ हक तोहका कउन दिहस?"

24जवाबे में ईसू ओनसे कहेस, "मई तोहसे भी एक सवाल पूछत हउँ, जदि तू ओकर जवाब मोका दइ द्या तउ मई तोहका बताइ देब कि मई इन बातन क कउने हक स करत हउँ। 25बतावा यूहन्ना क बपतिस्मा कहाँ ते मिला रहा? परमेस्सर स या मनई स?"

उ सबइ आपुस में सोच बिचारिके कहइ लागेन, "जदि हम पचेन कहत अही, 'परमेस्सर स' तउ इ हमसे पूछी, 'फिन उ ओह प बिसवास काहे नहीं करत्या?' 26किंतु जदि हम कहित ह, 'मनई स' तउ हमका मनइयन क उर बाटइ काहेकि उ पचे यूहन्ना क एक नबी मानत ही।"

27तउ जवाबे में उ सबइ ईसू स कहेन, "हमका पता नहीं?"

एह प ईसू ओनसे बोला, "ठीक बा तउ फिन मई भी तोहका नहीं बतावत हउँ कि इ बातन क मई कउने हक स करत हउँ।"

### यहूदियन बरे एक दिस्तान्त कथा

28"अच्छा बतावा तू पचे एँकरे बारे में का सोचत अहा? एक मनई क दुइ बेटवा रहेन। उ बड़के क लगे गवा अउर बोला, 'बेटवा आज मोरे अंगूर क बगिया में जा अउर काम करा।'

29"मुला बेटवा जवाब दिहस, 'मोर मन नहीं बा, मुला पाछे ओकर मन फिरि गवा अउर उ चला गवा।'

30"फिन उ बाप दुसरे बेटवा क लगे गवा अउर ओसे भी बइसे ही कहेस। जवाबे में बेटवा कहेस, 'जी हौं,' मुला उ गवा नहीं।

31"बतावा इन दुइनउँ में स जउन बाप चाहत रहा, कउन किहेस?" यहूदी नेतन कहेन, "बड़कवा।"

ईसू ओनसे कहेस, "मई तोहसे सच कहत हउँ। चुंगी उगहिया अउर वेस्यन परमेस्सर क राज्य में तोहसे पहिले जइहीं। 32इ मई यह बरे कहत हउँ काहेकि बपतिस्मा देवइया यूहन्ना तोहका जिन्नगी क सही रस्ता देखवइ आइ अउर तू ओहमों बिसवास नहीं किहा। मुला चुंगी उगहिया अउर वेस्यन ओहमों बिसवास किहेन। तू जब इ देख्या तउ पाछे न मन फिरावा किहा अउ न ओहे प बिसवास।

### परमेस्सर क आपन पूत क पठउब

(मरकुस 12:1-12; लूका 20:9-19)

33"एक तु अउर दिस्तान्त कथा सुना: एक जमींदार रहा। उ अंगूरे क बगिया लगाएस। ओकरे चरिउँ कइँती बाड़ा लगाएस। फिन अंगूरे क रस निकारइ बरे कोल्हू बनवइ क एक गइहा खोदेस अउर रखवारी बरे एक गुंबद बनवाएस। फिन ओका बटाई प दइके जात्रा प चला गवा। 34जब अंगूरे क फसल क समइ आइ तउ बगिया क मालिक नउकरन क लगे आपन गुलामन क पठएस जेसे आपन हीसा अंगूर लइ आवइँ।

35"मुला किसानन ओकरे नउकरन क धइ लिहन। कउनो क पीटेन, कउने प पाथर उछारेन अउर कउनो क तउ मारि डाएन। 36एक दाई फिन पहिले स अउ जिआदा नउकरन क पठएस। उ किसानन ओनके संग भी वइसा ही बर्ताव किहेन। 37पाछे उ ओनके लगे आपन बेटवा क पठएस। उ कहेस, 'उ सबइ मोरे बेटवा क मान रखिहइँ जरूर।'

38"मुला उ किसानन जब ओकरे बेटवा क देखेन तउ उ सबइ आपुस में कहइ लागेन, 'इ तउ ओकर वारिस अहइ, आवा एँका मारि डाई अउर ओकर वारिस क हक हथियाइ लेई।' 39एह प उ पचे ओका धइके बगिया क बाहेर ढकेलेन अउर मारि डाएन।

40"तू का सोचत बाट्या हुवँ जब अंगूरे क बगिया क मालिक आई तउ किसानन क संग का करी?"

41उ यहूदी याजकन अउ नेतन ओसे कहेन, "काहेकि उ सबइ निरदयी रहेन यह बरे उ ओनका निरदयी होइके मारि डाई अउर अंगूरे क बगिया क दूसर किसानन क बटाई प दइ देइ जउन फसल आवइ प ओका ओकर हीसा देइहीं।"

42ईसू ओनसे कहेस, "का तू सबइ पवित्तर सास्तरन क बचन कभी नहीं पढ़्या:

'जउनो पाथर क मकान क बनवइयन बेकार समझेन, उहइ कोने क सबते जिआदा महिमा क पाथर बन गवा' 'अइसा पभू क जारिये कीन्ह गवा जउन हमरी निगाह में अजूबा बाटइ।'

43“एह बरे मईं तोहसे कहत हउँ परमेस्सर क राज्य तोहसे छीन लीन्ह जाई अउर उ ओन मनइयन क दइ दीन्ह जाई जउन ओकरे राज्य क रीति स बर्ताव करिहई। 44जउन इ चट्टाने प गिरी, चूर चूर होइ जाई अउ इ चट्टान कउनो प गिरी तउ उ ओका रउँड डई।”

45जब मुख्ययाजकन अउर फरीसियन ईसू क दिस्टान्त कथन क सुनेन तउ उ पचे समुझ लिहन कि उ ओनके बारे में कहत रहा। 46तउ उ सबइ ओका धरइ क जतन किहन मुला उ पचे मनइयन स डेरात रहेन काहेकि लोग ईसू क नबी मानत रहेन।

### बियाहे क भोज प लोगनक क राजा क बोलावइ क दिस्टान्त कथा

(लूका 14:15-24)

**22** एक दाई फिन ईसू ओनसे दिस्टान्त कथन क कहइ लाग। उ बोला, 2“सरगे क राज्य उ राजा का नाई अहइ जउन आपन बेटवा क बियाहे प भोज दिहेस। 3राजा आपन नउकरन क पठएस कि उ पचे ओन मनइयन क बोलाइ लियावई जेका बियाहे क भोज प न्यौता दीन्ह गवा रहा। मुला उ पचे नाहीं आएन।

4“उ आपन नउकरन क फिन पठएस, उ कहेस कि जउन मनइयन क बियाह क भोजे प बोलावा गवा ह, ओनसे कहि द्या, ‘देखा मोर भोज तइयार बा। मोर सॉइ अउर मोटवार ताजा पसू क काटा जाइ चुका बाटइ। सब कछू तइयार अहइ। बियाहे क भोज में आइ जा।’

5“मुला न्यौतहरी ओह प कउनो धियान नाहीं दिहेन अउर उ सबइ चले गएन। कउनो आपन खेत में काम करइ चला गवा तउ दूसर मिला आपन आपन काम धंधा पा। 6अउ कछू मिला तउ राजा क नउकरन क धइके ओकरे साथे मार-पीट किहेन अउ ओनका मार डाएन। 7तउ राजा कोहाइके आपन फउज पठएस। उ सबइ ओन हत्यान क मउत क घाते पहुँचाइ दिहेस अउर ओनके सहर में आगी बार दिहेन।

8“फिन राजा क नउकरन स कहेस, ‘बियाह क भोज तइयार बाटइ मुला जेको बोलाइ गवा रहा, उ सबइ अजोगग माना गएन, 9एह बरे गलियन क नोक्कड़ प जा अउर तू जेका पावा, बियाहे क भोज प बोलाइ लिआवा।’ 10फिन नउकरन गलियन में गएन अउ जउन भी भला अउर बुरा मनई भेंटेन उ पचे ओनका बटोरि लियाएन। अउ सादी क महल मेहमानन स भरि गवा।

11“मुला जब जेवन्हार क लखइ राजा आवा तउ हुवाँ उ एक अइसा मनई क निहारेस जउन बियाहे क ओढ़ना नाहीं पहिरे रहा। 12राजा ओसे कहेस, ‘मितउ, बियाहे क वस्तर पहिरे बिना हियोँ भीतर कइसे आइ गया?’ पर उ मनई खमोस रहा। 13एह प राजा आपन नउकरन स कहेस, ‘एँकर हाथ गोड़ छौँदिके बाहेर अँधियारे में नाइ द्या। जहाँ मनई रोवत अउर दँतवा कटकटावत होइहीं।’

14“काहेकि बोलावा तउ बहोत गवा अहई मुला चुना भवा थोड़के अहई।”

### यहूदी नेतन लोगनक छलावा

(मरकुस 12:13-17; लूका 20:20-26)

15तब फरीसियन जाइके एक सभा बोलाँएन जेसे उ इ बात क फरियाइ सकई कि ईसू क ओकरे आपन ही कही भई बात में कइसे फँसावइ। 16उ पचे अपने चलन क हिरोदियन क संग ओकरे लगे पठएन उ मनइयन ईसू स कहेन, “गुरु हम जानत अही कि तू सच्चा अहा। तू सचमुच परमेस्सर क रहे क सिच्छा देत अहा। अउर तू, कउनो का सोचत ह, एँकइ चिंता नाहीं करत्या काहेकि तू कउनो मनई क हैसियत प नाहीं जात्या। 17तउ हमका बतावा तोहार का बिचार बा कि सम्राट कैसर क चुंगी चुकाउब ठीक अहइ कि नाहीं?”

18ईसू ओनकइ बुरा बिचार क समुझ गवा, तउ उ बोला, “अरे कपटियो! तू पचे मोका काहे परखब चाहत बाट्या? 19मोका कउनो दीनार देखावा जेसे तू चुंगी अदा करत हा।” तउ सबइ ओकरे लगे एक दीनार लइ आएन। 20तब उ ओनसे कहेस, “एँह प केकर मूरत अउर लिखाई खुदी बा?”

21उ पचइ ओसे कहेन, “कैसर क।”

तब उ ओनसे कहेस, “अच्छा तउ फिन जउन कैसर क अहइ, ओका कैसर क द्या, अउर जउन परमेस्सर क अहइ, ओका परमेस्सर क।” 22इ सुनिके उ पचइ अचरजे स भरि गएन अउर ओका छोड़िके चला गएन।

### सदूकियन क चाल

(मरकुस 12:18-27; लूका 20:27-40)

23उहइ दिन कछू सदूकियन जउन पुनरुत्थान क नाहीं मनतेन, ओकरे लगे आएन। 24अउ ओसे पूछेन, “गुरु, मूसा क उपदेस क अनुसार जदि बिना बे बाल बच्चा क कउनो मरि जाइ तउ ओकर भाई, निचके क नातेदार होइ क नाते ओकरे विधवा स बियाह करइ अउर आपन भाई क बंस चलावइ बरे संतान पइदा करइ। 25अब मान ल्या हम पचे सात ठु भाई अही। पहिलौटा बेटवा का बियाह भवा अउर पाछे ओकर मउत होइ गइ। फिन काहेकि ओकरे कउनो संतान नाहीं भइ, यह बरे ओकर भाई आपन भउजी क आपन पत्नी बनइ लिहस। 26तब दुसरका भाई मरि गवा। उहइ घटना तिसरेक क संग भइ। जब तलक सातहु भाइयन मरि नाहीं गएन वइसन भवा। 27अउर सब क पाछे उ स्त्री भी मर गई। 28अब हमार पूछब इ अहइ कि पुनरुत्थान में ओन सातउ में स कउने क पत्नी होई काहेकि सातउ ओका आपन बनाएन?”

29जवाब देत ईसू ओनसे कहेस, “तू बगद गया काहेकि तू पचे पवित्तर सास्तरन अउर परमेस्सर क सक्ती क नाहीं जनत्या। 30तोहका समझइ चाही कि पुनरुत्थान में लोग न तउ बियाह करिहीं अउर न ही कउनो सादी में दीन्ह जाई। मुला उ पचे सरगे क दूतन क नाई होइहीं। 31इहइ सिलसिला में तोहरे फायदा बरे परमेस्सर मरा भवा क पुनरुत्थान क बारे में जउन कहेस ह, का तू कबहुँ नाहीं पद्या? उ कहे रहा, 32‘मईं इब्राहीम क परमेस्सर हउँ, इसहाक क परमेस्सर हउँ अउर याकूब क परमेस्सर हउँ।’\*

\*मईं ... हउँ निर्गमन 3:6

उ मरा हुअन क नाही मुला जिन्दा क परमेस्सर अहइ।”  
33जब मनइयन इ सुनेन तउ ओकरे उपदेस प उ सबइ बहोत  
अचम्भा में पड़ि गएन।

### सबन ते बड़का हुकुम

(मरकुस 12:28-34; लूका 10:25-28)

34जब फरीसियन इ सुनेन कि ईसू आपन जवाबे स  
सदूकियन क चुप कराइ दिहस तब उ सबइ ऍकट्टा भएन।  
35ओहमों क एक फरीसी ईसू क परीच्छा क बिचार स  
ओसे पूछेन, 36“गुरु, व्यवस्था में सबन ते बड़का हुकुम  
कउन स बाटइ?”

37ईसू ओसे कहेस, “तोहका आपन सारे मनवा स, सारी  
आतिमा स अउर सारी बुद्धि स आपन परमेस्सर पर्भू क  
पिरेम करइ चाही।\* 38इ सब ते पहिला अउर सब ते बड़ा  
हुकुम अहइ। 39फिन अइसा ही दूसर हुकुम इ अहइ:  
‘आपन पड़ोसी स वइसा ही पिरेम करा जइसा तू अपने स  
खुद करत ह।’\* 40सारी व्यवस्था अउर नबियन क किताबन  
इन दुइनउँ हुकुमन प टिका बाटइ।”

### ईसू क फरीसियन स एक सवाल

(मरकुस 12:35-37; लूका 20:41-44)

41जब फरीसियन अबहीं एकट्टा ही रहेन, कि ईसू  
ओनसे एक ठु प्रस्न पूछेस, 42“मसीह क बारे में तू का  
बिचारत ह कि उ केकर बेटवा अहइ?”

उ फरीसियन ओसे कहेन, “मसीह दाऊद क पूत ह।”  
43ईसू ओसे पूछेस, “फिन आतिमा क बसे में होइके दाऊद  
ओका ‘पर्भू’ कहत इ काहे कहेस:

44‘पर्भू मोरे पर्भू (ईसू) स कहेस: मोरे दाहिन बइठिके  
राज्य करा जब ताई कि मई दुस्मनन क तोहरे गोइवा तले  
न कइ देउँ।’  
भजन संहिता 110:1

45फिन जब दाऊद ओका ‘पर्भू’ कहेस तउ उ ओकर  
बेटवा कइसे होइ सकत ह?” 46जवाबे में कउनो भी ओसे  
कछू नाही कहि पावा। अउर न ही उ दिना क पाछे कउनो  
क ओसे पूछइ क हिम्मत भवा।

### ईसू यहूदी धरम नेतन क नुक्ताचीनी किहेस

(मरकुस 12:38-40; लूका 11:37-52; 20:45-47)

**23** ईसू फिन आपन चेलन अउर भीड़ स कहेस। 2उ  
कहेस, “धरम सास्तिरियन अउर फरीसियन मूसा क  
व्यवस्था क अरथ बतावइ क हकदार अहइ। 3एह बरे जउन  
कछू उ सबइ कहइँ ओह प चलत रहा अउर ओनका  
मानके करत रहा। मई इ कहत हउँ काहेकि उ पचे बस  
कहत रहत हीं मुला करतेन नाही। 4उ पचे मनई क काँधि प  
एतना बोझा लादि देत हीं कि उ सबइ ओका उठाइके चल  
न सकइँ अउर लोगन्य दबाव डारत हीं कि ओका लइके

चलइँ। मुला उ सबइ खुद ओहमों स कउनो प भी चलइ  
बरे आपन अंगुरी तलक नाही हिलउतेन।

5“उ सबइ नीक काम यह बरे करत हीं कि लोग  
ओनका लखइँ। असिल में उ सबइ आपन ताबीज अउर  
पोसाक क झलरे क यह बरे बड़ा स बड़कवा करत रहत हीं  
कि लोग ओनका धर्मात्मा समझइँ। 6उ सबइ जेवनार में  
सबते जिआदा खास जगह पावा चाहत हीं। आराधनालयन में  
ओनका प्रमुख आसन चाही। 7बजारे में उ पचे मान क साथ  
पैलगी करावा चाहत हीं। अउ चाहत हीं कि लोग ओनका  
‘गुरु’ कहिके पुकारइँ।

8“मुला तू पचे मनइयन स आपन क ‘गुरु’ जिन कहवावा  
काहेकि तोहार सच्चा गुरु तउ बस एक अहइ। अउर तू  
सबइ सिरिफ भाई बहिन अहा। 9धरती प मनइयन क आपन  
में स कउनो क भी ‘पिता’ जिन कहइ द्या। काहेकि तोहार  
‘पिता’ तउ बस एक ही अहइ, अउ उ सरगे में बा। 10न ही  
तू मनइयन क आपन बरे ‘स्वामी’ कहइ द्या काहेकि तोहार  
स्वामी तउ बस एक ठु बाटइ अउ उ अहइ मसीह।  
11तोहमों सब ते बड़कवा मनई उहइ होई जउन तोहार  
नउकर बनी। 12जउन आपन खुद क उँचा उठाई ओका  
नवई क होई। अउर जउन आपन खुद नवाई ओका ऊँचा  
उठाइ जाइ।

13“हे कपटी धरम सास्तिरियो अउर फरीसियो! तोहका  
धिक्कार अहइ। तू सबइ सरगे क राज्य क दुआर ढॉपि दिहा  
ह। न तउ तू पचे ओहमों घुसि पउब्या अउर न ही ओनका  
जाइ देब्या जउन घुसइ बरे जतन करत हीं। 14अरे कपटा  
धरम सास्तिरियन अउ फरीसियन तू पचे विधवा क धन  
दौलत हड़पत ह। देखँवा बरे बड़ी बड़ी पराथना करत ह।  
एकरे बरे तोहका करी सजा मिली।

15“अरे कपटी धरम सास्तिरियो अउर फरीसियो! तोहका  
धिक्कार अहइ। तू कउनो क आपन मत में लइ आवइ बरे  
धरती अउर समुदर पार कइ जात ह। अउ उ तोहरे नेम  
धरम में आइ जात ह तउ तू ओका आपन स भी दुइ गुना  
नरक क काबिल बनाइ देत ह।

16“अरे कपटी धरम सास्तिरियो अउर फरीसियो! तोहका  
धिक्कार अहइ। तोहका धिक्कार अहइ जउन कहत ह, ‘जदि  
कउनो मंदिर क सपथ खात ह तउ ओका सपथ क खाब  
जरूरी नाही मुला अगर कउनो मंदिरे क सोने सपथ खात ह  
तउ ओका सपथ क मानब जरूरी अहइ!’ 17अरे आँधर मूर्ख  
लोगो! बड़का कउन अहइ? मंदिर क सोना या उ मंदिर  
जउन उ सोना क पवित्तर बनएस। 18तू सबइ इ भी कहत  
ह, ‘जदि कउनो वेदी क सपथ खात ह तउ कछू नाही, मुला  
जदि कउनो वेदी प धरा चढ़ावा क सपथ खात ह तउ आपन  
सपथ स बँधा भवा अहइ।’ 19अरे आँधर लोगो! कउन  
बड़कवा अहइ? वेदी प धरा चढ़ावा या उ वेदी जेसे उ  
चढ़ावा पवित्तर बनत ह? 20यह बरे जदि कउनो वेदी क  
सपथ लेत ह तउ उ वेदी क साथे वेदी प जउन धरा बाटइ,  
उ सबन क सपथ खात ह।

21“उ जउन मंदिर अहइ, ओकर भी सपथ लेत ह उ  
मंदिर क संग जउन मंदिर क भितरे बा, ओकर भी सपथ  
खात ह। 22अउर उ जउन सरगे क सपथ खात ह, उ

परमेस्वर क सिंहासने क संग जउन उ सिंहासने प बिराजत बा ओकर भी सपथ खात ह।

23“अरे कपटी धरम सास्तिरियो अउर फरीसियो! तोहका धिक्कार अहइ। तोहरे लगे जउन कछू अहइ, तू ओकर दसवाँ, हींसा, हीयोँ तलक कि आपन पुदीना, सौँफ अउर जीरा तक क दसवाँ हींसा परमेस्वर क देत ह। फिन भी तू व्यवस्था क खास बातन, निआव, दाया अउर बिसवास क धकियाइ दिहा। तोहका इ चाहत रहा कि ओन बातन क बगैर छोड़े भए इन बातन क करत जात्या। 24अरे आँधर अगुवा लोगो! तू आपन पिअइ क पानी स मच्छर तउ छान लेत ह पर जँटे क लील जात ह।

25“अरे कपटी धरम सास्तिरियो अउर फरीसियो! तोहका धिक्कार अहइ। तू आपन खोरा अउर टाठी बाहरे स धोइके फरई करत ह पर ओकरे भितरे तू जउन चाल चपेट या आपन बरे रियायत में पाया ह, भरा बाटइ। 26अरे आँधर फरिसियो! पहिले आपन खोरा क भितरे स माँज ल्या जेसे भितरे क साथ साथ उ बाहरे स भी चमकइ लगाइ।

27“अरे कपटी धरम सास्तिरियो अउर फरीसियो! तोहका धिक्कार अहइ। तू लीपी पोती भई समाधि क नाई अहा जउन बाहरे स तउ सुन्नर देखाति अहइ मुला भितरे स मरे हुअन क हाइ अउर हर किसिम क मलिनता स ठूसी रहत ह। 28अइसे ही बाहरे स तउ धर्मी देखॉइ देत ह मुला भितरे स चाल चपेट अउर अनभले स बुरा अहा।

29“अरे कपटी धरमसास्तिरियो अउर फरीसियो! तोहका धिक्कार अहइ। तू नबियन क बरे मकबरा बनावत ह अउर धर्मीयन क कब्र क सिंगार करत ह। 30अउ कहत बाट्या, ‘जदि तू आपन पूर्वजन क समइ में पइदा होत्या तउ नबियन क मरवावइ में ओनकइ साथ न देत्या।, 31अइसे प तू खुद ही साच्छी देत अहा, कि तू मानत बाट्या कि तू ओनकइ बाल-बच्चा अहा जउन नबियन क हत्यासन रहेन। 32तउ तू जउन तोहार पुरखन सुरु करेन, ओका पूरा कइ द्या।

33“अरे कीरा अउर नाग क संतान! तू सबइ कइसे सोच लिहा कि तू नरक भोगइ स छूट जाब्या। 34यह बरे मई तोहका बतावत हई कि मई तोहरे लगे नबियन, बुद्धिमानन अउर गुरुअन क पठवत हई। तू पचे ओनमाँ स बहोतन क मार डउब्या अउर बहोतन क क्रूसे प चढ़उब्या। कछू मनइयन क तू सबइ आपन आराधनालयन में कोइन स पिटवउब्या अउर एक सहर स दूसर सहर ताई ओनकइ पाछा करत खदेरब्या। 35आखिर निरीह हाबिल स लइके बिरिक्याह क बेटवा जकरयाह ताई जेका तू मंदिरे क गरभ घर अउर वेदी क बीच मारि डाए रहया हर धर्मी मनई क कतल क सजा तोह प होई। 36मई तोहसे सच कहत हई कि इ सब कछू बरे इ पीढ़ी क मनइयन क सजा भोगे होई।

### यरूसलेम क मनइयन प ईसू क दुःख

(लूका 13:34-35)

37“यरूसलेम, ओ यरूसलेम! तू उ अहा जउन नबियन क कतल करत ह अउर परमेस्वर क पठए गए दूतन क पाथर मारत ह। मई केतनी दाई चाहयो ह कि जइसे कउनो मुर्गी आपन चूजन क आपन पंखा तरे बटोर लेत ह वइसे

ही तोहरे गदेलन क बटोर लेई। मुला तू पचन नाहीं चाहया। 38तोहार घर समूचइ उजइ जाई। 39मई तोहका सच बतावत हई तू मोका तब ताई फिन नाहीं देखब्या जब ताई तू नाहीं कहब्या, ‘धन्य अहइ उ जउन पर्भू क नाई में आवत ह।’\*

### ईसू मंदिरे क बिनास क भविस्सबाणी किहेस

(मरकुस 13:1-31; लूका 21:5-33)

24 मंदिर क छोड़िके ईसू जब हुवाँ स होइके जात रहा तउ ओकर चेलन ओका मंदिर क इमारत देखॉवइ ओकरे लगे आएन। 2एह प ईसू ओनसे कहेस, “तू पचे इ इमारतन क सोझ खड़ी देखत अहा? मई तोहका सच सच कहत हई, हिआँ तलक एक पाथर प दूसर पाथर टिक नाहीं पाई। एक एक गिराइ दीन्ह जाई।”

ईसू जब जैतून पहाइ प बइठा रहा तउ अकेल्ले में ओकर चेलन लगे आएन अउर बोलेन, “हमका बतावा इ कब होई? जब तू लउटि अउब्या अउर इ संसारे क अंत होई तउ कइसे सँकेत परगट होईही?”

4जवाबे में ईसू ओनसे कहेस, “होसियार! तू पचन क कउनो भरमाइ न पावइ। 5मई इ यह बरे कहत हई कि अइसे बहोतन अहई जउन मोरे नाई स अइहीं अउर कइहीं, मई मसीह हई अउर उ सबइ बहोतन क भरमइहीं। 6तू सबइ नगीचे क जुद्ध क बातन या दूर क जुद्ध क अफवाह सुनब्या पर देखा तू घबराया जिन। अइसा तउ होइ मुला अबहीं अंत नाहीं आवा अहइ। 7हर रास्ट्र दूसर रास्ट्र क खिलाफ अउर एक राज्य दूसर राज्य क खिलाफ खड़ा होई। अकाल पड़ी। हर कतहूँ भुँइडोल आई। 8मुला इ सब बातन उहइ तरह अहइ जइसे नया पइदा होय क पहले की सुरुआती पीडा।

9“उ समइ उ पचे तोहका सजा देवॉवइ बरे पकड़वइहीं अउर उ पचे तोहका मरवाइ देइहीं। काहेकि तू सबइ मोर चेलन अहा। सबहीं रास्ट्र क लोग तोहसे घिना करिहीं। 10उ समइ बहोत मनइयन क मोह टूटी जाई अउर ओहहि समइ बहुत स बिसवासियन क बिसवास डिग जाई। उ पचे एक दूसर क अधिकारियन क हाथे में दइ देइहीं अउ आपस में घिना करिहीं। 11बहोत स झूठे नबियन खड़ा होइ जइहीं अउर मनइयन क ठगिहीं। 12काहेकि बुराई क बाढ़ आइ जाए स पिरिम घटि जाई। 13मुला जउन अंत तक टिका रही ओकर उद्धार होई। 14सरगे क राज्य क इ सुसमाचार समूचे संसार में साच्छी रूप में प्रचार कीन्ह जाई। एँसे सब राजन क साच्छी रही अउर तबहीं अंत होइ जाई।

15“एह बरे जबहि तू लोग खौफनाक बिनास करइवाली चीज\* क पवित्तर स्थान प खड़ा होइके देखा, जेकरे बारे में दानिय्येल नबी बताएन ह, (पढ़इया खुद समुझ जाई कि एकर अरथ का बाएइ।) 16तब जउन मनई यहूदिया में होई, ओनका पहाड़े प भाग जाइ चाही। 17जउन आपन घरे क छत प होई, उ घरवा स बाहरे कछू भी लइ जाइके तर खाले न आवई। 18अउ जउन बाहरे खेतन में काम करत

धन्य ... आवत ह भजन. 118:26

खौफनाक ... चीज दानि. 9:27; 12:11

होई, उ पाछे मुड़िके आपन ओढ़ना तक न लेई। 19ओन स्त्रियन बरे जेकरे कोखे में गरभ होइ या जेकर लरिकन दूध पिअत होई, उ दिनन कस्टे क होइहीं। 20परथना करा कि तोहका जाड़े क दिनन में या सबित क दिन पराइ क न पड़इ। 21उ दिनन में अइसी बिपत आई जइसी जबते परमेस्सर सूस्टि रचेस ह, आजु तक कबहुँ नहीं आइ अउ न कबहुँ आई। 22अउर जदि परमेस्सर उ दिनन क घटावइ क पक्का इरादा न कइ लिहे होत तउ कउनो भी न बच पावत किंतु चुना भएन क कारण उ दिनन में कमती कइ देइ। 23उ दिनन में जदि कउनो तू पचन स कहइ, देखा, इ रहा मसीह या उ राह मसीह। तउ ओकर बिसवास जिन किहा। 24मई इ कहत हउँ काहेकि कपटी मसीह अउप कपटी नबी खड़ा होइहीं अउर अइसे अचरज कारजन देखइहीं अउर अद्भुत कारजन करिहई कि बन पड़इ तउ चुने भएन क भी चकमा दइ देई। 25देखा, मई तोहका पहिले ही चेतावनी दइ चुका अहउँ।

26“तउ जदि उ सबइ तोहसे कहई, ‘देखा, मसीह जंगल में बा!’ फन हुवाँ जिन जाया अउर जदि उ कहई, देखा उ पचे कोठरी में छुपा बाटइ! तउ ओनकइ बिसवास जिन करया। 27मई इ कहत हउँ काहेकि जइसे बिजुली पूरब में सुरू होइके पच्छिम क अकासे तक चमक जात ह वइसे ही मनई क पूत भी परगट होई। 28जहँ कहुँ ल्हास होई हुअँ गिद्ध एकट्ठा होइहीं।

29“उ दिनन जउन मुसीबत पड़ी, ओकरे फउरन बाद: ‘सूरज करिया पड़ि जाई चन्दा स चाँदनी न निकसी अकासे स तारा टुटिहीं अउ अकास में आसमानी सवित झकझोर दीन्ह जइहीं। *यसायाह 13:10; 34:4-5*

30“उ समइ मनई क पूत क आवइ क चीन्हा अकास में परगट होई। तबहिं भुइयो प सब जातिन क मनइयन फूटि फूटि क रोइहीं अउर उ सबइ मनई क पूत क सक्ती अउर महिमा क संग सरग क बदरन में परगट होत देखिहीं। 31उ ऊँच सुर क तुरुही क संग आपन दूतन क पठइ। फिन उ पचे सरग क एक छोर स दूसर छोर तलक सब कहुँ स आपन चुना भवा मनइयन क एकट्ठा करी।

32“अंजिरे क बूच्छ स उपदेस ल्या। जइसे ही ओकर टहनियन सुक्रुवार होइ जात हीं अउर कांपर फूटइ लागत हीं। तू लोग जान जात ह कि गर्मी आवइ क अहइ। 33वइसे ही जब तू इ सब घटत देख्या तउ समुझ लिहा कि उ समइ नगिचे आइ ग बाटइ, मुला ठीक दुआर तलक। 34मई तू लोगन्स सच कहत हउँ कि इ पीढ़ी क खतम होइ क पहिले इ सब बातन होइ जइहीं। 35धरती अउर अकास तउ मिट सकत हीं मुला मोर बचन कबहुँ न मिटी।”

### सिरिफ परमेस्सर जानत ह कि उ समइ कब आई

(मरकुस 13:32-37; लूका 17:26-30, 34-36)

36“उ दिना या उ घड़ी क बारे में कउनो कछू न जानत! न सरगे क दूतन अउर न खुद पूत। सिरिफ परमपिता जानत ह। 37जइसे नूह क दिना में भवा, वइसे हिं मनई क पूत क अवाई भी होई। 38वइसे ही जइसे मनई जल बाढ आवइ स

पहिले क दिनन ताई खात पिअत रहेन, बियाह सादी करावत रहेन जब तलक नूह नाउ प नाहीं चढ़ गवा। 39ओनका तब ताई कछू पता नाहीं लगि सका जब ताई प्रलय नाहीं आइ गइ अउर ओन सबन क बहाइके नाहीं लइ गइ मनई क पूत क अवाई भी अइसे ही होई। 40उ समइ खेते में काम करत दुइ मनइयन में स एक क लइ लीन्ह जाई अउर एक क हुवाँ छोड़ि दीन्ह जाई। 41चकरी पीसत दुइ स्त्रियन में एक क धइ लीन्ह जाई अउर एक हुवाँ पाछे छोड़ि दीन्ह जाई।

42“तउ तू लोग होसियार रहा काहेकि तू नाहीं जनत्या कि तोहार स्वामी कब आई। 43याद राखा अंगर घरे क स्वामी जानत होत कि राति क कउनो घड़ी में चोर आइ जाई तउ उ जागत रहत अउर चोरे क आपन घरवा में सँध नाहीं लगावइ देत। 44एह बरे तू भी तइयार रहा काहेकि जब तू पचे सोच भी नाहीं रहब होब्या, मनई क पूत आइ जाई।

45“तब सोचा उ भरोसामंद अउ समझदार सेवक कउन बाटइ, जेका स्वामी आपन घरवा क सेवक क ऊपर ठीक समइ प ओनका खइया क देइ बरे लगाएस ह। 46धन्य अहइ उ सेवक जेका ओकर स्वामी जब आवत ह तउ ओका दियाभया काज करत पावत ह। 47मई तोहसे सच कहत हउँ उ स्वामी ओका आपन समूचे धन दौलत क अधिकारी बनाई देई। 48दूसर कइँती सोचा एक ठु बुरा सेवक अहइ, जउन आपन मनवा में कहत ह मोर स्वामी बहोत दिना स लुटि क नाहीं आवत ह। 49अइसे उ आपन संगी साथी सेवकन स मारपीट करइ लागत ह अउर सराबियन क संग खाब पिअब सुरू कइ देत ह। 50तउ ओकर स्वामी अइसे दिन आइ जाई जउने दिन उ ओकरे अवाई क सोचत तलक नाहीं अउ जेकर ओका पत तलक नाहीं। 51अउर ओकर स्वामी ओका बुरे ढंग स सजा देई अउर कपटियन क बीचउबीच ओकर ठउर ठहराई जहाँ लोग रोवत होइहीं अउर दँतवन क किड़किड़ावत रइहीं।

### दस कुँवारियन क दिस्तान्त कथा

25 “उ दिन सरग का राज्य ओन दस कुँवारियन क नाई होई जउन मसाल लइके दुलहन स भेटइ निकरिन। 2ओनमाँ स पाँच मूरख रहीं अउ पाँट ठु चउकस। 3पाँच उ मूरख कुँवारियन आपन मसाल तउ थाम लिहन मुला ओनके साथे तेल नाहीं लिहन। 4ओहँ चउकस कुँवारियन मसाले क साथ कुपियन में तेल भी लइ लिहन। 5काहेकि दुलहन क अवाई में देर होत रही। सबहीं कुँवारियन थके स ओंघाइ लागिन अउर ओलर क सोइ गइन।

6“पर आधी राति में धूम मच गइ। ओ हो ‘दुलहा आवत बा। ओसे भेटइ बाहर जा!’

7“उहइ छिन उ सबइ कुँवारियन उठि गइन अउर आपन मसाल तइयार किहेन। 8मूरख कुँवारियन चउकस कुँवारियन स कहेन, ‘हमका आपन तनिक तेल दइ द्या, हमर मसालन बुझि जात अहई।’

9“जवाबे में सबइ चउकस कुँवारियन बोलिन, ‘नाहीं हम नाहीं दइ सकित। काहेकि फुन इ हमरे बरे पूर न होई अउर

न तोहरे बरे। तउ तू पचे तेली क लगे जाइके आपन खातिर बेसहि ल्या।'

10“जब उ पचे बेसहइ जात रहिन कि दुलहा आइ पहोचा। फिन उ कुँवारियन जउन तइयार रहिन, उ सबइ ओनके संग भोजे में भीतर घुसिन अउर फिन कउनो फाटक बंद कइ दिहस।

11“आखिर में उ सबइ बाकी कुँवारियन भी गइन अउर बोलिन, ‘स्वामी, हे स्वामी, दरवाजा खोलि द्या, हमका भीतर आवइ द्या।’

12“मुला उ जवाब देत भवा कहेस, ‘मई तोहसे सच सच कहत हउँ: मई तोहका नाही जानत हउँ।’

13“तउ होसियार रहा। काहेकि तू न उ दिना क जानत ह, न घड़ी क, जब मनई क पूत लउटी।

### तीन सेवकन क दिस्तान्त कथा

(लूका 19:11-27)

14“सरग क राज्य उ मनई क नाई होई जउन जात्रा प जात भवा आपन नउकरन क बोलाइके अपने सामान क रखवारा बनाएस। 15उ एक क चाँदी स भरी पाँच तु थैली दिहस। दुसरे क दुइ अउ तिसरे क एक दिहस। उ हर एक क ओकर जोगगता होइ क मुताबिक दइके जात्रा प निकरि गवा। 16जेका चाँदी क रुपया स भरी पाँच तु थैली मिलीं, उ फउरन उ पइसे क धंधा में लगाइ दिहस फिन पाँच थैली अउर कमाएस। 17अइसे ही जेका दुइ थैली मिलिन, उ भी दुइ अउर कमाइ लिहस। 18मुला जेका एक मिली रही उ कहुँ जाइके भुईया में गइहा खोदेस अउर स्वामी क धने क गाइ दिहस। 19बहोत समइ बीत जाए क पाछे ओन सेवकन क स्वामी लउटि आवा अउर हर कउनो स लेखा जोखा लेइ लाग। 20उ मनई जेका चाँदी क पाँच थैली मिलिन, आपन स्वामी क लगे गवा अउर चाँदी क पाँच अउर थैली लइ जाइके ओसे बोला, ‘स्वामी, तू मोका पाँच थैली दिहे रहा। चाँद क इ पाँच थैली अउर अहई जउन मई कमायउँ ह।’

21“ओकर स्वामी ओहसे कहेस, ‘साबास! तू भरोसा क बढ़िया नउकर अहा। तनिक क रकम क बारे में तू बिसवास क जोगग रह्या मई तोहका अउर जिआदा हक देब। भितरे जा अउर आपन स्वामी क खुसी में खुसी मनाव।’

22“फिन जेका चाँदी क दुइ थैली मिली रहीं, आपन स्वामी क लगे गवा अउर बोला, ‘स्वामी तू मोका चाँदी क दुइ थैली दिहे रहा, चाँदी क इ दुइ थैली अउ अहई जेका मई कमायो ह।,

23“ओकर स्वामी ओसे कहेस, ‘साबास! तू भरोसा क लायक बढ़िया नउकर अहा। तनिक रकम क बारे में तू बिसवास क जोगग रह्या। मई तोहका अउर जिआदा हक देब। भितरे जा अउर आपन स्वामी क खुसी में खुसी मनाव।’

24“फिन उ जेका चाँदी क एक थैली मिली रही, आपन स्वामी क लगे आवा अउर बोला, ‘स्वामी, मई जानत हउँ तू बहोत कठोर मनई अहा। तू हुवाँ काटत ह जहाँ तू बोया नाही रहा, अउर जहाँ तू कउनो बिआ नाही छिटकाया तू

हुवाँ स फसिल बटोरब्या। 25यह बरे मई डेराइ गवा रहे। तउ मई जाइके चाँदी क थैलिया क भुईया में गाइ दीन्ह। इ लइ ल्या जउन तोहार अहइ इ बाटइ, लइ ल्या।’

26“जवाबे में ओकर मालिक ओसे कहेस, ‘तू एक बुरा आलसी सेवक अहा, तू जानत ह कि मई बिन बोए कटनी करत हउँ, हुवाँ स फसिल बटोरत हउँ। 27तउ तोहका मोर धन साहूकार क लगे जमा कइ देइ चाही रहा। फिन जब मई आइत तउ जउन मोर रहा बियाज क साथ लइ लेइत।’ 28एह बरे ऐसे चाँदी क एक थैली लइ ल्या अउर जेकरे लगे चाँदी क दस थैली अहई, एँका उहइ क दइ द्या। 29काहेकि हर उ मनई क जो जउन कछू ओकरे लगे रहा ओकर सही प्रयोग किहेस ओका अउ जिआदा दीन्ह जाई। अउर जेतनी ओका जरुरत अहइ, उ ओसे जिआदा पाई। मुला ओसे, जो जउन कछू ओकरे लगे रहा ओकर सही प्रयोग नाही किहेस, सब कछू ओकरे लगे रहा ओकर सही प्रयोग नाही किहेस, सब कछू छोर लीन्ह जाई। 30तउ उ बेकार क नउकर क बाहेर अँधियरे में धकियाइ द्या जहाँ लोग रोइहीं अउर आपन दाँत पिसिहीं।

### मनई क पूत सबक निआव करी

31“मनई क पूत जब आपन सरगे क महिमा क संग आपन सबही दूतन क संग आपन सानदार सिंहासने प बइठी 32तउ संसार क सबहि लोग ओकरे समन्वा ऐकट्ट होइ जइहीं अउर एक दूसर क वइसे ही अलगाइ देइ, जइसे एक गइरिया आपन बोकरियन स भेड़न क अलगाइ देत ह। 33उ भेड़न क दाहिन कईती अउर बकरियन क बाई कईती राखी।

34“फिन उ राजा, जउन ओकरे दाहिन अहइ, ओनसे कही, ‘मोरे परमपिता स असीस पाए मनइयो, आवा अउर जउन राज्य तोहरे बरे संसार क सृस्टि स पहिले तइयार कीन्ह ग अहइ, ओकर अधिकारी बनि जा। 35इ राज्य तोहार अहइ काहेकि मई भुखान रह्यो अउ तू मोका कछू खाइके द्या, मई पिआसा रह्यो अउर तू मोका कछू पिअइ क दिहा। मई नगिचे स जात भवा अनजान रह्यो, अउर तू मोका भितरे लइ गया। 36मई बेवस्तर रह्यो, तू मोका ओढ़ना पहिराया। मई बेरमिया रह्यो, अउर तू मोर सेवा किहा। मई गिरफ्तार रह्यो, अउन तू मोरे लगे आया।’

37“फिन जवाबे में धर्मी मनई ओसे पुछिहई ‘पभू, हम पचे तोहका कब भुखान लखा ह अउर खिआवा या पिआसा लखा अउर पिअइ क दिहा? 38तोहका हम कब नगिचे स जात भवा अजनबी लखा अउर भितरे लइ गएन, या बेवस्तर के लिखके तोहका ओढ़ना पहिरावा? 39अउ हम कब तोहका बेरमिया या गिरफ्तार लखा अउर तोहरे लगे आएन?’

40“फिन राजा जवाबे में ओनसे कही, मई तोहसे सच कहत हउँ जब कबहुँ तू मोर भोले भाले मनइयन में स कउनो एक बरे भी कछू किहा तउ उ तू मोरे बरे किहा।

41“फिन उ राजा आपन बाँई कईती क मनइयन स कही, ‘अरे अभागे लोगो मोरे नगिचे स चला जा, अउ जउन आगी सइतान अउर ओकरे दूतन बरे तइयार कीन्ह गइ

अहइ उ अनंत आगी में जाइके कूद जा। 42इहइ तोहार सजा अहइ काहेकि मई भुखान रह्यो पर तू मोका खाइके कछू नाहीं दिहा, 43मई अनजान रहा पर तू मोका भितरे नाहीं लइ गया। मई बिन ओढ़ना क बेवस्तर रहा, पर तू मोका ओढ़ना नाहीं पहिराया। मई बेरमिया अउर गिरफ्तार रहा, पर तू मोरे कइती धियान नाहीं दिहा।

44“फिन उ सबइ भी जवाबे में ओसे पुछिहई, ‘पर्भू, हम तोहका भूखा या पिआसा या अनजान या बिना ओढ़ना क बेबस्तर या बेरमिया या गिरफ्तार कब लखा अउर तोहार सेवा नाहीं कीन्ह?’ 45फिन उ जवाबे में ओनसे कही, ‘मई तोहसे सच कहत हउँ जब कबहुँ तू मोर इन भोले भाले मनवइयन में स कउनो एक क बरे लापरवाही बरत्या अउर नहीं किहा उ मोरे बरे भी कछू करइ मैं लापरवाही बरती।’

46“फिन इ सबइ बुरे लोग अनन्त सजा पइही अउ धर्मी मनई अनन्त जीवन में चला जइहीं।”

### यहूदी नेतन क ईसू क कतल करइ क चाल

(मरकुस 14:1-2; लूका 22:1-2; यूहन्ना 11:45-53)

**26** इ सब बातन क कहि चुकइ क पाछे ईसू आपन चेलन स बोला, 2“तू पचे जानत ह कि दुइ दिना पाछे फसह क त्यूहार बाटइ। अउर मनई क पूत दुस्मनन क हाथन स क्रूसे प चढ़ाइ जाइ बरे पकड़वाइ जाइवाला अहइ।”

3तब मुख्ययाजकन अउर बुजुर्ग यहूदी नेतन कैफ़ा नाउँ क महायाजक क घरे क आँगन में ऐकट्टा भएन। 4अउर उ पचे कउनो चाल स ईसू क धरइ अउर मार डावइ क छल करेन। 5फिन भी उ सबइ कहत रहेन, “हमका इ फसह क त्यूहार क दिनन में नाहीं करइ चाही। नाहीं तउ होइ सकत ह मनई दंगा फसाद कइ बइठई।”

### ईसू प इतर क छिरकब

(मरकुस 14:3-9; यूहन्ना 12:1-8)

6ईसू जब बैतनिय्याह में समौन कोढ़ी क घरे रहा। 7तबही एक स्त्री चिकना, स्फटिक क सीसी में बहोत महँग इतर भरिके लइ आई अउर ओका ओकरे मूँडे प उडेल दिहस। उ समइ उ पटरा प टेक लगाइके निहुरा बइठा रहा। 8जब ओकर चेलन इ देखेन तउ उ सबइ किरोध में आइके बोलेन, “इतर क अइसी बर्बादी काहे कीन्ह गइ? 9इ इतर तउ महँग दामे में बिक सकत रहा अउर फिन उ धने क दीन दुखियन में बाँटि जाइ सकत रहा।”

10ईसू जानि गवा कि उ सबइ का कहत अहई। तउ ओनसे बोला, “तू इ स्त्री क काहे तंग करत अहा? उ तउ मोरे बरे एक सुन्नर काम करेस ह? 11काहेकि दीन-दुखी तउ हमेसा तोहरे पास रइहीं\* पर मई तोहरे साथ हमेसा नाहीं रहब। 12उ मोरे सरिर पइ सुगंधि छिरकिके मोरे गाड़ा जाइके तइयारी करेस ह। 13मई तोहसे सच कहत हउँ समूची दुनिया में जहँ कहुँ भी सुसमाचार क प्रचार अउर फइलाव कीन्ह जाइ, हुवँइ ऐंकर याद मैं जउन कछू इ किहेस ह, ओकर चर्चा होई।”

दीन-दुखी ... रइहीं व्यवस्था 15:11

### ईसू क दुस्मन यहूदा बनत ह

(मरकुस 14:10-11; लूका 22:3-6)

14तब यहूदा इस्करियोती जउन ओकर बारहु चेलन में एक रहा, मुख्ययाजकन क लगे गवा अउर ओसे बोला 15“यदि मई ईसू क तोहका पकरवाइ देउँ तउ तू मननई मोका का देब्या?” तब उ पचे यहूदा क चौँदी क तीस रुपया देइ बरे इच्छा परगट किहेन। 16उहइ समइ स यहूदा ईसू क धिखा दइ के पकड़वावइ क ताक मैं रहइ लाग।

### ईसू क आपन चेलन क संग फसह भोज

(मरकुस 14:21-22; लूका 22:7-14, 21-23;

यूहन्ना 13:21-30)

17बिना खमिरे क रोटी क त्यूहार स पहिले दिन ईसू क चेलन आइके पूछेन, “तू का चाहत ह कि हम तोहरे खाइके बरे फसह भोज क तइयारी कहाँ जाइके करी?”

18ईसू कहेस, “गाउँ में उ मननई क लगे जा अउर ओसे कहा, कि गुरु कहेस ह, ‘मोर तय भई घरी निगचे बाटइ, मई तोहरे घर आपन चेलन क संग फसह क त्यूहार मनावइ वाला अहउँ।” 19फिन चेलन वइसा ही करेन जइसा ईसू बताए रहा अउर फसह क त्यूहार क तइयारी किहेन।

20दिन बूड़त ईसू आपन बारहु चेलन क संग पटरे पइ निहुरा बइठा रहा। 21तबहीं ओनके खइया क खात उ बोला, “मई सच कहत हउँ तोहमों स एक मोका धोखे स पकरवाई।” 22उ सबइ बहोत दुखी भएन अउ ओनमों स हर कउनो आपुस में पूछइ लागेन, “पर्भू, उ मई तउ नाहीं हउँ। बतावा का मई अहउँ।”

23तब ईसू जवाब दिहस, “उहइ जउन मोरे संग एक टाठी में खात बा मोका धोखा स पकड़वाई। 24मनई क पूत तउ जाई ही, अइसा कि ओकरे बारे में पवित्तर सास्तरन में लिखा बाटइ। मुला उ मनई क धिक्कार बा जउन मनई क जारिये मनई क पूत पकड़वाइ जात अहइ। उ मनई बरे केतना नीक होत कि ओकर जन्म ही न भवा रहत।”

25तब ओका धोखे स पकरवावइ वाला यहूदा बोलि उठा, “हे गुरु, उ मई नाहीं हउँ। का मई हउँ? ईसू ओसे कहेस, “हाँ अइसा ही अहइ जइसा तू कह्या ह।”

### पर्भू क भोज

(मरकुस 14:22-26; लूका 22:15-20;

1 कुरिन्थियन 11:23-25)

26जब उ पचे खइया क खात ही रहेन, ईसू रोटी लिहस, ओका असीसेस अउर फिन तोड़ेस। फिन ओका चेलन क देत भवा उ बोला, “ल्या एँका भकोसा, इ मोर देह अहइ।”

27फिन उ दाखरस क खोरा उठाएस अउर धन्यवाद देइ क पाछे ओका ओन पचेन क देत भवा कहेस, “तू पचे एहमों स तनिक तनिक पिआ। 28काहेकि इ मोर खून अहइ जउन एक नवा वाचा की सुरुआत अहइ। इ बहोतन लोगन बरे बहाइ जात ह। जेसे ओनके पापनक छमा करब संभउ होइ सकइ 29मई तोहसे सच कहत हउँ उ दिना तक दाखरस न चीखब जब ताई आपन परमपिता क राज्य में तोहरे साथ

नवा दाखरस न पिउ लेउँ।” 30फिन उ पचे फसह क भजन गाइके जैतून पहाड़े प गएन।

### ईसू क कहब: सब चेलन ओका तजि देइहीं

(मरकुस 14:27-31; लूका 22:31-34; यूहन्ना 13:36-38)

31फिन ईसू ओनसे कहेस, “आज राति तू पचन क मोह में बिसवास डुग जाई। काहेकि पवित्तर सास्तरन में लिखा अहइ:

मई गड़रिया क मारब अउर झुंड क भेड़न तितराइ बितराइ जइहीं।

जकर्याह 13:7

32पर फिन स जी जाए प मई तोहसे पचन्स पहिले गलिल चला जाब।”

33परतस जवाब दिहस, “चाहे सब मिला तोहमाँ बिसवास डुगाइ देई, मुला मई कबहूँ न खोउवा।”

34ईसू ओसे कहेस, “मई तोहसे सच कहत हउँ आज इहइ राति मुर्गा क बाँग देइ स पहिले तू तीन दाई मोका नकार जाब्या।”

35तब परतस ओसे कहेसे, “अगर मोका तोहरे संग मरि जाइ क होइ तउ भी तोसे मई कबहूँ न मुकरवा।” बाकी सब चेलन इहइ कहेन।

### ईसू क एकांत में पराथना

(मरकुस 14:32-42; लूका 22:39-46)

36फिन ईसू ओकरे संग उ जगह प आवा जउन गतसमनी कहा जात रहा। अउर उ आपन चेलन स कहेस, “जब ताई मई हुवाँ जाउँ अउर पराथना करउँ, तू सबे हियाई बइठा।” 37फिन ईसू परतस अउर जब्दी क दुइनउँ बेटवन क आपन संग लइ गवा। अउर दुख अउ घबराहत महसूस करइ लाग। 38फिन उ ओनसे कहेस, “मोर मन बहोत दुखी बा, जइसे मोर प्रान निकरि जइहीं। तू मोरे संग हिअँई ठहर जा अउर होसियार रहा।”

39फिन तनिक अगवा बढइ क बाद उ धरती प निहुरिके पराथना करइ लाग। उ कहेस, “हे, मोर परमपिता, जदि होइ सकइ तउ यातना क कटोरा मोसे टरि जाइ। फिन भी जइसा मई हात हउँ वइसा नाहीं मुला जइसा तू चाहत ह वइसा ही कर।” 40ओकरे पाछे उ आपन चेलन क लगे गवा अउर ओनका सोवत पाएस। उ परतस स कहेस, “तउ तू पचे मोर संग एक घंटा भी नाहीं जागि सक्या। 41जागत रहा अउर पराथना करा जेसे तू परिच्छा में न पड़ि जा। तोहार आतिमा तउ उहइ करब चाहत ह जउन चंगा बा, मुला, तोहार सरीर दुर्बल अहइ।”

42एक दाई फिन उ जाइके पराथना किहेस अउर कहेस, “हे मोर परमपिता, जदि यातना क कटोरा मोरे बगैर पिए टर नाहीं सकत तउ तोहार इच्छा पूरी होइ जाइ।”

43तब उ आवा अउ ओनका फिन सोवत पावा। उ पचेन क आँखन थकी रहिन। 44तउ उ ओनका छोड़िके फिन गवा अउर तिसरी दाई भी पहिले क नाई ओनही सब्दन में पराथना करेस।

45फिन ईसू आपन चेलन क लगे गवा अउर ओनसे पूछेस, “का तू अबहूँ आराम स सोवत अहा? सुना, समइ

आइ ग अहइ, जब मनई क पूत पापी मनइयन क हथवन में दइ दीन्ह जाई। 46उठा, आवा चली। देखा मोका धरइवाला इ बा।”

### ईसू क गिरफतार करब

(मरकुस 14:43-50; लूका 22:47-53; यूहन्ना 18:3-12)

47ईसू जब बोलत रहा, यहूदा जउन बारहु चेलन में एक रहा, आवा। ओकरे संग तरवारन अउर लाठियन स लइस मुख्ययाजकन अउर बुजुर्ग यहूदी नेतन क पठई एक भारी भीड़ भी रही। 48यहूदा जउन ओका पकड़वावइ वाला रहा, ओनका एक इसारा बतावत भवा कहेस, “जउन कउनो क मई चूमउँ, उहइ होई, ओका धइ लिहा।” 49फिन उ सीधे ईसू क लगे गवा अउ बोला, “हे गुरु!” अउर बस उ ईसू क चूम लहेस।

50ईसू ओसे कहेस, “मीत, जउन काज बरे तू आइ अहा, ओका करा।”

फिन भिड़िया क लोग लगे जाइके ईसू क दहबोच कइ गिरफतार कइ लिहना। 51फिन जउन मिला ईसू क संग रहेन, ओनमाँ स एक तरवार हींच लिहेस अउर वार कर महायाजक क नउकर क कान काट लिहस।

52तब ईसू ओसे कहेस, “आपन तरवार क मियान में घुसेइ द्या। जउन तरवार चलावत हीं उ पचे तरवारे स मार डावा जइहीं। 53का तू नाहीं सोचत अहा कि मई आपन परमपिता क बोलाइ सकत हउँ अउ उ फउरन सरगे क दुतन क बारहु फउजन स भी जिआदा मोरे लगे पठइ देई? 54मुला मई अइसा करउँ तउ पवित्तर सास्तरन में लिखी बात कइसे पूर होइ जाई कि सब कछू अइसे ही होइ क अहइ?”

55उहइ समइ ईसू भीड़े स कहेस, “तू पचे तरवारन, लाठियन क संग मोका धरवावइ अइसे काहे आइ अहा जइसे कउनो डाकू क धरइ आवत हीं? मई हर दिन मंदिर में बइठा उपदेस देत रहत हउँ अउर तू पचे मोका नाहीं धर्या! 56मुला इ सब कछू घटि गवा कि नबियन क लिखा पूर होइ।” फिन ओकर चेलन ओका तजि क पराय गएन।

### यहूदी नेतन क समन्वा ईसू क पेसी

(मरकुस 14:53-65; लूका 22:54-55, 63-71;

यूहन्ना 18:13-14, 19-24)

57ईसू क जउन धरे रहेन, उ पचे ओका कैफा नाउँ क महायाजक क समन्वा लइ गएन। हुवाँ धरम सास्तिरियन अउर बुजुर्ग यहूदी नेतन भी एकटठा भएन। 58परतस ओसे दूर-दूर रहत ओकरे पाछे पाछे महायाजक क अंगना क भितरे तलक चला गवा। अउर फिन अंत देखइ हुवाँ पहेरेदारन क संग बइठ गवा।

59महायाजकन समूची यहूदी महासभा क संग ईसू क मउत क सजा देइ बरे ओकरे खिलाफ कउनो झूठा जुर्म ढूँढ़ि बरे जतन करत रहेन। 60मुला ढूँढ़ि नाहीं पाएन। जदिपि बहोत स झूठे गवाहन अगवा बढिके झूठ बोलें। आखिर में दुइ मनई अगवा आएन 61अउर बोलें, “इ कहे रहा, ‘मई परमेस्सर क मंदिर क तहस नहस कइ सकत हउँ अउर

तीन दिन मँ फिन बनाइ सकत हउँ।” 62फिन महायाजक खड़ा होइके ईसू स पूछेस, “का जवाबे मँ तोहका कछू नार्ही कहइ क अहइ कि इ मनइयन तोहरे खिलाफ इ का साच्छी देत अहइँ?” 63मुला ईसू खमोस रहा।

फिन महायाजक ओसे पूछेस, “मईँ तोहका साच्छात परमेस्सर क सपथ देत हउँ, हमका बतावा का तू परमेस्सर क पूत मसीह अहा?”

64ईसू जवाब दिहस, “हाँ, मईँ अहउँ। मुला मईँ तोहका बतावत हउँ कि तू पचे मनई क पूत क उ परम सक्तीवाला क दाहिन कइँती बइठा अउर सरगे क बदखन प आवत हालि ही देखब्या।”

65महायाजक इ सुनिके एँतना गुस्साइ गवा कि आपन ओढ़ना फाइत भवा बोला, “इ जउन बातन कहेस ह उ सब परमेस्सर प कलंक लगाएस ह। अब हमका अउर जिआदा साच्छी न चाही। तू पचे एँका परमेस्सर क खिलाफ कहत सुन्या ह। 66तू पचे का सोचत अहा?”

जवाबे मँ उ पचे बोलेन, “इ अपराधी अहइ। एँका मरि जाइ चाही।” 67फिन उ सबइ ओकरे मुँहना प थूकेन अउ ओका घूँसा स मारेन। कछू थप्पड़ दिहेन। 68अउर कहेन, “हे मसीह! भविस्सबाणी करा कि उ कउन अहइ जउन तोहका थोकरेस ह!”

### पतरस क ईसू क न मानब

(मरकुस 14:66-72; लूका 22:56-62;

यूहन्ना 18:15-18, 25-27)

69पतरस अबर्ही अंगना मँ बाहेर बइठा रहा कि एक टु नउकरानी लगे आइ अउर बोली, “तू भी तउ उहइ गलील क ईसू क संग रहया।”

70मुला सबइ क समन्वा परतस मुकर गवा। उ कहेस, “मोका पता नार्ही तू का कहति अहा।”

71फिन उ ड्यौढ़ी तलक गवा ही रहा कि एक दूसर मेहरारू देखेस अउर जउन मनई हुवाँ रहेन, ओनसे बोली, “इ मनई नासरत क ईसू क संग रहा।” 72एक दाईँ फिन पतरस इन्कार करेस अउर सपथ खात भवा कहेस, “मईँ उ मनई क नार्ही जानत हउँ।”

73तनिक देर पाछे हुवाँ खड़ा लोग पतरस क लगे गएन अउर ओसे बोलेन, “तोहार बोलइ क लहजा स साफ लागत ह कि तू असिल मँ ओनही मँ स एक अहा।”

74तब परतस आपन क धिक्कारइ लाग अउर सपथ खाएस, “मईँ उ व्यक्ति क नार्ही जानत हउँ।” तबहिँ मुर्गा बाँग दिहस। 75तबबइ पतरस क उ याद होइ आवा जउन ईसू ओसे कहे रहा, “मुर्गा क बाँग देइ स पहिले तू तीन दाईँ मोका नकार देब्या।” तब पतरस बाहेर चला गवा अउ फूट फूट क रोवइ लाग।

### ईसू क पीलातुस क अगवा पेसि

(मरकुस 15:1; लूका 23:1-2; यूहन्ना 18:28-32)

27 दूसर दिन बड़े भिन्सारे सबइ ही मुख्य याजकन अउर बुजुर्ग यहूदी नेतन ईसू क मरवाइ डावइ क एक चाल चलेन। 28फिन उ पचे ओका बाँधि के लइ गएन अउर राज्यपाल पिलातुस क सौंप दिहन।

### यहूदा क आत्महत्या

(प्रेरितन क काम 1:18-19)

3ईसू क धरवावइ वाला यहूदा जब देखेस कि ईसू क दोखी ठहराइ दीन्ह ग अहइ, तउ उ बहोत पछतावा। अउर उ याजकन तथा यहूदी नेतन क चाँदी क तीस रुपया लउटाइ दिहस।

4उ कहेस, “मईँ एक बे अपराधी क मार डावइ बरे धरावइ क पाप कीन्ह ह।”

एँह प मनई कहेन, “हम पचेन क का! इ तोहार आपन मामिला अहइ।”

5एँह प यहूदा चाँदी क ओन रूपयन क मंदिर क भितरे लोकाएके चला गवा अउर फिन बाहेर जाइके आपन क फाँसी लगाएस।

6मुख्ययाजकन उ सब चाँदि क सिक्कन क उठाइ लिहन अउर कहेन, “हमरे व्यवस्था क मुताबिक इ धन क मँदिर क खजाना मँ धरब नीक नार्ही काहेकि एँकर प्रयोग कउनो क मार डावइ बरे कीन्ह ग रहा। 7एह बरे उ पचे उ रूपयन क यरुसलेम मँ बाहेर स आवइ वाले मनइयन क मरि जाए प गाइइ बरे कोहारे क खेत खरीदै क फैसला किहन। 8एह बरे आजु ताईँ इ खेत ‘लहू क खेत’ क नाउँ स जाना जात ह। 9इ तरह परमेस्सर क नबी यिर्मयाह क कहा भवा बचन पूर होइ ग:

“उ पचे चाँदी क तीस सिक्कन बरे, उ रकम जेका इस्त्राएल क मनइयन ओकरे बरे देब तइ किहे रहेन। 10अउ पभू क जारिये मोका दीन्ह गवा हुकुम क मुताबिक ओसे कोहारे क खेत खरीदेन।” \*

### पिलातुस क सवाल ईसू स

(मरकुस 15:2-5; लूका 23:3-5; यूहन्ना 18:33-38)

11एँकरे बीच मँ ईसू राज्यपाल क समन्वा पेस भवा। राज्यपाल ओसे पूछेस, “का तू यहूदियन क राजा अहा?” ईसू कहेस, “हाँ, मईँ हउँ।”

12दुसरी कइँती जब प्रमुखयाजकन अउर बुजुर्ग यहूदी नेतन ओह प दोख लगाव रहेन तउ उ कउनो जवाब नार्ही दिहस।

13तब पिलातुस ओसे पुछेस, “का तू नार्ही सुनत अहा कि उ सबइ तोह प केतँता दोख लगावत अहइँ?”

14मुला ईसू पिलातुस क कउनो भी दोख क जवाब नार्ही दिहस। पिलातुस क एँह प बहोत अचरज भवा।

### ईसू क छोड़इ मँ पिलातुस सफल नार्ही भवा

(मरकुस 15:6-15; लूका 23:13-25;

यूहन्ना 18:39-19:16)

15फसह क त्रौहार क अउसर प राज्यपाल क रीति रही कि उ कउनो भी एक कैदी क, जेका भीड़ चाहत रही, ओनके बरे छोड़ दीन्ह जात रहा। 16उहइ समइया बरअब्बा नाउँ क एक बदनम कैदी हुवाँ रहा। 17तउ जब भीड़ आइके एकट्ठी होइ गइ तउ पिलातुस ओसे पूछेस, “तू का चाहत बाट्या, मईँ तोहरे बरे केका छोड़ि देउँ, बरअब्बा क

या उ ईसू क, जउन मसीह कहा जात ह?" 18पिलातुस जानत रहा कि उ पचे ओका मने में डह क कारण धरवाइ दिहेन ह।

19पिलातुस जब निआव क सासन प बइठा रहा तउ ओकर पत्नी ओकरे लगे एक संदेसा पठाएस: "उ सीधा साँच मनई क संग कछू जिन कइ बइठ्या। मई ओकरे बारे में एक तु सपन देखिउँ ह जेसे मई आज सारा दिन भइ बेचइन रही।"

20मुला प्रमुख याजकन अउर बुजुर्ग यहूदी नेतन भीड़े क बगदाएन, फुसलाएन कि उ पिलातुस स बरअब्बा क छोरि देइ क अउर ईसू क मरवाइ डावइ बरे कहेन।

21जवाबे में राज्यपाल ओसे पूछेस, "दुइनउँ कैदियन में स कउनो एक बरे केका मोसे छुरवावइ बरे तू पचे चाहत बाट्या?"

उ पचे जवाब दिहेन, "बरअब्बा क।"

22जब पिलातुस ओसे पूछेस, "तउ मई, जउन मसीह कहा जात बा उ ईसू क का करउँ?"

उ सबइ कहें, "ओका क्रूस प चढ़ावा।"

23पिलातुस पूछेस, "काहे, उ कउन अपराध किहेस ह?" मुला उ सबइ तउ अउर जिआदा चिचियानेन, "ओका क्रूस प चढ़ाइ द्या।"

24पलातुस देखेस कि अब कउनो फायदा नाहीं। मुला दंगा भइकइ क बा। तउ उ तनिक पानी लिहस अउर भीड़े क समन्वा आपन हाथ धोएस, उ बोला, "इ मनई क लहू स हमार कउनो जिम्मेदारी नहीं। यह तोहार मामिला बा।"

25जवाबे में सब लोगन कहेन, "एँकरे मउत क जवाबदेही हम अउ हमार लरिकन मान लेत हैं।"

26तब पिलातुस ओनके बरे बरअब्बा क छोरि दिहस अउर ईसू क कोइवा स पिटवाइ क क्रूस प चढ़ावइ बरे सौपि दिहस।

### ईसू क मजाक

(मरकुस 15:16-20; यूहन्ना 19:2-3)

27फिन राज्यपाल क सिपारी ईसू क राज्यपाल निवास क भितरे लइ गएन। हुवाँ ओकरे चारिहुँ कइँती सिपाहियन क फउज ऐकट्ठी होइ गइ। 28उ पचे ओकर ओढ़ना उतार दिहेन अउ चटकीले लाल रंग क ओढ़ना पहिराइ क 29काँट स बनवा एक ताज ओकरे सिरे प ढाँपि दिहस। ओकरे दाहिन हाथ में ए तु नरकट थमाइ दिहेन अउर ओकर समन्वा अपने घुटनन पइ निहुरिके क ओकरे हँसी करत बोलेन, "यहूदियन क राजा अमर रहइ!"

30फिन उ पचे ओकरे मुँहना पर थूकेन, डंडी छोरें अउर ओकरे मुँडवा प सुटकइ लागेन। 31जब उ पचे ओकर हँसी उड़ाइ चुकेन तउ ओकर पोसाक उतारेन अउर ओका ओकर आपन ओढ़ना पहिराइ क क्रूस प चढ़ावइ बरे लइ चलेन।

### ईसू क क्रूस प चढ़ाव

(मरकुस 15:21-32; लूका 23:26-43; यूहन्ना 19:17-27)

32जब उ पचे बाहेर ही रहेन तउ ओनका कुरैन क निवासी समौन नाउँ क एक मनई मिलि गवा। उ पचे ओह प जोर डाएन कि उ ईसू क क्रूस उठाइके चलइ। 33फिन

जब उ पचे गुलगुता नाउँ क जगह (जेकर अरथ अहइ "खोपड़ा क ठर।") पहुँचेन। 34तउ उ पचे ईसू क अंगूर क रस में पित्त\* नाइ क पिअइ बरे दिहेन। मुला जब ईसू ओका चखेस तउ पिअइ स मना किहस। 35तउ उ सबइ ओका क्रूसे प चढ़ाइ दिहेन अउर ओकरे ओढ़ना क आपुस में बाँटइ बरे पाँसा खेलिके आपन हीसा लिहेन। 36एँकरे पाछे हुवाँ बइठिके ओह प पहरा देइ लागेन। 37उ पचे ओकर जुर्म पत्थर लिखिके ओकरे मूँड़े पर लटकाइ दिहेन, "इ यहूदियन क राजा ईसू अहइ।" 38इहइ समइ ओकरे संग दुइ डाकु भी क्रूसे प चढ़ाइ जात रहेन एक तु ओकरे दाहिन अउर दूसर ओकरे बाई कइँती। 39नगिचे स होइ क जात मनइयन आपन मूँड़ि झमकावत ओका बेज्जत करत रहेन। 40उ पचे कहत रहेन, "अरे मंदिर क गिराइके तीन दिना ओका फिन स बनवइया, आपन क तउ बचावा। जदि तू परमेस्सर क पूत अहा तउ क्रूसे स तरखाले उतरि आवा।"

41अइसे ही मुख्ययाजकन, धरम सास्तिरियन अउर बुजुर्ग यहूदी नेतन क संग ओकर इ कहिके हँसउआ करत रहेन: 42"दूसर क उद्धार करइया इ आपन उद्धार नाहीं कइ सकत। इ इस्त्राएल क राजा अहइ। इ क्रूसे स अबहीं तरखाले उतरइ तउ हम पचे एँका मान लेइ। 43इ परमेस्सर में बिसवास करत ह। तउ जदि परमेस्सर चाहइ अब एँका बचाइ लेइ। आखिर इ तउ कहत भी रहा 'मई परमेस्सर क पूत हउँ।'" 44उ सबइ लुटेरन भी जउन ओकरे संग क्रूसे प चढ़ाइ गएन रहा, ओकर अइसा ही हँसउआ भवा।

### ईसू इ मउत

(मरकुस 15:33-41; लूका 23:44-49; यूहन्ना 19:28-30)

45फिन समूची धरती प दुपहर स तीन बजे तलक अँधियारा छावा रहा। 46कउनो तीन बजे क लगभग ईसू ऊँच अवाजे में चिल्लान, "एली, एली, लमा सबक्तानी" अरथ, "मोरे परमेस्सर, हे मोरे परमेस्सर, तू मोका काहे बिसार दिहा ह?"

47हुवाँ खड़ा भवा मनइयन में स कछू इ सुनिके कहइ लागेन, "यह एलिय्याह क पुकारत अहइ।"

48फिन फउरन ओनमों स एक मनई धावत सिरका में बोरा भवा स्पंज एक डंडी पइ लटकाइ क लइ आवा अउर ओका ईसू क चूसइ बरे दिहस। 49मुला दूसर लोग कहत रहेन, "छोड़ द्या, देखित ह कि एलिय्याह एँका बचावइ आवत ह कि नाहीं।"

50ईसू फिन एक दाई ऊँच सुरे में चिल्लाइ क प्राण तजि दिहस। 51उहइ समइया मंदिर क परदा ऊपर स तरखाले तलक फाटिके दुइ टुकड़न में बाँटि गवा। धरती डोल उठी। चट्टानन फाट पड़िन। 52हियाँ तलक कब्रन खुलि गइन अउर परमेस्सर क मरा भएन भक्तन क बहोतन सरीर जी उठेन।

53उ पचे कब्रन स निकरि आएन अउर ईसू क जी जाइ क पाछे पवित्तर नतर में जाइके बहोतन क देखाई दिहेन। 54रोम क फऊजी नायक अउर ईसू क पहरुअन भूँइडोल

पिता एक अइसी चीज अहइ जेका अंगूर रस में मिला कर पिअब स पीदा कम होय जात हय।

अउर वइसी ही दूसर घटनन क लखिके डेराअ गएन। उ पचे बोलेन, “ईसू असिल मैं परमेस्सर क पूत रहा!”

55हुवाँ ढेरि के स्त्रियन खड़ी रहिन जउन दूरे स लखत रहिन। उ पचे ईसू क देखभाल बरे गलील स ओकरे पाछे पाछे आवत रहिन। 56ओनमाँ स मरियन मगदलीनी, याकूब अउर योसेस क महतारी मरियम तथा जब्दी क बेटवन की महतारी रही।

### ईसू क दफन

(मरकुस 15:42-47; लूका 23:50-56; यूहन्ना 19:38-42)

57सांझ क समइ अरिम्तियाह सहर स यूसुफ नाउँ क एक धनवान आवा उ खुद ही ईसू क चेला होइ गवा। यूसुफ पिलातुस क लगे गवा अउर ईसू क ल्हास माँगिस। 58तबहिं पिलातुस हुकुम दिहस कि सब ओका दइ दीन्ह जाइ। 59यूसुफ ल्हास लइ लिहस अउर ओका एक नई चदरे मैं लपेटिके 60आपन खुद क नई कब्र मैं धइ दिहस। जेका उ चट्टाने मैं काटि के बनवाए रहा। फिन उ चट्टाने क दरवाजे प एक बड़का सा पाथर लुढ़काएस अउर चला गवा। 61मरियम मगदलीनी अउर दूसर स्त्री मरियम हुवाँ कब्रे क समन्वा बइठी रहिन।

### ईसू क कब्रे प पहरा

62अगले दिन जब सुक्रवार बीत गवा तउ प्रमुख याजकन अउर फरीसियन पिलातुस स मिलइ गएन। 63उ पचे कहेन, “महासय हमका याद बा कि इ छलिया, जब उ जिअत रहा, कहे रहा, ‘तिसरे दिन मई फिन जी उठबा।’ 64तउ हुकुम दया कि तिसरे दिन तलक कब्रे प चौकसी कीन्ह जाइ। जेसे अइसा न होइ कि ओकर चेलन आइके ओकर ल्हास चोरोंइ लइ जाई अउर मनइयन स कहई, उ मरे भवा मैं स जी गवा। इ दूसर छल पहिले छल स जिआदा बुरा होई।”

65पिलातुस ओसे कहेस, “तू पहरा बरे सिपाही लइ जाइ सकत ह। जा जइसी चौकसी कइ सकत ह, करा।” 66तब उ पचे चला गएन अउर उ पाथर प मोहर लगाइके अउर पहरुअन क हुवाँ बइठाइ के कब्र क हिफाजत करइ लागेन।

### ईसू क फिन स जी उठब

(मरकुस 16:1-8; लूका 24:1-12; यूहन्ना 20:1-10)

28 सबित क बाद जब रविवार क भिन्सारे पउ फाटत रही, मरियम मगदलीनी अउर दूसर स्त्री मरियम कब्र क जाँच करइ आइन।

2काहेकि सरगे स पर्भू क एक दूत हुवाँ उतरा रहा, एह बरे उ सबइ बहोत बड़का भुईँडोल आवा। सरगदूत हुवाँ आइके पाथर क लुढ़काएस अउर ओह पर बइठ गवा। 3ओकर रूप अकासे क बिजरी क नाई चमचमात रहा अउर ओकर ओढ़ना बरफ जइसे उज्जर रहेन। 4उ सिपाहियन जउन कब्रे प पहरा देत रहेन, डर क कारण डेरानेन अउर अइसा होइ गएन जइसे मरि गवा होई।

5तब सरगदूत बोला अउर उ ओन स्त्रियन स कहेस, “डेराअ जिन, मई जानत हउँ कि तू ईसू क खोजति अहा जेका, क्रूस प चढ़ाइ दीन्ह गवा रहा। 6उ हियाँ नाहीं बा। जइसा कि उ कहे रहा। उ मउत क पाछे फिन जिआइ दीन्ह जाई। आवा, उ ठउरे क लखा, जहाँ उ ओतरा रहा। 7अउ फिन तुरंत जा अउर ओकरे चेलन स कहा, ‘उ मरे हुअन मैं स जिआइ दीन्ह जाई अउर अब उ तोहसे पहिले गलील क जात अहइ। तू ओका हुवाँ देखब्या।’ इहइ मई तोहका बतावइ आवा हउँ, ओका याद राखा।”

8उ स्त्रियन फउरन ही कब्र क तजि दिहिन। उ पचे डर अउर आनंद स खुस होइ गइन। फिन ईसू क चेलन क इ बतावइ उ पचे धाएन। 9एकाएक ईसू ओनसे भैंटेस अउर बोला, “अरे तू!” उ पचे ओकरे लगे आइन, उ पचे ओकर गोड़वा धइ लिह अउर ओकर आराधना करेन। 10तब ईसू ओनसे कहेस, “डेराअ जिन, मोरे भाइयन क लगे जा, अउर ओनसे कहा कि उ पचे गलील बरे रवाना होइ जाई, हुवँइ उ सबइ मोका देखिहई।”

### पहरेदारन यहूदी नेतन क घटना क बारे मैं बताएन

11अबहिं उ स्त्रियन आपन राहे मैं ही रहिन कि कछू सिपाही जउन पहरुअन मैं रहेन, सरह मैं गएन अउर जउन कछू भवा, उ सब क खबर प्रमुख याजकन क जाइके सुनाएन। 12तउ उ सबइ बुजुर्ग यहूदी नेतन स मिलिके एक चाल चलेन। उ पचे सिपाहियन क बहोतइ धन दइके। 13कहेन कि उ पचे मनइयन स कहई, “ईसू क चेलन राति क आएन अउ जब हम सबइ सोवत रहेन ओकरे ल्हास क चुराइ लइ गएन। 14जदि तोहार इ बात राज्यपाल तक पहुँचत ह तउ हम ओका समझाइ लेब अउर तोहरे प कउनो आँच न आवइ पाई।” 15पहरुअन धन लइके वइसा ही करेन, जइसा ओनका बतावा ग रहा। अउ इ कहानी यहूदियन मैं आज तलक इहइ रूप मैं सँचर गउ अहइ।

### ईसू क आपन चेलन स बातचीत

(मरकुस 16:14-18; लूका 24:36-49; यूहन्ना 20:19-23; प्रेरितन क काम 1:6-8)

16फिन ग्यारहु चेलन गलील मैं उ पहाड़ी प पहुँचिन जहाँ जाइके बरे ईसू कहे रहा। 17जब उ पचे ईसू के निहारेन तउ ओकर आराधना करेन। जदपि कछूक मनवा मैं सक रहा। 18फिन ईसू ओनके लगे जाइके कहेस, “सरगे मैं अउ धरती प सबइ हक मोका दइ दीन्ह गवा अहई। 19तउ, जा अउर सब देसन क मनइयन क मोर चेलन बनावा। तोहका इ काम परमपिता क नाउँ मैं, पूत क नाउँ मैं अउर पवित्तर आतिमा क नाउँ मैं ओनका बपतिस्मा दइके पूर करब अहइ। 20उ सबइ हुकुम जउन मई तोहका दिहे हउँ, ओनका ओन प चलब सिखावा। अउर याद राखा इ सृस्टि क अंत ताई मई हमेसा तोहरे संग रहबा।”